


盧

前著

北
異
野
選
集

中國文化服務社印行



北野選集

冀野選集目錄

冀野文鈔	一四一
廿前詩存	四二一四四
卅前詩選	四五—五五
卅前詩選	五六—九二
冀野近詩	九三—一〇一
紅冰詞拾	一〇二—一〇七
中興鼓吹選	一〇八—一二四
北遊草	一二七—一四四
黔遊心影	一四五—一五一
遼鶴哀音	一五二—一五七
西域詞紀	一五八—一七五
飲虹北劇選	
琵琶賺	一七六—一七九

茱萸會.....一七九—一八三

女惆悵爨選

窺簾.....一八四—一八七

課孫.....一八八—一九一

附錄

廬前傳 易君左

諸家評 十七則

冀野文鈔

非大小言賦



(宋敏恆木刻) 作者像

楚襄王在陽雲之臺。宋玉進大言得上座。小言受雲夢
賜田。王曰。抑未備也。大言炎炎。小言詹詹。二賦迂妄。何
如爲平實之言。窺民隱。端政本乎。唐勒作而言曰。罔知
懼令廉吏無呼天不聞。豺狼當衢。至景差曰。有吏無民。
各私其身。著火益熱。入水益深。畔渙者人心。治術日疏。
賢能不親。王因啼曰。豈至是耶。寡人耳目。乃無所聞見。
睇視玉。默然無語。玉非大小之言不言。

北碚賦

北碚之地。毗連陪都。合川江北。列東西隅。天授沃壑。縣亘爲區。溯江而上。是謂温塘。峽石眷岑。碚名乃彰。
蒼蒼縉雲。上有唐寺。太虛築臺。峯曰師子。下則流泉。具備元史。蒙哥被殪。卽其遺址。乳花之洞。西山之坪。
景探庚桑。瓜登馬陵。一方風物。得此稱最。春夏之交。日有高會。止乎澄江。韻流可醉。自碚而下。東陽夏壩。

復且在焉。江山如畫。黃桷鎮左。白廟煤窟。往來輪軌。天府所蓄。昔者荒瘠。今爲康莊。崇樓廣廡。大賈巨商。國立二館。分峙道旁。醫有博院。射有博庠。驗試農工。各啓場圃。傳影有殿。散居前后。託兒教養。良師樂育。人文之盛。甲於東蜀。伊誰闢之。吾家李英。以經以營。廿載以成。從亡西竄。流寓者多。樂其風土。不廢吟哦。義戰旣克。流入其東。從而作賦。留戀無窮。

登黃鶴樓文

廬前栢暹漢水。一日被酒。冒雪渡江。登黃鶴之樓。賦白鞮之曲。蛇潛於後。龜伏其前。俛仰山川。悲從中動。百憂遙集。歌不成聲。昔走東海。七月還都。舉室播遷。訖於今日。十口累人。一枝何託。于湖之宅。三月未安。濡上之船。九艱已茹。傷弓之鳥。倦羽驚心。涸轍之魚。低頭待命。管仲有母。張儉無歸。藐是流離。抑可悲已。金陵旣陷。里社爲墟。虜騎縱橫。小園寥落。始知庾信之哀。又見阿房之炬。夢華之錄。元老神傷。金石之編。易安魂斷。折柳隋堤。烟籠寒月。鳴鷄梁隸。潮打空城。舊日釣游。都難蹤跡。撫今思昔。悲亦何堪。况乎登樓。王粲風景。頓殊懷刺。爾衡字形。竟滅歷歷。晴川漢陽。樹老萋萋。芳草鸚鵡洲荒。孟德橫槊之時。崔顥題詩之地。草檄陳琳。頭風孰愈。無辭李白。胸意誰知。千里黃驄。未逢伯樂。三條紅燭。尙想荊州。藏珠被褐。能不悲乎。凡此所懷。書之盈幅。竊猶自懼。憂最傷人。尺寸之材。陶公不棄。中興之業。李郭可期。半壁旌旗。貔貅十萬。一旦東引。指日收京。故不同沈炯之辭。聊效孝標之序。

巫山舟次上霜厓師

自度宜昌。洪瀾激湍。悲風夜吼。捲雪千堆。朝發黃牛。鼓輪迨上。路迴峯轉。峭壁干雲。頰印江山。爲之色變。榜人語我。已登西陵道上矣。又四十里。經小心灘。入兵書峽。相傳諸葛忠武藏兵書於此。峽高百仞。其巔有門洞然。蒼翠之間。雜生紅樹。怪石嶙峋。嚮所未見。有時翠筍山腰。居然茆屋。始信世外桃源。匪徒夢想。惜乎太原漁父。未至此鄉也。

大河壩寄婦

合州初發。四野啼雞。五里旣行。始逢墩上。修篁滴翠。路入羊腸。迎帽千峯。竿邊一水。髣髴身在。輞川畫卷中。也。遙指炊煙。幾家田舍。使得與吾之慧。奉母挈兒。於焉終老。不其懌而時已黃昏。抵大河壩。此去潼南。尚有七十投宿茅店。風急天高。照壁一鐙。相思無亟。輒念小兒女。解憶其父否邪。

母子零丁

往於太平御覽。見戴文讓失父零丁。誦其言而悲之。以爲不幸致災。非關積惡。展轉溝壑。天道可傷。東夷構釁。前始流離。蒿目驚魂。江淮苟活。塗雅粉墨。破壁留題。逆睹其辭。輒爲酸鼻。始知拋兒喪母。叔季皆然。不獨文讓當日也。嗚呼。誰使爲之。實倭之咎。旦夕自斃。不義多行。令我同懷。遭茲顛沛。爰最錄之。爲零丁二。一曰。敬白諸君行路者。敢告孽重不自滅。東海陷落。走南越。失母之日。十二月。母令不見。可痛傷。舉家淚眼日相望。請爲諸君說事狀。我母衰年。短軀幹口。操吳語。楚音半。請復重陳其面目。眉毛脫落。髮亦禿。視近鼻凹。紋滿頰。食不能嚼。頤無肉。齒牙已錯落。可數。咄嗟如鷄啼。喔喔請復重陳其形骸。僮僕進行不

能偕。顏色蒼蒼如枯灰。諸君使我骨肉完。願爲犬馬用相償。

二曰。敬白請君行路者。敢告寡德不自死。旁皇淮上失吾子。今年一月之十四。熒熒孺幼去何方。覓父尋娘肝腸斷。請爲請諸君說事狀。我子長不滿二尺。三歲學語猶吃吃。請復重陳其面目。秀眉鬢於悉率觸。兩瞳常轉動。淨淥髮已覆額。若新沐。逢人愛笑不喜哭。老呼耶耶少者叔。請復重陳其衣裝。戴覆盆帽著紫裳。項有銅鑲響丁當。諸君使我骨肉聚。恩富銘刻入肺腑。

別福建音專師生書

前以十七日晨六時離永安。在第一橋始遇同學代表。聞呼聲作於道旁。急揮帽示別意。不知曾見及否。午飯朋口。四時抵長汀。應鄭香翁約。宴罷赴廈門大學演講。歸中南社已夜深矣。明日破曉登車。午止零都在瑞金換車。抵贛縣才三時。憩勵志社。中正大學任教授和聲鵠待中正橋。與十六年不見之老友歡敘竟夕。又明早七時出發。越大庾嶺至梅關。飯於南雄。下午二時即達曲江。極爲迅便。堪以告慰。然迢迢北上。車行日遠。此心固無時不繞吉山間也。在曲江巡視市場。知中國樂器頗充斥。琵琶。二胡。月琴。笛。簫。無不備。所缺者惟鳳笙耳。幸語西林先生。可託運輸公司設法爲校購置。前當晚登粵桂聯運車。因過此須待一週。上車後解衣酣寢。三日來疲勞略減。頃已至衡陽。爰就車箱書寄草草。同車有浙贛長吏。談次甚稱許今年之音專。吾校得此聲譽。皆諸位先生之功也。願諸同學益自奮勉。俾實副其名。教化日廣。不獨吾校之幸。亦我邦國之福。遙祝健康安樂。盧前三月二十日衡陽車站發。

爲遷可園老人墓致吳伯超院長書

伯超我兄院長道右。前日匆匆過我。未能暢申所欲言。惟知國立音樂院已勘定古林寺爲院址。並新建院舍。聞之至慰。古林寺爲西城勝處。於此辦音樂教育。至爲適當。且弟嘗言有宋一代文化大都接受南唐遺產。此西城一帶在南唐時爲極繁盛之區域。翠微亭後主避暑宮卽在附近。南唐以文學音樂藝術著。借此富有歷史意義之場所。南京固有之文化區域。從容經營音樂院。則前途之昌隆。可以預卜。顧深悔當時未能爲兄一言。其地尙有一大經師可園老人之墓在焉。可園陳氏諱作霖。字伯雨。一字雨生。不獨爲金陵一大師。亦晚近不可多得之人師。一代人倫之表。生平曾宣付國史館立傳。至今稍涉獵南京文獻者。當無不知有金陵通紀。金陵通傳。金陵五種。炳燭里談諸書。老人壽八十餘。弟幼時亦曾及親炙。民國初年論東南耆碩。老人當爲魁率。此墓之應保存。非陳氏之事。亦非僅吾南京人之事。是全國學術界之事也。此墓之得保存。不獨不妨礙音樂院。且爲音樂院之光榮。布置爲風景區。爲校景生色。不讓清華園之有梁任公王靜安兩先生墓專美於前也。頃見報載貴院遷墓通告。第二令遷之墓卽爲可園老人。弟大爲驚詫。值市臨參會有會。弟請市政府轉函致貴院。此事關繫南京文獻匪淺。雖以弟與兄交誼之篤。亦不欲以私誼相干。因保存陳墓事屬保存文獻。不可不使天下之人共知共見。尙祈吾 兄咨詢各方。詳細考察。使老人之墓得保存於西城。保存於貴院。他日觀光貴院者。得一屏拜此大儒之墓。闕甚盛事也。弟盧前上言。

飲虹菴記

金陵城東。故有飲虹園。鄰白鷺洲。先府君卜宅園南。戊辰。余築室後圃。名飲虹菴。庚宋元樂府千卷。俛仰

其間客至。非周辛關馬不言。月出尊清。詞成相和。於是乎人知籛。不知園園之不幸與抑籛幸也。

峨眉伏虎寺壁記

峨眉雄秀名天下。辛未夏。余歸次嘉州。因來游山行二十里。止伏虎寺。溪澗縈迴。有橋通焉。水自石罅出。玕璫如珮環。山際天而青。寺樓屹立萬綠間。雄秀與山稱。然後歎名之無虛也。流連三宿。猶不忍去。桑下之情。古之人已如此。余其能自己乎。雲安師請書諸壁。

故山別母圖記

故山別母圖者。鄴承銓教授作。以慰瑞金周慶光邦道陟屺之悲也。瑞金處萬山中。大亂以來。爲犬羊窟宅。周氏負鄉望。不得走避。賊所欲得者。惟士大夫。於是慶光父榮舉先生。數被執。母夫人楊奔走營救。屢贖歸。未幾復擄。春塚去。春塚考慶光猶子也。夫人乞釋之曰。欲還女孫。必女質春塚反。夫人病作。旋不起。時二十一年壬申冬月也。慶光幼游學。謀衣食。江南北者十餘年。承懼日少。十六年丁卯。始受命任江西省立甯都中學校長。甯都鄰瑞金。故山在望。以爲可不時歸。又值葉賀變。道常阻。二十年秋。舉高等考試。第一。官京師。爲部曹。榮舉先生既脫險。慶光迎養來都。逾歲始得夫人。耗父子相抱哭。慶光尤哀毀甚。具狀告哀於其友盧前河南。曰。邦道赴甯都。在六月之十六日。母爲檢行理。清晨送之門。邦道行數武。望屋後。龍霧山雲氣與吾親之白髮相暉映。心戀戀不忍去。此情如在目前。終余之生。不能忘也。前悲其言。亦無以慰之。其後三年。始介前之友鄺君爲圖。其別一屏。卷間如對慈母。亦足塞感愴於萬一。且以慶光之

學與才登車攬轡。自有所建樹於世。果天下澄清。其爲劬勞之報者。正夫有艾。慶光勿過悲。毋傷老人心。卽所以慰母於地下也。前承命作記。固未足以闡威德。然所勉望於慶光者。儻不以爲非歟。

△金鷄嶺遇險記

前旣受部聘出長國立福建音樂專科學校。值第三屆國民參政會第一次大會集陪都。與會五日。始成行。以十月二十七日飛航桂林。居未久。偕浙閩監察使高曙青先生乘湘粵通車抵韶關。會有南平曲江直達汽車。取道贛縣。瑞金。入閩。十一月八日宿長汀。曙青先生倦且止。前計程明日得達永安。自幸其行旅之迅便。心竊喜焉。閩西多山。九日飯朋口。南進嶺益峻。林莽叢密。意去會城咫尺。宜無所戒懼。路數折。出金鷄嶺。忽見持槍者三四十人。阻車前。而嶺上有二車在。十數客屏息途側。始知有變。車中人次第出。舉手任搜索。車上箱篋悉委諸地。槍聲斧聲一時作。一匪面前斥曰。綁。乃受縛。被縛者凡六人。中一女子。騙入山。行不循徑。一匪手槍指前曰。此陳吾前故識陳吾者。其人驚而腴。誠肖前。然前有髯。陳無之。以語匪不答。但揮令前進。五里十里。越嶺路絕。女子者牽一客衣哭。匪心動。兩釋之。並解前縛。前匍伏榛棘間。禿衣脫履。攀援以登。創足涔涔。血出憤而言曰。死耳。請斃我。一匪槍舉。衆復尼之。兩匪出挾前行。至不能舉步。匪曰。此誠吾輩累。且暮前私計得懸崖自墜死亦快。獨恨事功未竟。無以酬平生之志。卒不果。又十餘里。前據坐地上曰。我之來爲教育。囊中文物可爲證。世間甯有學校出贖校長者。汝等意果何屬。願告我。匪有諳國語者。以語一戴軍帽佩短刀者曰。君校長耶。今日之事。豈吾輩所欲爲。劫君者官也。君去連城理之。語竟授布履一雙。一手杖幣百元一紙曰。鹵莽乞諒之。此去循石徑可通公路也。前乃掉首。

疾行下山。背聞一匪笑語。有聲。吾故知其非耳。同難者三人含淚呼曰。行矣。無忘我輩。當此之時。前始覺其遇之可悲。願昏暗不辨方向。坂危磴滑。行且仆。起復馳。久始望見燈火點點。村落間。徐徐漸近。亦自忘其力之已竭。抵村。渴甚。寒風吹單衫。戰顫不已。村人紛聚問訊。飲以水。問自來處。則曰。黃勝地。更五里上公路。一少年願導前行。引至李寶坑。投一范姓家。時夜已深矣。既曉。步三十里。抵姑田。附車達永安。問同車者。中央警官學校李教育長士珍。弟十三補訓處嚴處長不嚴。福建政幹團王教育長原一。皆盡喪。所有步行入城。共慶前之生還。又未嘗不以曙翁之免為幸。學校員生以九日迓前從吉山來。得耗大驚。至有隕涕者。鄭代校長永祥暨諸友好方奔走營救。不意前近永而遘此厄。亦不意前脫險如是其速也。其後十三日。同難三人者出。謂匪知為前。因散佚其文稿。亦頗自愧悔云。烏乎。廣博易良者。樂教也。移風易俗者。主樂教者之事也。匪猶人耳。天下無不可感化之人。亦無不可感化之匪。天下不一金鷄嶺。欲盡化險為夷。非復興樂教。弗為功。今而後知所勉己。民國三十一年十一月二十五日。盧前吉山記。

北泉議禮記


中華民國三十二年十月三日。國民政府考試院戴院長傳賢。舉禮制討論會於四川北碚縉雲山下之北溫泉。中央黨部丁委員惟汾。狄副秘書長君武。內政部周部長鍾嶽。教育部陳部長立夫。顧次長兼國立禮樂館館長毓琇。銓敘部賈部長景德。外交部胡次長世澤。文官處典禮局田局長士捷。考試院史祕書長尙寬。陳祕書百稼。軍事委員會周委員亞衛。宣傳部章主任祕書淵若。禮俗司聞司長鈞天。李幫辦安。甄核司陳司長曼若。社會教育司劉司長季洪。教育部段祕書天炯。丹徒柳先生詒徵。吳縣汪先生東。

祥符斬先生志。興甯羅先生香林。國立禮樂館禮制組盧主任前與焉。甘君豫源掌紀錄。徐君曉林司速記。以午後四時始集議農莊。擬定程序。交換意見。分配工作。訖十日之午。初畢厥事。自立原則。分組草創。討論之潤色之。暨整理初稿成。凡七日。吉凶二禮列第一組。陳部長立夫主之。而嘉賓二禮爲第二組。賈部長景德主之。以軍禮本軍事委員會所領陸軍禮節。無庸設組。九日復有服制討論組會。各組所議。具見北泉議禮錄。所謂五禮草案者也。先是八月二十七日。就二十一年內政教育二部所擬禮制草案。審議在國立禮樂館。有禮制談話會之集。立法院林委員彬。趙委員迺傳。劉委員盥訓。國民參政會孔參政員令燦。內政部王次長德溥。教育部陳參事石珍等。各抒所見。詳載紀錄。哀然成帙。顧未遑創立規模。至是承戴院長旨。始得建民國通禮之基。草案雖尙在研討。頒行有待。而北泉之會。實開國感事。不可以無記也。其年十二月一日。金陵盧前記。

中興鼓吹亭記

前居閩主樂教之明年。爲中華民國三十二年元日。諸生聚永安城中。歌前所爲辭。蓋自軍興以來。詠戰役。作士氣。發皇我國風者。有中興鼓吹之作。西南諸省流布。至十數萬冊。閩士悅之。將覆槩其書。未就而歌聲得先接於衆耳。保加利亞人尼可羅夫。教校復取辭意。造中興鼓吹樂。播諸管絃。一時以爲感事。於是詩人葉長青。爲榜上吉山宅旁小亭。亭舊無名。乃名曰中興鼓吹亭。以志元日之會。顧前無似。與諸生日處山中。絃歌往復。徒以區區文辭報國家。無補時艱萬一。可媿也。

中興鼓吹亭



練存軒銘

國立福建音樂專科學校。在永安縣境南上吉山。傍北陵殿而枕燕溪。風景壯麗。入門爲講堂五楹。堂後有陂。迤邐東行。拾五十三級梯。林木深茂。蒼翠迎人。其上精舍。則校長宅。廬前實居之。日聚友生宅中。談樂藝。日月雲霞。變幻不常。據几眺遠。窗以外無非山者。而琴音盈耳。昕夕無間。萬里浮流。不知此身何託。雖然前豈甘遊隱。坐忘世邪。因誦蔡中郎琴歌中語。名其軒曰練存。復爲銘曰。

練余心。浸太清。滌穢濁。存正靈。琴之德。是爲名。夙而興。宵以聽。歌則永。絃必鳴。誠所至。揚其聲。前銘之告。諸生。

書麻鄉約

庚午。道出渝州。寄行李於麻鄉約。初某氏候館。有客貧且病。主人將逐之。鄉約館之傭也。延客至家。爲治湯藥。及去。贖以金。其後客來。爲吏。召謂鄉約曰。夙惠不敢忘。願聞所欲。鄉約固辭。鄙夫無能。爲使筦川滇黔三路大幫運輸。川俗所謂鄉約也。鄉約姓陳。面麻。故稱麻鄉約。烏乎不任不恤於今甚矣。乃慨然而書之。

書莊景周

嘉慶末。韓小窗以子弟書稱於時。有曰甯武關譜周遇吉死事者。尤爲東調最。子弟書者。以七字文敷演故事。作於八旗子弟。故名。韓氏先有羅松窗。爲西調。擅兒女子言。今世所傳鵲橋出塞。皆松窗詞也。而慷慨激昂之音。以述忠臣孝子事者。是爲東調。歌東西調者。伴以鼓。俗乃謂之鼓詞。劉寶全者。初習亂彈。與汪桂芬譚鑫培者游。桂芬晚年齒落。行腔以唇。鑫培則宛轉於喉。衆競效之。知皮黃之日以盛也。汪譚必爲一世雄。度無以過之。遂取其腔融於鼓。而其友莊景周爲之辭。不十年。世無不知有寶全。獨景周無名。於是寶全歌詞所從出者。不可考。景周字蔭棠。號耀亭。別署知非子。一作待餘生。江蘇武進人。同光間爲吏部選司。久沉下僚。鬱不得志。旣納交寶全。習梨園場面。笛鎖唢琵琶。絃子。咸能上手。皮黃生淨。崑腔小

曲蓮花落。梅花調。以速快書。單絃時調。無不工。故都之有新聞紙。亦自景周始。光緒辛丑。創京話日報。所撰白話聊齋。燕市叢譚。燕市集弊。戲評之屬。家絃戶誦。景周書口語。每製新字曰襟。曰傑。曰猗。裏。猗。拉。皆狀聲副義。以立其形。清社既屋。復爲實事白話報。爲寶全所作。惟對刀步戰。今不傳。若罵曹及別母亂箭。所謂二本甯武關者。莫不快人耳目。非小窗所能及。故寶全非景周之辭不歌也。景周死。寶全在天津。其家將以赴告。而寶全素車至矣。曰。四十年之交。身後事舍我其誰。屬營其喪而去。景周卒年六十有八。今年六月。寶全南來。遇前於金陵。爲言景周生平甚詳。請書之。廬前曰。羅韓之視景周。有前賢後生之畏。固矣。微寶全。雖景周奚足貴焉。不知羅韓之世。抑有如寶全其人者耶。烏乎。鼓詞。藝耳。然亦知人論世之資也。乃著於篇。復爲詞。曰減字木蘭花者。以貽寶全。詞曰。譚喉汪齒興亡一部梨園史。白髮歌王爲我從頭述。教坊未慚死友。說到知非纔住口。四十年來。誰識詞壇有霸才。

書史貫一

初蘆溝橋變作。冀南各縣民衆制梃起。以協助國軍。是爲游擊隊之始。以寡禦衆。收牽掣功。而我游擊戰術。遂聞名世界。史貫一者。實首其事。初集燕趙間千餘健兒於邢台。曰。民衆抗敵特務團。貫一自爲之長。不二月。攜械來歸者四五千人。時敵炸我堯山。迫無極。趙縣。貫一率諸健兒戰。且行繞道內邱。出太行山。至新鄉。合河南之衆。重編部曲。號豫北游擊第一縱隊。樞府既畫戰區。從制改編爲第一區。獨立第二游擊支隊。貫一任副司令。司令則河北張蓋臣。編制定。退駐輝林。教練日益勤。已而選精壯二千。貫一親統之。進武陟。安涉。磁縣。安陽。側擊敵背。敵大恐懼。不敢前。第一戰區程司令長官頌雲。特電嘉獎。貫一治兵。

有古名將之風。日伏山中。甘苦與士卒。戰必以身先。故從者千萬。而一心相終始也。既調焦作。復受任第一戰區司令部諮議。赴河北滑縣道口。閱光復軍暨各游擊部隊。敵方圖攻平漢線正面。已毀黃河鐵橋。貫一從汜水北上。潛入敵後方。點檢如命。在武安磁縣鼓城。賈壁召諸游擊隊指揮。示機宜。畢將復命。歸次湯陰。幾落敵手。脫而行走。至汜水孤柏嘴渡口。敵機來襲。不及避。乃中彈死。民國二十七年二月十八日也。貫一。河北省定興縣人。北平郁文大學畢業。年才二十三。廬前曰寇患日深矣。捍衛國家。豈獨軍人責歟。貫一以文士建功如此。使國之軍人文士。盡如貫一。彼倭寇何足患焉。吾不哀貫一死。哀貫一之少也。噫。

書空軍四烈士

空軍四烈士者。曰陳懷民。張效賢。楊慎賢。孫金鑑。陳懷民。江蘇丹徒人。子祥先生次子。年十七。走寬橋。應試中央航空學校。錄爲第五期驅逐科學生。二十五年畢業。編爲空軍第四大隊隊員。軍興以來。與倭空軍木更津隊先後百數十戰。無不捷。雖一再受創於高旺。商丘。亦不少餒。而木更津隊殲以盡焉。今年四月二十九日。倭復舉佐世保隊犯我武漢。懷民起御所乘。以一當十。倭有高橋憲一者。最驍勇。懷民出不意。與相搏擊。兩機並落。同盡矣。其地則青山之原。世謚之曰肉彈。與懷民同畢業於航空學校第五期者。有張效賢。安徽合肥三河鎮人。幼失怙。特鞠於其戚門。致中家。致中撫育之成人。在寬橋時。與懷民友善。既出任航空大隊分隊長。益以忠誠爲長官愛重。五月三十一日。與倭空軍戰。方酣。機有損。效賢力護之。不欲以傘自降落。卒不支而墮鳳凰山中。身與機焚。同輩傷之年長於懷民三歲。纔二十有六。其以特技

著稱者。則廣東梅縣楊慎賢。亦分隊長。先懷民效賢一期畢業航空學校業。四月初。破敵津浦綫上。既歸駐馬店機場。將下。見場上揚旗示禁止。疑有變故。亟轉機去。機壞墮地。死。慎賢夙善戰。竟未死於戰。惜哉。後慎賢二期。懷民效賢一期畢業航空學校。古曰孫金鑑。爲山東人。在第六期同學中。成績列第三。四月十日。自津浦綫戰歸。次商丘。遇倭機。懷民無傷。而金鑑從傘下。中七彈以殞。鑑金美丰姿。如懷民。喜音樂。年二十四。小於慎賢者三歲。廬前曰。前在漢口。子祥先生具懷民狀來。乞志墓之。文曰。懷民死。吾安得而不悲。然所悲不在其死。在未能爲祖國爭最後勝利。而惜其死之早耳。時我空軍有東征之役。恨懷民之不及與也。自是先生與前相往還。一日。又爲言張楊孫三君死事。有併葬青山議。前既爲懷民碑銘。復合書四烈士俾他日修史者採焉。

書別廷芳

南陽位豫鄂之交。爲中原鎖鑰。自晚清以來。幾無歲不遭匪禍。山林嘯聚。動輒千萬人。少者三五成羣。晝伏夜行。所至則姦擄焚燒。民不堪其擾。於是宛許通衢。行旅絕迹。白骨滿郊野。鄧縣一隅。荒地七千餘頃。民無敢耕者。有司畏匪如虎。匿不報。而匪勢日熾。民國二十六年八月。河南省政府調任朱玖瑩爲第六行政區督察專員。下車之日。有匪殺三衛兵於城之南關。奪其械。擄東關張吾以去。所駐軍爲國民革命軍第四十九軍。方奉命開拔。行次葉縣。遇匪衆出擊。走之泌陽。一營覆焉。玖瑩怵匪患之已深。知不能旦夕平。乃問計於別廷芳。廷芳字香齋。以老成碩望。爲宛西三縣領袖。凡農林水利保甲交通諸端。詳盡而

躬親之罔不舉。感玫瑩知遇，慨焉以裨衛地方。自任時，於各縣設縣聯防處，縣下設區聯防處，區下設鄉聯防處，鄉聯防處集三數鄉鎮武力以成，各鄉鎮設聯隊，聯隊統分隊，班與列兵之屬，其編組以槍不離人，人不離地，就槍編人，就人選官爲準。以我之槍編入聯隊，不遠征調，以我之力量聲望，自爲長官，不受俸給，匪至皆兵匪去則農也。廷芳部署已始，召集各官長訓練，自民族意識，國家觀念，國際形勢，作人道理，以遠近代戰術，道路電話管理法，改良村容，野容，及治河，改地，造林，畜牧，生產，諸門徑，三月而畢，散之鄉鎮，各以所受者授之班長，列兵，然後實施清編，清編云者，清鄉暨整編保甲之謂，清鄉以擒匪始，案其情輕重科之罪，重者殺，輕者貸以工役，兵役，保甲，旣編，匪不得匿跡，其間復抽各縣精銳壯丁組步兵團，四實團，勦事，不半年，河南省第六行政區之匪患遂平，南陽積匪如南鄉之孟憲甫，趙十四，李傳生，顧金斗，戚九成，小石匠，東鄉之吉慶四，李良，楊善發，畢廣泰，楊金盛，劉傑三，劉吉亭，西鄉之柳金德，高金奎，黃福成，陳十八，陳十五，北鄉之李大樓，尹底留，李麻皮，唐麻杆，谷文斗，次第成擒，置之法，而新唐之役，力拒倭寇，論者尤歸功於自衛軍，曰：微廷芳，無有今日也。省政府旣受廷芳自衛軍總司令，玫瑩已辭官去，今年三月，廬前以國民參政會聘，視察華北戰區，如南陽，廷芳臥病，命其屬趙司令芝庭來謁，具言自衛軍始末，前還行都，未幾，廷芳死矣，因舉所聞於芝庭者，著於篇，使覽者知草野有奇士，未得其用，抑可悲也。

書新唐之役

民國二十八年五月，倭騎兵自隨棗來犯，十日晨陷新野，及昏，南陽始聞耗，值第一戰區副司令長官孫連仲從洛陽至，隨行者僅十人，於是召河南省政府委員方策，曹仲植，魯蕩平，第六行政區督察專員朱

玖瑩集議於城西劉相公莊。當此時也。連仲部駐臨汝葉縣。調兵匪三日不能來援。計無所出。乃商諸自衛軍司令趙芝庭。令在八小時內督所部壯丁應戰。連仲語芝庭曰。若支三日。則吾部來。南陽無虞矣。芝庭曰。南陽吾鄉土。誓以死守。三四日間。敢使敵騎逼吾城下。此去不作生還想也。翌日黎明。合壯丁二十連至瓦店。進沙堰。敵知有備。折而東。自衛軍追之。夜九時。大破敵於新野。王寨北之齊莊。十二日。敵竄田店。既成圍。而空軍至。自衛軍隱蔽草莽。不敢出。敵乃逸去。而唐河縣失。敵既據唐河西岸高岡三碉堡。自衛軍始選奮勇隊三十人。戰一日。夜奪之回。封鎖唐河西線。敵不得渡。十四日。連仲部第三十師八十九團馳至。克唐河。併力追擊。三日之中。從湖陽太平鎮而抵棗陽。先後收復天河口。淮河店。自此敵騎不敢北窺矣。初。新野陷鄧縣。壯丁動員六千人。內鄉鎮平集合者八是役。新野唐河桐柏三縣。自衛軍官兵死難者四百人。南陽傷亡最少。云。前識芝庭。客大梁時。恂恂儒者也。今年三月。住南陽。玄妙觀。芝庭來謁。問以新野唐河之戰。且曰。子何由習兵旅之事。曰。別香齋先生教也。前惟宛西之建自衛軍。以有別先生。南陽之得保全。以有新唐之役。於是乎書。以備修戰史者之採擇。

述編修公事

石壽山房者在廩府老宅之繼圃。先曾祖王考雲谷公讀書處也。公年十四。偕弟昭忠公應童子試前夕。殮不得油。取燈盞餘瀝餉之。及試。先高祖王考負昭忠公背上。一手牽公衣。主試疑其幼。面試得卷。卽拔置前列。洪楊亂作。公去佐戎幕。事定始歸。以同治丁卯舉於鄉。辛未成進士。二甲第二名。入翰林。時。姚張太君尚健。在一日晨興。鵲噪於庭。喜曰。使六郎功名成就。鵲當三呼。果三呼。而報至矣。是皆前童子時聞。

再出。繼薛桑根先生後。爲尊經書院山長。歿於明倫堂。其在雲南有馬紳者。子數與試不第。欲賄公以金。不受。是場以非敢後也。馬不進也。爲題馬大慙。至今滇之人。猶有能道其事者。公夙儉樸。衣履之御。不尙華靡。居鄉里。會巨室。某張慶賀廳。事中聚一時顯宦。公至。逕入。候補道歐陽氏見頂戴。以爲縣令耳。趣前叩姓名。公具對。又問。宰何邑。曰。某沐天恩。使督學滇中。始歸也。其敦素如此。前往肄業南雍。與化李審言先生指前顧長洲吳先生曰。此盧先生裔也。詳少時嘗及見先生前。每過繼園。肅公遺象。慨修名之未立。恐遺書之就湮。行年三十。百無一成。世變日亟。念李先生言。益不勝堂構之懼已。

長洲吳先生行狀

中華民國二十八年十月。教育部長吳興陳立夫。請褒揚故儒吳梅於國民政府。命其弟子盧前具狀。前案。先生諱梅。字瞿安。亦曰靈鵲。晚自號霜厓。江蘇吳縣人。少失怙恃。鞠育於大父。讀書日十行下。爲文能千百言立就。以是名噪於時。應大梁聘歸。睹清政日疏。慨然有光復大漢之志。戊戌變作。六君子者死。先生作血花飛傳奇。指斥虜廷。辭激烈。大父懼賈禍。焚其稿。而文章傳播天下久矣。吳江柳棄疾。結南社。要入盟。每一篇出。儕輩歛服。復作風洞山傳奇。鼓吹民族思想。文苑向所未有者也。先生初精舉業。旣棄去。不欲以詩古文辭與老輩角逐。而倚聲之學。至王鵬運朱孝臧。况周儀塗徑盡闢。惟金元樂曲。突與未明。先生乃旁搜博采。藏曲爲海內第一。所印奢摩他室曲叢。至二集。不足藏曲十之一也。按拍傳歌。藉以辦訂譜書。遂得洞其聲律。析其條例。貫串舊說。爲顧曲塵談。如千卷。流佈至數十萬冊。近世樂曲之學。實自

先生啓之。始先生主講東吳大學。入民國後。任北京大學教授五年。南歸。在東南大學五年。中山大學一年。中央大學十年。二十餘年間。任大學教授如一日也。中數與審訂黨國歌。而以二十年之心力。成南北詞簡譜十卷。曲之有譜。始於明甯王正音譜。兼收詞體。不醇。李玄玉北詞廣正譜。沈璟南曲譜。稍可觀。莊親王大成譜。與欽定曲譜。根據李沈。無有發明。先生書最晚出。舊有疑滯。悉爲掃除。其功遠邁於萬樹之詞律。駕諸八百年間詞人之上。知音者無異言也。倭之治漢學者。若鈴木虎雄。長澤規矩也。青木正兒輩。慕先生之名。時時稱引。著說屢請見。輒拒之。蘆溝橋事起。移家至漢口。而湘潭。而桂林。而昆明。以民國二十八年三月十七日。歿於雲南大姚縣李旂屯。年五十六歲。歿前三月。總其著述。爲霜厓文鈔二卷。詩鈔四卷。詞鈔一卷。霜厓三劇不分卷。曲錄二卷。南北詞簡譜十卷。以書抵其弟子盧前重慶。曰。身後之託。如是而已。烏乎。前侍先生。且二十年。願頑鈍。何足以盡先生學行耶。

石達開傳

石達開。廣西桂平白沙人也。奉母至孝。辦潯江樵運。積貲頗富。當世鹽梟咸相懼服。平昔徧交江湖豪傑。觀變沈機。足智多謀。嘗一領青衫。筆下殊具奇氣。方洪秀全之創亂也。初始於良保會。時虜廷竄敗。青宮廢死。失天下之心久矣。洪氏以大義號召。得精壯六千。其妹丈蕭朝貴。達開故人也。嘗舉達開名。洪欲羅致而不得。其計既而與清兵相接於金田。用胡以晃言。劫平南縣令楊寶善。謂奉達開命。達開先聞之。親謁洪氏。洪大慚。達開歷陳出師之策。與治民綱領。蓋種族革命。達開熟計之矣。秀全肅起。敬全州之役。馮雲山死。秀全大沮喪。仰天而歎。曰。某自物色英雄以來。師事者錢江。兄事者雲山。今死矣。恐並世無能爲。

我助者。時達開坐於側。拂袖而起曰。蛟龍不遇雲雨。美玉雜於砧礪。爲世所欺。固亦難貴。不意神武如明公。尙若是之愚也。十室之邑。必有忠信。然則公輕量天下士耶。洪聞之。遽謝請益。達開曰。藤縣有一人焉。亦今日之臥龍鳳雛也。洪固叩之曰。無他。鼎旺村李秀成也。其人躬耕隴畝。不求仕進。生平不治經術。然定國安民之策略。了然於胸。今年二十有八矣。倘得其人。何愁無天下也。秀全然之。遂重任秀成。洪得秀成力。皆達開荐賢之功。洪都有張嘉祥者。驍勇冠三軍。達開顧洪之兄仁達言。嘉祥勇則勇矣。然其人反覆無定。且利祿心重。善自防範。勿使其叛變。未幾果背仁達而去。爲清師向榮部都司。仁達不復敢見達開。達開聞之大憤。及征討東南。成半壁江山之業者。亦多賴達開手。其破柳州。時在夜半。潛越小山。掩襲西門。劉金城大敗逸去。柳固富庶。足資軍食。一鼓作氣。直奪永福。復據桂林。擒王兆祺。李應元。殺江忠濟。頒布檄文。始定大漢。遂晉封前部都督。第二天將復漢將軍。於是太平天國初奠規模。清廷迭聞戰報。舉朝惶恐。下旨會國藩興辦團練。郭嵩燾復獻策。創水師。氣勢漸壯。與洪氏相抗。儼如二國。達開軍攻衡州。兩湖震恐。國藩用胡林翼計。離間洪楊。靜以待變。達開以疑兵誘國藩。大破之。會幕中士羅澤南幾死。肅朝貴在石軍中。達開囑其堅守。朝貴不信。曰。人皆立大功。豈進湖南。我便爲木偶耶。遂進兵。爲林翼伏兵所殺。達開歸。伏尸大哭。復令羅大綱領師。合章昌輝。追國藩。塔齊布。楊載福。望風避西北。國藩東走。忽一流彈中坐馬。馬仆。國藩墮。一小校護之去。則張玉良也。國藩旣退。陽攸醴陵。耒陽。紛紛失守。國藩怒。欲治之罪。張亮基曰。衆寡不敵。非縣官之罪也。公擁兵不下二萬。而不能保一衡州。又何責彼乎。國藩聞之。慚愧。岳州旣下。秀全大喜。宴會羣英。圖謀大舉。時衆已有推洪改元在位之心。然秀清多疑。秀全終畏之。先是清布流言。思挑內亂。秀全以朝貴妹三娘妻楊氏以安之。秀清聽婦人言。已稍易態度。一日。達開偕李

秀成黃文金陳玉成韋昌輝譚紹洸洪仁遠洪仁發李世賢李開芳林鳳翔羅大綱曾天養陳坤書等入賀秀全。俯伏呼萬歲。秀全曰。衆兄弟以大義責孤。孤敢不從。於是定國號。佈告中外。整飭制度。錢江曰。主公以宗教地義崇奉天父天兄。既爲天子。當稱天王。天國。值長沙城外。得古壘。上有太平二字。遂改爲天國。太平元年。時咸豐元年也。既而議爵賞。錢江以爲大不可以過公侯。而秀全欲擇封王位。以壯國威。事成各使歸藩。此姬周封建之法。錢江李秀成皆以爲不可。於是秀全問於達開。達開謝曰。料事深遠。臣不如錢江。多謀能事。臣不如秀成。何必多問。臣等非不欲居高位。享榮名。想亦時勢不可耳。其後秀全卒。依楊秀清各封藩王。晉達開爲翼王。秀清自忖進兵入湘。未立寸功。欲領師取漢陽。爲立功固權之計。謀入路攻城之策。達開語天王曰。漢陽通衢也。爲咽喉之地。常大悖鼠狗耳。臣願以千人破之。以獻二人爭於庭。天王不能決。錢江時爲靖國王。任軍師兼軍中。大司馬職。然以天王不信其言。封諸王。心甚厭。辭病不朝。天王往就商之。問出師漢陽之策。此任非謀勇足備者。不能當。果孰往。錢江不語。天王曰。孤將命秀成。江曰。秀成誠足以任之。然官不過副丞相。何能御衆。天王曰。噫。此妄自封王之失也。然則達開何如。曰。斯可矣。遂以秀成副之。冬月。師發。達開以火攻城。焚朱翰自盡。知府董振鐸死。亂軍中。漢陽遂平。明年達開復帥所部圍宿松。宿松者。清將湯貽汾守之。貽汾亦智勇之士。有精銳一萬。圍久不解。士卒怨望。達開致之書。書曰。天國翼王石達開。書秀清將軍湯公麾下。以將軍勇冠三軍。才不世出。徒以功名心重。轉昧時機。遂至順逆不分。沈迷至此。蓋仰望之餘。不禁歎惜之矣。滿人踞我中原。二百餘年。此皆我漢人所痛心疾首者也。天王奮起義師。識時務者。方冀光復舊物。還我神州。故凡我人民。罔不歸命。將軍乃以悍鷙之性。以驅馳就命於他人。抑亦惑矣。今兩湖既定。舉兵東征。望風披靡。區區宿松。何憂不下。獨思將軍威

以治兵仁以愛民。宿松生靈十萬，其性命方便於將軍之手。本王亦何忍極其兵力以負將軍愛民之威德耶？將軍神勇高義，甯不知所以自處，舍民命以成名，吾知將軍之不爲也。伏爲思之。貽汾得書，引劍自刎。宿松父老，簞食相迎。達開傳令將士，不妄殺一人。宿之民，啣感其德。洪軍旣東，展將以南京爲國都。達開率五千人往征太平。太平者，南京鄰府也。地若彈丸，朝士咸笑其兵多。達開不顧，未一日而太平果破。知府李思齊胆最小，惟可其小故，多兵以驚之，以易取。錢江聞之，稱譽不置，曰：「破金陵有達開，如反掌耳。」達開謂計江耳語之，達開諾，歸詭稱寺僧洩軍情，盡逐之。清吏多奉佛，僧歸無處，咸相率赴金陵。石部下亦易袈裟偕行。旣至，開門納入，不知其僞也。時內外火發，金陵克矣。劇戰三年，自是乃定偏安之局。然從此蕭牆禍起，初楊秀清守漢陽，林翼與國藩之弟國葆統軍來戰，秀清力不支，敗走武昌。於朝廷頗有怨色，且積性虺蜴，欲奪洪氏而代之。故熊復萌，漸露剛強，聞定鼎金陵，將東流而下。錢江之意，繼續北伐，天王不能用，而韋昌輝素嫉秀清，達開恐其內變也。言試昌輝曰：「錢軍師之不出，懼我兵權重也。」昌輝曰：「兄休戲我，軍師與足下相知最切，安有猜疑？所疑不在足下，必在東王。東王者，秀清也。達開偕昌輝逕趣江府，輝攘臂呼曰：「軍師何病？爲區區楊豎子耳，彼何足算？如不善，當卽圖之，毋使其噬臍也。」江大驚曰：「將軍何出此言？我無此心。」昌輝曰：「楊豎子才略有限，妄自尊大，誠不足與謀。今不圖之，後悔無及。」江謂垣有耳，請低聲。輝曰：「除一豎子，一夫力耳，公何怯耶？某爲請命，往守漢陽，謀之將來，必有以報命。」拂袖悻悻去。江顧達開頓足曰：「奈何奈何？」達開曰：「我將曉以大勢，諷之緩行。」未久，秀清歸，昌輝婦略洩其恨秀清之情。而秀清自稱九千歲，昌輝大懼，殺秀清之心愈切。一日延之飲，於坐上殺之。昌輝至天王府，自請罪。朝內大亂，江請於天王曰：「東王有可殺之罪，北王無擅殺之權，兩言盡之矣。」昌輝北王也，談頃，達開忽倉皇至，曰：

殺東王者。天王命耶。若然當暴東王罪案。布告天下。無使民心疑懼也。天王未及答。昌輝立曰。此非主意。殺東王者。韋某也。達開怒曰。東王有罪。家人何罪。乃盡殺之耶。昌輝曰。無此事。兄何所聞。達開曰。城中傳遍矣。吾亦知東王罪有應得。然焉能殺其全家。昌輝力辯。探之果然。昌輝驚仆于地。掖之歸。達開固與昌輝善。人皆以爲翼王。北王同謀。洪仁達請天王按例治罪。洩前仇也。錢江力爭之。遂罷。時北伐已任林鳳翔。鳳翔年邁。且秀清推任之人。錢江欲以達開爲代。天王未敢決。達開氣沮。遂定西去之計。謂江曰。天王仁慈有餘。決斷不足。某自徑行直道。豈能防小人乎。先生勿言。吾志決矣。江曰。足下之志。將若之何。達開曰。大丈夫當謀自立。豈能屈居人下。以伺小人顏色乎。吾將大舉入川。彼天府池。出入漢中。幸而事成。與天王犄角相應。有何不可。江固勸之。而達開志已決。值部將黃典英歸自武昌。陳川中空虛。宜速取。達開遂去。天王聞之。淚下。錢江亦嘔血。昌輝撫心自愧。舉家自裁。江見事已無可爲。遂遁入峨嵋山中。太平天國至是始衰矣。達開旣行。將過荆襄。望夔陵。時國藩駐節浦口。聞達開至。謂諸將曰。我愛達開爲人。若能降之。則諸將不足道矣。因作書致達開曰。大清禮部侍郎節制湖廣江西軍務會國藩書候天國翼王麾下。某聞識時務者呼爲俊傑。今將軍以蓋世之雄。舉兵湘桂。爲天下倡。奇略雄才。縱橫萬里。甯不偉歟。然時勢不可不審也。當洪秀全奮袂之初。廣西一舉。湖南震動。進距武昌。下臨吳會。聲勢之雄。亘古未嘗有也。然以區區長沙。且不能下。使南北隔截。聲氣難通。故馮遠墳分據全州。蕭王亡身於湘郡。會天養失事於漢口。楊秀清受困於武昌。以至盛之時。而不免於險難。則天意亦可知矣。歷朝開創。皆君臣一德。以圖大事。乃事功未竟。殺戮相仍。君王以苟安延旦夕。貴胄以私憤忌功臣。以建大功。行大志。如將軍者。且不安其身。此則將軍所知矣。夫范增失意於鴻門。姜維殉身於蜀道。此非勇智之缺乏。則以其所遇者非人。

也。尋將軍去就之故。則以恃才智而昧時機。遂至沈迷猖獗。而有今日耳。國朝七葉相傳。號爲正統。深仁厚澤。禮士尊賢。如將軍者。一登廟堂之上。方過冀北而羣馬皆空。英雄世用。只求建白。將軍甯不知作退一步想耶。彼秀全以草茅之士。挺而走險。窮蹙一隅。行將焉往。將軍窮而他徙。倘再不得志。甚非吾所敢言也。弟忝主軍戎。實專征伐。將軍或失志迷途。或回開覺岸。盡在今日。惟將軍圖之。達開覽書。顧左右曰。滌生深知我。然以天王爲草茅。下士輕之。昔漢高明太亦草澤英雄耳。且種族不辨。非丈夫也。亦作書答之。國藩兵退二十里。讓之行。遂折道入贛。敗沈葆楨。而拔南康。更進崇義。由是清兵披靡。無能當者。直搗湖南。湘撫駱秉章大恐。求援于胡林翼。鄂撫李續宜來救。達開大破之。續宜逃。輾轉乃入川。入川方謀創大業。聞秀全憂鬱已歿。清中興諸將復力戰江左。次第滅洪氏羽翼。達開知大事已不可爲。遂削髮入空門。不知所終。或云統三軍居深山中。號令森嚴。儼如小邦。或云後爲駱秉章所戮。

盧前曰。予幼時侍會祖母梁膝下。習聞洪楊時事。所知於達開者如此。稍長治史籍。未嘗不展卷而歎。天下甯有不和衷共濟而能成大事者耶。嗚乎。達開惜哉。絕世之英雄也。

自註

此文弱歲作。句未能潔。氣亦不揚。惟後幅尙見情趣。復以針對時事。故終存之。

陳鐸金鑾輯傳

陳鐸。字大聲。別號七一居士。睢甯伯文會孫。祖曰政。洪武初從征。驍勇過人。所向有功。累遷中府部督。一自下邳徙家南京。遂爲金陵人。鐸以將家子。官至指揮使。二嘗因衛事。謁魏國公府。徐公問是能詞曲之

陳鐸乎曰然問能唱乎鐸袖牙版高歌一曲公揮之去曰陳鐸金帶指揮不與朝廷作事牙版隨身何其卑也然用是鐸負當世詞名三都門宴集召教功度曲侑酒鐸指其疵或不服攬琵琶從座上快彈曲未竟諸弟子咸匍匐叩頭曰吾儕未會聞且見也乃尊之曰樂王請受業問餽不絕歲時黃琳元夜集角樂人富文堂鐸與徐霖稱上客琳曰今日之會舊詞非所用也鐸霖揮翰聯句甫畢一調令工肄習既成合而奏之遐邇傳爲盛事四鐸所作曲有秋碧樂府梨雲寄傲公餘漫興滑稽餘音詞則草堂餘意和草堂詩餘幾半五能兼樂章之敷腴清真之沈著漱玉之絳麗南渡作者非上駟不易方駕詞則往往爲人指摘一鐸掩百瑕而有餘也六其詞用意和平不務雕剜深入虞楊范揭之閫奧而漸登盛唐作者楷梯云七餘事爲畫山水傲啓南亦精絕八鐸多能才藝故最爲宗匠著於成弘之際九其後四十年有隴西金鑾者亦鐸之流亞也鑾字在衡號白嶼隨父官僑居金陵初學制畢業於天水胡世甫及南來年長家中落乃棄去習歌詞十嘗渡江同舟一人有饑色無渡錢代給飲食之後經眞州見其人以繩繫鐸訴曰得十二銖卽脫矣復如數與之旣至楚遇盜登舟已倒篋有呼者曰此我恩人金先生也奈何劫之亟還所掠十一鑾之義俠如此一日與盛仲交期於南高翁家天寒雪久之始至翁問曰君方有事娶婦胡能來鑾大笑指盃曰事孰有大於此者乎十二風雅之會金陵盛者三鑾執騷壇牛耳者再遂得爲詩人者宿十三所爲詩曰徙倚軒集論者謂多遠思別於長調十四或曰五七言近體風情朗潤譬諸斛角靈犀迎之游塵辟盡矣十五然詩終不如其曲蓋正嘉以來目徐霖後惟鑾爲知音十六其蕭爽齋樂府足以響振江南也十七較諸元賢彼以工勝此以趣合十八如陳鐸金鑾誠曲中之溫季也已盧前曰金陵當海宇承平之日才俊歛集風流弘長不獨大聲在衡以詞曲擅長也十九選勝徵歌命觴染翰山川文采互

相映發。極一時之盛矣。二十。今安在哉。

一。邳州志二。顏尚雜言三。金陵鎖事四。客座贅語五。諸山堂詞話六。蕙風詞話七。明詩綜八。列朝詩集九。蠓亭雜訂十。列朝詩集十一。明詩人小傳十二。進山談苑十三。明代帝里人文路十四。明詩綜十五。靜志居詩話十六。金陵鎖事十七。呂氏曲品十八。王氏曲律十九。錢謙益金陵社夕詩序二十。東山談苑。

楊夫人別傳

明正嘉中。南北曲之風大昌。而閨閣之以樂府名者。曰楊夫人。夫人諱峨。字秀眉。遂甯黃尚書珂第二女。正德辛未科。修撰新都楊慎妻也。慎之父廷和。與珂交舊。慎初娶於王。既前卒。歲戊寅。珂遂以夫人歸。慎於京師。閨門肅穆。慎敬憚之。嘉靖甲申。以議大禮忤旨。謫慎雲南永昌衛。後二年。迎夫人貶所。未幾。奔舅喪。還新都。自是夫人留於家。寓府西之榴閣。時有寄外之篇。爲時傳誦。慎處滇土者四十年。紀綱家務。賢夫人是賴。趙貞吉撰楊文忠墓碑記。謂夫人幾於楊氏。嬰曰。可以知其賢矣。廷和之喪。家人將斂。以禮夫人獨奪衆。志曰。舅忤旨。幸致仕。義當藁葬。使有中傷者。天威詎可測邪。既而世宗果遣使啓駭衆。乃服夫人見。晚歲嘗歸甯。兄子若榛欲奉游廣德寺。曰。寺爲名勝。姑自幼未至今。無游人請侍游。夫人曰。我雖老。固寡婦也。卒不行。隆慶己巳卒。夫人少慎十歲。後慎卒十年。年俱七十二也。子甯仁。側室曹出。孤姪有仁。夫人撫之有成。克世家學。廷和有樂府餘音。慎有陶情樂府。慎之弟慥。惇亦皆能曲。見玲瓏倡和。楊夫人樂府著錄。祁承燦澹生堂書目。并刻入飲虹簃曲刊。盧前曰。余過遂甯。訪夫人粧臺遺址。莫知其處。辛未游桂湖。問所謂榴閣者。老幹參天。與湖光相映。爲悵然久之。嘗語劉咸旂曰。夫人何其似李易安也。漱玉。

之集既以詞名於宋。夫人變其體而以曲爲有明聲家別子。皆天地扶輿之氣之所偏鍾也。獨夫人詩文散佚。求如易安金石錄序者已不可得。文字之顯晦。其果有贏縮之數與。

孝通陳先生別傳

繼篁墩汪氏而起。卓然爲江左大師者。曰可園陳先生。先生諱作霖。字雨生。江甯人。可園者。晚年所目署也。年十五。補博士弟子員。肄業尊鍾山兩書院。文名藉甚。光緒乙亥。舉於鄉。三上春官不第。乃絕意進取。慨然有著述之志。先是。縣莊程君折衷漢宋之爭。以講究心性。歸諸致用。爲吾鄉經學之始。咸同間。汪助教承其緒。獨遠於禮。偏重考據。先生與助教相抗行。以爲程朱之說。終不可廢。嘗賦詩云。際茲異學從衡日。共守宗經衛道心。是知其論學之旨矣。江甯自六朝以來。千五六百年。文物之盛。甲東南。旣屢更喪亂。蕩焉無存。先生旁搜博采。悉爲著錄。於鄉邦文獻。厥功偉焉。所著書曰可園叢書。都如千種。以庚申正月卒。年八十有四。卒之十七年。門人始私諡曰孝通先生。盧前曰。前見孝通先生才艸角時。迨少知學問。已不及親聲教。而吾鄉論經學。必首數先生。吾先君亦嘗受業焉。前生也。晚使得隨侍先君。摠衣奉教。則點哲之遺風可繼。而世或不廛稱其文辭於戲。豈非前之不幸也哉。

鄧石泉家傳

白沙鎮南八里黑石山顛。有中學曰聚奎。光緒辛巳始爲塾。改書院。肄學校。學風淳樸。聞海內。造士千萬。

人。巍然爲東蜀學府者。於是六十年矣。往在江南知聚奎久。知聚奎者。罔不知鄧蟾秋。禱仙二翁。前識二翁。然後知聚奎。實成自尊人石泉先生。爰舉聞於二翁者。作石泉先生傳。先生諱清漣。先世江西臨川人。高祖諱國安者。遷蜀。國安生世莖。世莖生天陽。四世。單傳。至先生始大宗。稱望族。先生生江北弋陽。觀溫家石壩。數歲就塾。家貧不能具束脩。母命學賈朱氏。朱氏業線。嘗嚴冬挽絲江上。手足龜裂。不敢言苦。少懈。六年。自營貿遷。行至白沙鎮。居之。淘沙金。日得如豆。會洪楊亂。道途梗阻。朝檄以川鹽濟民食。礙運以感。而先生用是起家。顧每以未竟學爲恨。乃延師課子。鶴鳴事師甚恭謹。師嘗語曰。君得富。予弟不讀書有成。曷克保。先生惕焉。有造學廣育之志。適江津縣遣諸生渡日本習師範。子鶴丹應選往。旣三年。歸爲言。日本政教禮俗。偶及衛生家言。人指端敗菌能致疾。先生故蓄指爪寸許。立剪之。自是日手廣益叢報。審世界大勢。慨然以八比文鴉片。女子纏足爲國三害。諄諄告人不憚煩。舉家婦女天足。一日得寶峯寺廢地。封植興學。命鶴鳴鶴翔主之。奠聚奎學校之基。鄉黨子弟咸樂來學。未幾。縣建中學。先生復捐三千金以成之。以宣統己酉卒。春秋九十有一。先生身魁偉。耳垂肩。鼻懸。聲洪鐘然。腰脚尤健。喜游。生丈夫子七。鶴鳴。戊子科舉人。官湖北知府。鶴翔。丁酉拔貢。辛亥首舉義川東者。鶴翹。業農。鶴駿。鶴年。業商。鶴年。蟾秋翁名鶴丹。邑庠生。卽禱仙翁也。今並爲聚奎學校校董。鶴雛。孫如干人。曾孫如干人。玄孫如干人。多著稱於時。盧前曰。禱仙翁又言。聚奎院中有牡丹。高五尺。父一日至。笑謂諸生曰。學校他時儻能如今日。花之榮歟。遺言在耳。不覺已六十年。於戲。先生之澤孔長。卽聚奎今日之榮。豈當日牡丹之足喻。前往來山中。見先生時所植松樟。上參天。飽風煙。歷歷心目間。不能忘也。

陸玄南傳

陸慶顥字玄南。以字行。世居金陵城東南。祖子銘。業織造。父詠黃。陸師曠路學堂學生。清季與同邑章梓丹徒趙聲奔走革命者也。玄南性堅毅。寡笑言。不畏艱險。遇事期必成。里人以為能肖其祖父。七歲從父之上海。始入小學。年十九。卒中學業。時已隸國民黨籍。考取上海商科大學。適北伐軍定江左。國民政府遷金陵。設政治工作人員養成所。玄南往受訓。其後隨軍任事。歷鄂豫湘而歸。供職立法院。民國二十年復入上海法政學院。二年補修大學課程。畢任溫州警備司令部軍法科長。未幾實業部召任勞工司事。然玄南自惟學未足。遂東渡。游早稻田大學研究院。習地方自治。二年二十五年還國。任中央黨部地方自治計劃委員會委員。明年七月。蘆溝橋變起。玄南展轉至漢口。結國民外交協會為反侵略運動。武漢撤退。隨赴重慶。與中央訓練團黨政班第二期。以三民主義青年團視察。戰地黨政委員會視察。兼南京市黨部執行委員。將深入賊中。陰結死士。謀殄逆渠。離間敵僞。無何。敵詞事發。繫獄。白餘日。刀鋸不懼。利誘不移。不屈不撓。卒慷慨就義。雨花臺。時民國二十九年十一月十九日。年三十二。廬前曰。玄南未嘗娶。陸氏五世單傳。至玄南而斬。玄南死。詠黃先生走重慶。不數年。亦病死。不及見。奏凱還都。親收玄南骨。移葬殉國處。地下有餘恨矣。前既建議。即永甯庵址為玄南樹碑。復為之傳。雨花台舊有宋楊忠襄墓。明方正學祠。今得玄南之碑。而三正氣壯山河。永千秋之祀。瞻抑所以報忠烈之士也夫。

陳覺五傳

玄南傳成里人傅丘平請曰。陸陳同其烈。又同日死。覺吾不可無傳。盧前曰。諾。於是作陳覺吾傳。

覺吾陳氏。初名嵩廉。字松年。儀容修偉。任俠尚義。世居聚寶門大油坊巷。父錦卿早逝。母潘守志撫孤。八歲使讀書。基督小學。升中學。畢業金陵大學。時民國十一年七月也。任商業中學教員。二年考取江蘇郵務局爲甲級郵務員。選派天津任職。在天津始隸國民黨籍。明年奔母喪南歸。孫傳芳方據金陵。捕黨人急。覺吾潛伏城南。陰結同志。國民革命軍北伐抵江左。嘗策動內應。縋城走迎第六師。國民政府旣建。軍事委員會政治訓練部設政治工作人員養成所。覺吾往受訓。十八年調任革命軍第一旅政治訓練處訓育科長。二十年改豫鄂皖剿匪總司令部黨政委員會黨務指導處指導員。二十三年爲軍需學校北平特別班訓育主任。盧溝橋變起。倉黃南下。未幾京師失守。覺吾身陷賊中。一家饑且寒。不得出。僞府立餌以官。不屈。私與韓葆華。馮魯瞻之徒相誓約。謀報敵情。效忠於國。典質衣物供所用。而甑釜生塵。不暇顧焉。二十八年以樞命爲南京市黨部執行委員。陽與僞黨部事。任書記長。自是陷區消息得上達。明年秋事洩。與陸玄南同繫僞獄。忍非刑。堅不少吐。共事者得跳免。而兩君以一日成仁。雨花台上。覺吾年四十二也。就戮前。獄官問遺言。索筆書曰。爲國爲友。更復何說。覺吾初無子。妻吳麗娟生三女。秀如。繼如玉如。遺腹得男。麗娟名曰福籌。寓復仇音義。

盧前曰。予舊家小膺府。與覺吾居相近。顧不相識。亦不知其爲吾鄉人也。因丘平言。始知君。丘平自渝州嘗以書讓君不去而之他。覺吾曰。南京百萬人。心不死。以我爲偷生之士。無所事於此耶。卒不去。死以成厥志。烏乎烈矣。

世母錢七十壽頌 并序

世母錢同邑孝廉河南大挑知縣子美先生次女。先生與先學政公爲文字交。因許爲冢孫婦。年十九歸我世父。世父以縣丞候補直隸。世母從焉。歷十餘年而歸。王父母先見背時。清命旣革。共和建國矣。不十年。世父歿於雒皋。世母年三十八。吾弟震京纔九歲也。震京旣卒業大學。治圖書館學。日有聞於時。妹震寰習師範。亦得成業。於是世母之心始稍足慰。及抗戰軍興。震京盡棄所有。奉母西遷。未幾。京師陷。故居燬。生事艱難甚。一家骨肉猶得時時聚。嘉陵江上。往來山館。就吾母話家常。不知身在萬里外也。所懷四十年之嗜。一旦屏除。曰。吾恐爲兒孫累耳。吾母則尤敬之。勝利之明年。舉家歸自蜀。十月二十七日。世母年七十矣。先期語吾母曰。冀兒負海內文章名。當文以壽我。吾平生惟以服艱未盡禮爲憾。他無負盧氏者。小子前敢不敍次節行。敬獻頌曰。

秉大節。令皎冰霜。去積滯。令毅如鋼。我有弟。令抗顧黃。理縹緲。令能顯揚。慶承平。令還故鄉。誦凱風。令上北堂。歌一章。令進千觴。

酈母孫太夫人五十壽言

震川有言。愛其人者必愛其人之親。愛其親者必願其壽考而康甯。余與酈子衡叔交最竺。過從且十年。衡叔治學。卓能自立。猶飲然以爲未足。所以策勵余者尤至。余往居蜀中。寄詩見懷。眎如兄弟。親厚於余者。蓋莫衡叔若也。衡叔十五失怙。太夫人教育成就。有凱風之劬。余登堂拜謁。太夫人必笑而慰問。以余

少孤。奔走衣食。天之困阨。衡叔與余者。固無以異。宜愛憐之深。然亦未嘗不以衡叔不妄交游爲可喜也。辛未秋。余主中州。衡叔書來。謂今年十一月望日。爲太夫人五十之慶。屬進一言。余維貽吾親以令名。卽所以致吾親於壽考。是在衡叔之自爲。余旣愛衡叔。以及其親。因書相勗。且爲太夫人壽。亦以見交親如余兩人者。不敢以浮辭進也。

新鄭高模堂昔奎表

新鄭城東一十里。有中和寨。同治間。皖匪亂。高君模堂築以與鄉人相保者也。君諱鑑。曾弱歲懋遷。有無東之潁。西之雒。中南至於湘潭。所億屢中。庸贍其家。餘則散諸戚鄰。光緒丁丑歲大饑。君行次南席鎮。有密縣人呂吾。病久。費斧絕。行粥其歸。君爲全之。南席人至今稱道不容口。新鄭城東自有寨。炊煙日益稠。寨之人多君義。君未嘗有德色。芒屨短褐。五十年如一日。年七十有一。以光緒戊戌九月卒。配石孺人。先君卒。繼配王孺人。丈夫子四人。瑤。石。玠。溫。瑩。王出。孫六人。振乾。秉乾。治國。安邦。安國。鳳池。鳳池。河南大學學生。君墓在寨西門外。將以壬申十月樹碣於墓。鳳池具狀來乞。表烏虜。荒山喬木。遺封巋然。前徽不泯。庶矜式於千年。

鄂陵陳旅長德馨殉國紀念碑

倭構釁之明年。夏七月。犯我武漢。與大戰廣濟之野。第三集團軍七十四師旅長陳君死之。君諱德馨。字唯吾。河南鄆陵人。少懷大志。恍於國勢。阽危。遂側身戎旅間。旣竟所學於西北軍學兵團。積戰功。洊升至

旅長卒殉國以遂厥志。時中華民國二十七年也。第三集團軍總司令孫公桐萱。迎君骨歸葬鄆陵。將樹碣里門。彰其忠烈。盧前以國民參政會來視察華北戰區。孫公舉以相屬。前何敢辭。乃爲之銘曰。燕趙間多奇士。褻革歸君之志。於戲國殤。萬古千秋此矜式。

白屋精華錄序

一代之詩有其體。而作者面目斯異焉。惟精思孤至。以天地之心爲心。始振拔於風氣之外。不苟與人同。民國肇造以來。承晚清緒餘。號於時曰西江詩派。舉天下詩人無以易之。獨亡友江津吳碧柳芳吉。自以其詩鳴。其詩誠如蘇子所謂不能不爲者。來風止雨。如印印泥。如水在器。是碧柳之詩。適自成其爲碧柳之詩也。遺詩凡十二卷。碧柳死之四年。實爲民國二十四年。周君光午既刊於長沙。又四年而抗戰軍興。海內識與不識。感國事之日亟。恨碧柳不及見也。而所以激發民氣者。莫碧柳之詩若。光午乃最錄爲白屋精華錄三卷。雖三卷而碧柳之神貌於是乎存。烏乎有唐四百年之詩。造端於陳伯玉子昂。使因碧柳詩。而有民國之詩。則碧柳詩又豈僅碧柳之詩已哉。

樸村詩集序

太行之東。黃流以北。三百里。其間有平原曰安陽。士生於其鄉。質樸篤實。敦厚多長者。余遊河洛。與其父老過從久。知其風俗之淳。而安陽少年往來余門者。亦多恭謹之士。察其笑貌。聞其語言。是能敬其長上。知其必善事其父兄於內者也。余接其人心。未嘗不爲動。而歎吾鄉子弟之不逮焉。劉生復午。從余遊。既

二年一日出。跡詩曰：樸村集者曰：此吾世父憲文先生之遺稿也。乞爲之序。余於詩誠無所知。然讀先生之詩。冲澹坦易。如見安陽之父老。意山川和淑之氣。有足以沾丐其文物者矣。先生家安陽之許樸村。故以地名。先生少時。以明經貢於朝。與當時勝流名宿遊。有鄴下七子之目。旣而宦遊東魯。所遇無以遂其志。浩然歸。辛亥以後。詩亦不復多作。以丙寅四月卒。年才五十有三。其後△年。猶子復午。始纂遺詩授之梓。詩世多解人。固不待余一言爲先生重。然余頗喜先生之有賢子弟也。復午英年孟晉。他日造詣詎可量。而緬懷先德。珍惜遺笥。卒使先生手澤流播人間。可嘉也已。因不辭。書是以爲敘。俾江左後生聞而勸也。

樂府新聲後序

元賢散曲選集有朝野新聲太平樂府。樂府新編陽春白雪。中州元氣。仙音妙選。曲海百一選。曲樂府羣珠。樂府羣玉。自然集。梨園按試樂府新聲諸書。太平樂府與陽春白雪。世所稱楊氏二選者也。有元原槩。雖不多見。世有翻本。得以流傳。中州元氣。以次七書。並見錢大昕補元史藝文志。明李開先韓小山小令跋中。亦嘗及仙音妙選。是在當時。其書猶存。羣玉爲范氏天一閣舊藏。迄今卷帙纍具。爲藝苑所珍。而羣珠無從得見。北海圖書館藏本。不出元人手。疑非其書已。餘則亡佚不復可考。於是元賢舊選。其能遺留至於今日者。舍楊氏二選。樂府羣玉。惟樂府新聲在耳。新聲都三卷。套數一卷。小令二卷。十年前得瞿氏鈔本。按所收曲文。多出他選外。然譌脫有不能句讀者。以較南陵徐氏景刻陽春白雪。烏程蔣氏所藏太平樂府。不相侔也。太平樂府有瞿氏藏明活字本。可以斟酌。而盜山館中所貯陽春白雪元殘本。又足以

補正徐刻之闕誤。獨樂府新聲爲海內孤本。無有旁證。昨歲讀曲涵芬樓。得見瞿氏原書。固迥非鈔本所及。然其子迹漫漶。不可究辨者。仍夥。今將影印問世。爰述其淵源如此。抑前於新聲更有說者。其所收多無名氏所作。且有獨見之體。自來言曲者。不外太和正音譜所列十五種。然重複已多。知自跋者。又每流於俳巧。如書中寨兒合兩曲。作兩人口吻。互相訐詰。詼詭之趣。善散曲所罕覩者也。茲編佳製作者之名。暨半闕失。而其詞固可傳也。然則元曲文章。又豈彼楊氏二選樂府羣玉者所能盡之與。乙亥五月盧前。

太平樂府後序

朝野新聲太平樂府九卷。元青城楊朝英澹齋集。涵芬樓四部叢刊本。據烏程蔣氏密韻樓藏元刻細字本。黃蕘圃跋謂休甯朱之赤藏書者是。蕘圃別藏有鈔本八卷。兩本脫誤相似。嘗取互校。多所訂正。然衍文譌字。觸目而是。不能句讀也。昔前在盍山館。得何夢華舊鈔本四冊。其第四冊後來鈔補者。前三冊皆據元刊校過。夢華自謂元刊本較鈔本缺略甚多。今以鈔本校元刊本。頗有出入。前案所據元刊校出之字。與元刊細字本異。使夢華鈔據一本。益以細字本。則此書元將已有三種板本矣。往霜厓先生爲太平樂府校記。深以未見明活字本爲憾。甲戌之冬。前讀曲涵芬樓。因海鹽張菊生丈。得見瞿氏鐵琴銅劍樓藏書。萬歷活字本太平樂府赫然在焉。書中且有孫唐卿校文。視黃何二校爲詳。於第九卷。發見脫文至八百餘字。前爲數日驚喜。乃合刻鈔與諸家校本。寫爲定本。歷時一歲。始卒厥業。後之治此書者。當不苦其漫漶。廢卷興歎已。民國二十四年冬。盧前真如村居記。

散曲選序

曲肇始金元之際。其原蓋出於詞。詞尚低徊要眇之致。曲以快顯爲勝。而辨務頭。襯裝字。爲律亦至嚴。其單調者曰小令。集多調以成套數。猶詞之有散詞。有聯章也。詞之興。初不過爲詩之附庸。多男女豔冶之詞。或雜隱逸山水。蘇辛有作。意境恢廣。迄乎宋季。而其體益尊。遂與詩同。祧騷雅矣。始者元好問。孟昉。王惲。吳鎮。倪瓚之爲曲。亦以附諸詞。自張養浩有休居自適之集。乃褻然離詞自立。一時作者。若劉秉忠。姚燧。盧摯。胡祇通。所制率淵淵大雅。如詞中歐范。韓邦靖。以關漢卿。姚美。司馬子長。李開先。稱喬吉。張可久。爲曲中李杜。而馬致遠最號宗匠。蓋至至元之時。大家輩出。如詞家之興於元祐。亦云盛矣。及明隆萬間。曲家競聲歌。不重文辭。節奏雖繁複。而其境轉日以隘。清初惟朱彝尊。厲鶚。號爲追蹤喬張。猶未能盡令法度。若毛瑩。沈謙。輩益無足數。以視詞之墮於元末。豈非異道而同病哉。然詞自張惠言選本行世。清季之作。遂以上攀兩宋。曲之衰。至於今三百年矣。而突奧未闢。入室莫由。用是發憤。第錄小令套數爲二卷。復別正襯。明規律。藉示塗轍。俾足遵循。余之不敏。詎能爲曲重拓疆土。以與詩詞競爽。亦庶其不乖於惠言之旨云爾。

太平麀序

元人雜劇以四折爲例。其有一折一事者。惟王生蘭棋闖局。迄明中葉。一二折劇始興。徐渭四聲猿出。而後四題一本。遂成風尚。清初稽永仁續離騷。洪昇四嬋娟。皆青籐法乳也。獨來集之秋風三疊。與四題者異。折數三。體製純。視南北雜糅。不可同日語。然步武之者。竊嘗疑焉。吾友孫子雨廷近有太平麀之作。以三劇分寫侯度。陳義貞。李秀成事。爲仙呂。中呂。雙調。三北套數。以示前。且屬一言。憶前與雨廷論交弱。

歲前同侍霜厓先生於南雍。雨廷博聞強記。才情颯舉。初不甚厓意。於是而此劇之成。乃在拔木破山。倒江翻海。血戰玄黃。風雨如晦。二十年後。如今日者。旨意之深。氣勢之隆。又非集之之徒所得而比肩。石已旅歲出桂林。讀雨廷巴山樵唱。流聲綿密。以爲小山則明之倫。而太平巖者。振鬣長鳴。橫天雕鷲。庶幾乎近宮馬矣。前承霜厓先生遺志。剋社嘉陵江上。按譜試聲。期存元明舊樂於一縷。願更以太平巖陳諸紅氍毹間。雨廷其樂許之與。

孫氏先世事略序

儒家言治平必始於身家。古無謂社會者。家猶社會。不齊則世亂。諸夏禦頑倭而戰者。旣七年。吾舅氏富平公且七十矣。懷他日子孫或有忘本懼。乃敘次金陵全福巷孫氏先世事略爲一編。自新都以郵抵前行在。曰削稿。愬不備。甥其爲我潤色之。願更揭治家要言告來者。昭盛衰之故。俾知所做惕。其義不尤鉅且切耶。前於孫氏出也。敢不奉舅氏命。雖然。前言奚足爲世重。所舉亦不過四十年間。聞見於吾母萬一。吾母之高會以上。因洪楊兵燹。譜失不可詳考。惟知遷徙從皖。歛來居南門外思古巷而已。祖輩五支。劫後廬存長次。始居全福巷。積漸成巨室。吾母年二十一歸盧氏。六年而前生。猶及見先外叔曾王父。暨外王父兄弟四人。泊觀察公。絳縣公先後通籍。孫氏一時稱邑中望族。而一門之內。孝友肅穆。日出作。日入息。書聲與紡聲相間。必勤必儉。無異寒素。日前兒時。隨母歸甯。猶記晨餐進紅蘿蔔乾。佐蠶糲。清甘有餘味焉。先是先府君遊外王父之門。旣昏。又與富平公同年采芹入泮水。公。吾母之同懷兄也。未幾外王父卒。先府君與公皆授徒鄉里。外王母時往來吾家。慈祥仁和。惠愛及僮僕。老嗜飲。惟見人爲葉子戲。輒不憚。

以其能廢事。燈下絮絮談家常。引論孟語如夙誦。前由今思之。歷歷猶昨日事耳。吾母嘗恨外王母不遠舅氏百里之養。自舅氏宰下邳。遷陝西富平。任富平久。政績在人口。僉曰。令之仁者。殆有所稟受而然也。先府君盛年不祿。吾母之所以教前兄弟者。亦多秉先外王母之訓。吾母六十壽。吳興戴傳賢詩有云。威衰閱五世。一手持門闈。孝慈兩無愧。所歷何其艱。知者以爲實錄。而三原于右任。媿諸郭泰母。今國府主席蔣公榜曰。壽考宜家。顧前無似。違難以來。參知大政。未能稍有建樹。未嘗不太息國事之壞。實由於士夫之家不能齊。而家所不能齊。實由於世風之日趨奢惰。孰謂母良妻賢不關乎治亂耶。是吾外家數十年門庭之感。自世俗人觀之。或以繫於科第仕履。前獨不能忘諸外王母德。斯家之本。又孰謂儒家言治爲迂闊論哉。今戰禍烈於洪楊千百。使謀諸夏中興。探本窮源。在能重建家室。一新社會。如之何而後可。則無違孝友。造端乎勤儉。即當日吾外家可以爲鑑。然則此一編者。豈特裨益孫氏子孫。知繼開之業。艱難於締造。亦於以覘國家大下得失。隆替也歟。民國三十四年一月二十六日外甥盧前敬序。

壽庵詩存序

壽庵詩存二卷。魯齋程丈之遺也。庚辰十月。寫入峽後所爲詩二百數十首。督前刪定。且索序。顧未暇以爲。明年四月九日。遽以疾謝賓客於白沙。歿之四年。我受倭降。又一年。得奏凱還都。既還都一年。歲丁亥。閏二月。守澤兄弟始敬謹迎視歸金陵。葬有日矣。將其遺詩而促序於前。烏乎。前何意。至今日始得敘吾魯丈詩耶。而萬里流亡。閭闔墳尾。江樓風雨。剪燈共話。舊事如在目前。雖兩家老幼。重返家園。江淮烽燧。一時復起。凡卷中之所詠歎。未嘗因時異而稍移。此誠家國之不幸。亦丈當日所未及料者也。丈前之父。

執識前童子時。又申之以姻好。前之妹歸爲守澤婦。且二十年。丁丑戰起。守澤奉祖母。母夫人循江西進。丈佐泰縣政。獨東留。兩家集武漢。再會于岷左。兩年泰縣陷。丈脫身西走。時共前家賃居白沙之月亮井。詩率多作於是時。然境歷艱屯。而怨苦之詞。至少於時。教育部設大學先修班。驢溪上求名師於前。遂以丈應。爲諸生講授文史。咸歡悅受教。丈少以博士弟子。研求理化於兩江。優級師範。民國初任江蘇省立第八師範校長。久。晚始輔翼吏治。非其志也。丈初不甚爲詩。既遭喪亂。始肆意爲之。然每自恨其晚習。益劬。卒成稿兩卷。以遺子孫。雖語多自道。聞見。道路流離。竄身巖穴。何莫非戰史之資乎。烏乎。前何意至今日。始得敘吾魯丈之詩。而哀鴻遍野。戰火蔽天。都如當日。則壽庵詩存至二卷而止。又爲丈之不及見。矣。

贈馬敏中先生序

昔柳子厚送豆盧膺南遊曰。君子病無乎內而餘乎外。有乎內而不飾乎外者。求諸今世。無乎內而飾乎外者衆矣。不飾乎外而有乎內者。不數數見。斯君子有不勝其病者。余交平陽馬星野久。因星野而識其尊人敏中先生。先生蓋內之有者也。先生父蓮屏府君。生先生兄弟五。先生居四。伯兄筱屏負才未顯。嚴以課弟。於是先生得未冠補博士弟子家貧。不廢讀。卒成業於溫州師範講習所。瑞安孫徵君所勸者也。徵君博學有大名於時。先生執經問難。契焉有獲。又請業邑中名宿劉厚莊明經。余嘗讀先生歌詩。冲和淵雅。粹然儒者之度。知非深於學養不能也。年二十二娶於吳。夫人將于歸。累日風雨。積潦盈塗。及期放晴。鄉人以下。其昌之兆。自是二十年間。先生教學鄉里。不事生人產。顧事畜之資。無闕。庸知夫人之賢。丈

夫子一卽星野。女子子五。新權榮權秀權金權已婚。均權字吳君俊才。抗倭之役。各有所樹立。報國家。勝利之明年。星野迎養來京。近京畿諸名勝。時見星野。撰杖遨遊其間。怡怡如也。先生有吟詠。必寄示。或坐疇人中。默不多言。而靄然可親。近夫人則皈依於佛。慈護孫雛。顯而笑樂。夫然後知先生平日所充諸內者。足而飾于外者。亦豐不可及。星野夙爲儕輩重於焉。知其所自。而積德得以碩大厥宗者。抑亦信而有徵也已。先生自喜向平願了。承平再睹。行還平陽。余乃誦子厚所語於豆盧生者。先生其首肯之乎。

南北詞簡譜跋

右南北詞簡譜十卷。吾師長洲吳先生撰。草創始庚申歲。訖辛未削藁。歷十年而成者也。今年春正。先生既次第生平撰述。都如干卷。馳函告前行都。以爲敬禮身後之託。曰。往坊間所出版諸書。聽其自生自滅。可也。惟南北譜爲治曲者必需。此則必待付刻者。未幾。先生捐館舍。滇南前以參知大政。不得奔赴。哲嗣汴王安窳。夢己抱遺稿飛航北來。前涕泣接受。以播遷靡定。懼一日湮沒。乃授之梓。而跋於後。曰。曲之有譜。蓋自明始。元鍾嗣成。賈仲名。正續錄。鬼簿。但著錄書目。作者不及牌調。周德清。中原音韻。作詞十法。雖附小令定核。塵四十首。牌調未全。亦不詳套式。自甯獻王朱權。太和正音譜。作。而後言北詞。始有準繩。然借宮之法。增句之體。顧猶未能備且明也。程明善。嘯餘譜。張孟奇。北雅。范文若。博山堂曲譜。互相因襲。少有獨見。至清李玉。北詞廣正譜。出。稍可觀。惟正觀。分別尙多紊亂。南詞初有蔣孝九宮譜。後有沈璟。南曲譜。板式參差。莫衷一是。近年發見。鈕匪石。九宮正始。東山鈞。雙九宮譜。定。及前所藏。明末寫本。南九宮大全譜。先生所謂沈氏新譜之藍本者。惟集曲較備而已。世所推重之。呂士雄。南詞定律。莊親王。九宮大成。

譜雖裨益歌脣。無關於作者。先生竭畢生之力。梳爬搜剔。獨下論斷。舊譜疑滯。悉爲掃除。不獨樹歌場之規範。亦立示文苑以楷則。功遠邁於萬樹詞律。宜先生之自矜重其書如此。而前所以謹守遺命。不敢忘矣。抑前有說者。北詞卷中。先生論公篇爲上篇之譌。同門任訥則謂是袞遍省文。而前主仍原稱。以公有一小二義。次章必換頭於小之義通。又昔賢於上平相假之理。輒莫能明。案四聲中平去入一呼。卽得其聲。惟上以平延聲而亢。省所延之聲。則爲平也。故應作上者。往往亦以平代之。前近主講南雍。偶得其解。惜已不及得先生之是正矣。爰亞附存之。以俟來哲。民國二十八年雙十節金陵受業盧前敬記。

題劉鑑泉手札

始余游蜀。識吳君碧柳於榆州。於成都交唐君迪風。最後得劉君鑑泉。鑑泉名咸忻。別號宥齋。雙流縣人。乾隆間。大儒槐軒先生第二十四孫也。時余居上南街文廟後。去君家不數武。而君所主尚友書塾。與其家衡宇相望。以是日相見。以爲常。風雨之夕。一尊在手。未嘗三更歸。君或來眎余。必攜一小童。掌燈前導。行絮語窮夜。童倦臥於外。鼾聲與談笑聲相和也。自余出游四方。平生直諒多聞之友。竺愛相親。蓋莫鑑泉若者矣。余嗜飲。往往醉。醉好議論短長。輒取咎於人。君獨諒焉。還憶辛未正月初四日。君偕迪風邀余游西城支磯石園。歸赴長歌。有曰。多言騰舌固可恥。口尚不言心必無。天生我口將何用。安能唯唯隨庸衆。可以見其人也。烏乎。余出蜀不二年。迪風碧柳相繼歿。天不憖遺。鑑泉又從此逝矣。鑑泉之歿。二十一年九月九日。中秋前六日也。遺著推十書數百卷。孤三人俱幼。余旣出其遺札。裝幀成帙。爲之題記。從尋舊事。猶髣髴江干送別。戀戀不忍去時也。

題半瓢詞集

周生禮從遊之歲。習爲小詞。得二晏風致。別幾十年。余隨亡居蜀。而禮流轉嶺表。心神飛越於風雲之會。一洗蕪澤舊習。漸成鞞鞞音響。於時余有中興鼓吹之作。世方指目稼軒之續。稱曰鼓吹派。衆競效之。余與禮久不通問。然今讀其數年間詞。亦此中人語也。其闔合邪。抑有同感。而然邪。何其相類也。笙磬聲同。是誠余前軍之勁旅矣。顧世局日寬。詞境益狹。微余輩而詞垂絕。願禮無廢厥業。則繼半瓢集而作者。必能蔚然自成一家之言。

廿前詩存



作者十歲時照像

虎跑寺 己未

東挹五雲青。西連三竺路。鬱鬱四山中。虎跑向何處。

板橋行 庚申

春去王孫夢老。春來帝子魂銷。七十二家芳草。不知何處長橋。

江上聽雨

掌中幾醉白雲盃。得月樓臺打掃開。一夜鷓聲花落後。隔簾烟雨渡江來。

去日 癸亥

去日歡情倩夢扶。三生花草認江湖。疎烟細雨愁如海。帽影鞭絲淚似珠。謾道揚州留杜牧。誰知陌上是羅敷。南橋畫閣休重問。怕聽枝頭喚鷓鴣。

綺年

綺年都付夢中思。那有閒情對酒卮。記得相逢攜手去。和他無語並肩時。生憎燭影搖簾影。底事憐伊倒負伊。重向舊廂風月過。更無人賦怨春詞。

擬子夜歌 四首

妾是滄浪水。郎是珊瑚樹。生小識郎家。怕過橫塘路。
妾是燕支峯。郎是峨眉雪。千峯積雪多。便是同心結。
妾是驪龍珠。郎是藍田玉。珠玉飛九天。相逢殊不惡。
妾是陌上花。郎是花間蝶。飛去又飛來。不離花生活。

掃葉樓

此地清涼望莫愁。霜楓點染白蘋洲。石頭蕭瑟人歸去。秋到寒山掃葉樓。

秦淮舟中聯句

烟波淡蕩搖碧空。吳霜匝師朱樓兩岸倒影重。中有美人歌子夜。周雁石四條絃子生春風。尊前亦有傷心事。王玉章瞿然一杵南朝鐘。長橋吹雨溼衣袂。東天民迴船打槳殊匆匆。我來客散青溪曲。陸維釗關城晚靄微茫中。高吟對酒蒼龍咽。王西徵拔劍起舞飛長虹。年年灑盡滄洲淚。孫雨廷彈上征衫總不紅。

媚香樓與湘眞閣。盧前秦淮軼事多珍叢。而今冷落江南路。趙孟里獨跨疲驢弔故宮。霜厓師

贈同塵 甲子

苦榴老子文章伯。落拓風流世所師。大澤龍蛇逢劫後。中原螻蟻弄兵時。腰橫干莫人何在。指點幽燕馬
又遲。我亦傷心年少客。蒼茫獨立自吟詩。

甲子中秋江左多事風聲鶴淚草木皆兵金陵殆不

可居矣

我亦遼陽鶴。山河舉目非。淚流花比瘦。血染葉增肥。烽火連天碧。旌旗映日輝。故鄉留不得。空見白雲飛。

迢遙 二首

迢遙何處望南樓。小飲三杯未散愁。記得浣花詩句好。醉鄉前路莫回頭。
客中落莫故矜持。醇酒無妨飲一卮。總覺鄉情消不盡。瓦絲燈下坐多時。

歲將暮矣上海久不得家書

日月逝兮不可還。歲將暮兮風雪寒。滿地干戈行路難。故鄉不見兮淚洑瀾。

卅前詩選

夜過故宅 乙丑



作者十二歲時照像

春星耿耿街鼓歇。秉燭敲門過故里。麥麵一盂山筍肉。笑煞吾家三妹子。年來健飯況痛飲。往往酣熟驚呼起。挂夢平生望鶴岡。鄰寺鐘聲猶在耳。垂髫兄弟羅庭前。抓棗索糖各自喜。勞勞南北可憐人。回頭多少淒涼事。不飲已醉早停盃。揮毫淚上桃花紙。

雨後過陳繩其祖同可園

小窗一夜雨。簾滄修篁翠。披衣坐迴廊。靜數餘滴墜。故人縈夢魂。一晤尙能致。三復袖中書。瓊琚何限意。戰伐年復年。相見殊非易。相攜沽美酒。謀共千日醉。

秦淮記事用放翁均 丙寅

白衣買醉當壚側。凌波仙子肌如雪。落花風裏酒家眠。一杯邀得團團月。輾轉客枕夢難成。隔江風傳後庭聲。明朝負手秦淮岸。羈愁旅思不能平。何如一笑飄然去。九曲清溪芳草路。回首紅樓第幾家。初陽漸上門前樹。

伯諦南下約而未見寫此相報

踏雨敲門未得見。七日不能謀一面。草草勞人僕僕風。嘆君迹似秋前燕。記得前歲客江鄉。西窗翦燭論文章。七言五言貪琢句。三鼓四鼓從商量。有時沽酒來就我。阿爺見之笑曰可。撚髭走筆和諸子。詩就呼僮出瓜果。今年君又來江南。孤兒落拓夫何言。有酒不妨更一醉。問君明日秋雲屯。

一醫

一醫在八日。足爲泰山礙。窺之自鏡中。須彌存一芥。勞勞塵世事。奚足論成敗。人在六合中。理居三界外。一沙一天國。一花一世界。果然脫是非。不徒耳目快。我讀濮克詩。浩歌慷以慨。

夢清悚

昨宵忽見北海李。短髮鬚髻眎我笑。問君別後樂何如。君言近得山居妙。讀書誨人兩不倦。閒來便至東山廟。搢衣更上廟後山。負手危厓一長嘯。因思爾我在總角。竹馬里中逐年少。荏苒身世同飄萍。舊夢重温雜啼笑。去年挾策走江北。故山千里無夢到。思君真待久生癭。疏懶偏無青鳥報。微聞不日當遣歸。相約婁湖同一釣。寤語模糊待君答。回頭倏不見君貌。起時紅日已三竿。噪耳不是晨鷄叫。

聞沫若至兼懷慕韓 丁卯

羣盜硬刀躍馬日。東海飄零幾少年。仿吾成癩猶與達夫郁。文狂就中郭子何翩翩。美麗海上酒家之夜。

送梁大曾秋。舊雨新歡雜管弦。年年事事壓枕夢。過眼烟雲散盃前。靜安寺畔遇慕韓。曾琦文采風流亦
斐然。壽昌田漢招我我未至。寤寐於今見數子。來往黃浦江上風。愛牟獨有裴倫志。環龍路口故人居。兒
啼索飯囊如水。膏袂長征嶺之南。一日聲名噪鵲起。愚公載筆醒獅歌。獅不醒兮徒奈何。東山同灑蒼生
淚。攘臂胡爲意氣多。不見中原春色好。聞雞共舞魯陽戈。黑頭袖手神州客。危涕攜將竟日哦。

兒病

兒病不索乳。母睡不解衣。雙眉鎖淚雨。朝朝望我歸。憶昔在襁褓。吾母亦如之。望我我已歸。父歸將何時。

觀海

觀海終難忘。驚濤過眼明。排人前後浪。閱世短長聲。壺亦千金值。水無一勺清。弄潮應有信。地上或渠成。

秋星

我最愛秋星。所愛殊有旨。三月習呀呀。見之無侈侈。露齒對之笑。彼亦笑欲起。嬰兒爛漫姿。其技止乎此。
吾家小麗生。癡憨頗相似。顧所謂大人。頑鈍殊足恥。時光不倒流。此恨無窮已。羨爾天所驕。儼若天之使。
問是誰家子。其父鄱陽李。

悠悠吟 戊辰

東山曰麻姑。曉日來補鰲峯隙。北山曰敬亭。暮霞割斷陵陽脊。雙塔風。雙橋月。其間猶有逃名客。而今若

箇文章伯。悠悠坐對庭前柏。

鳳陽得珥妹書 己巳

在家日久望遠出。既出家門念轉篤。客邸家書紙幾張。萬遍千回看不足。一言兩言細端詳。一字兩字誦反復。昨日小妹書中說。慧嫂近來病雙目。年生戀乳麗生瘦。枕邊不覺淚簌簌。遂知父母待兒恩。山海難於擬骨肉。此時老母坐床頭。慰熄抱孫定忙碌。難尋好夢渡長江。扶頭猶對燈光綠。

江上 庚午

依依飄影去匆匆。楚尾吳頭望眼中。休向船邊閒負手。闌干以外一江風。

三日鑑泉偕其甥李孝侯來約遊南郊 辛未

近春入歲既三朝。籠袖獨爲石室守。伴報劉四先生來。翻然挾我南關走。軋軋雞車上下坡。如龍之馬小於狗。誰家女兒新衣裳。緩緩陌上雙攜手。誰家老翁扶孫行。遙指紅牆笑開口。森森古柏武侯祠。巋然惠陵居其後。殿堦多少留客處。一盤捧雞一壺酒。登堂肅像扇與巾。如此衣冠當不朽。上堂欲拜兩廡雄。蓬高過人障所有。出門一嘯天地寬。敗柳荒郊惘惘久。

五月十三夜偕鑑泉柏榮孝侯遊桂湖坐翼然亭作

玉女與瞿塘。一一飽眼福。新來領此湖。相並誇鼎足。坐夜翼然亭。荷衣奪碧綠。添我滿衿涼。酒邊但遊目。

親人雲際月繞桂亦有屋永言楊公堂拳拳夙所服齊眉遠郡黃不讓易安獨倡和有墟篋曠代誰能續
長歎且引觴愁深沁入骨李侯謂我癡二劉愛我篤花外一鵲啼何爲雜歌哭

游飛媚詩

待曉嘉州發我眉此去攀界天青一線仰不辨烟鬢漸近摧雲氣衝寒金頂彎四竿三渡水懽喜溢朱顏
甘口豆花飯蘇溪桂樹間朝陽洞上望倦鳥未知還
萬綠不遮大青山一角補迎帽寫琴泉避人跳離鼠樹多不知名路遠不可數迴環將入雲意有神仙住
策杖試身輕踏葉親聞步回視普安橋一一迷煙霧
齋堂飯旣罷欹枕共清話建哉謝與崔不欲留山下計造峯之顛峯高風亦大我持體世心登臨竊恐怕
侵晨各分手兩翁速其駕萬年循左行踽踽漸入畫
九歲小沙彌果成是其字導我從東行宛延不三里瓊珠響幽澗无量殿已至坐堦奕純陽此際渺何世
探巢鳥卵危收拾殊多事竹風吹回晚言歸伏虎寺
竊然聖注師相見成莫逆得天信獨厚願乞十方力我曰胡不東宜黃猶可卽而師索我詩留以光寺壁
故實重泚山前也無其筆意故未能却爲師發所閱

還家

都下逢初伏歸來喜可知白添母兩鬢青鑲婦雙眉坐對無言久相看忽淚垂岷峨萬里路到此夢還疑

金梁雜詩

荒城暮色動清笳。秋到金梁第幾家。飯罷支筇無一事。獨憐眉月媚於花。
慷慨還聽趙女歌。岷源却不似黃河。夜來一杵鐘聲遠。夢別峨眉二月多。
不會人言雙燕還。故宮春盡小亭閒。杏花零落師師老。淚眼東南無數山。
中原絃索壓歌場。樂府何年起憲王。祇有潘楊湖上柳。不隨孺子倚新粧。

夢文通

少城閒步亦當時。曉晚迎春酒幾卮。花外相看無一語。小橋綠柳映須眉。

吳碧柳 芳吉 挽詩

論交四海內。白屋獨殊姿。遯世從偷活。草堂自本師。悲天勞淚眼。知己屬蛾眉。巴水東流夜。人間唱竹枝。

中秋味蕪樓待月不至

貰酒迎秋夕。危樓待月生。魚鱗搖片玉。蛾羽撲孤檠。淚濕闌成賦。心傷五國城。應憐人事。不向此間明。

小詩和文通 壬申

騷心吹不息。翦燭照清秋。多少幽燕夢。今宵到汴州。

送楊吾隨節蒙古

十年不相見。萬里壯長征。成吉思何在。賀蘭山未平。自從亡屬國。虜已逼神京。草底牛羊動。知君涕泗橫。

展香山墓因憶沅花草堂之游 癸酉

昔年曾過草堂寺。舍北舍南春水生。今日獨來居士墓。當門天闕尚崢嶸。

許公武農隱園圖

公武將軍將而儒。短髭修幹貌清癯。胸中故有萬卷書。抱琴與鶴安以舒。來從入境結茆廬。好花如海衆香敷。窗下常攜酒一壺。左經右史足自愉。有時客來坐四隅。儘言騰笑無束拘。於時將軍一長吁。京洛緇塵倦矣余。看山種樹千百株。不如還向湖上居。袖中出示農隱圖。芒屨布褐意如如。於虜將軍聖人徒。用之舍之道有諸。我欲題詩一字無。展圖乃欲林下趨。

闡中初校分得六十七卷頗有佳作

磨鼻多生意。吾匪賴女張。文心杼錦繡。筆陳出堂皇。開國期椽運。衡文媿尺量。華林新館在。他日說槐黃。

重九集掃葉樓上散原文

故鄉別六年。夢繞盃山右。鬱鬱山下松。經霜不老瘦。咫尺掃葉樓。半畝留遺構。當窗酒一觥。兀坐至下漏。

祭詩與挑菜勝事已難究。高會集茲日。訪古情獨厚。上坐陳天子。文章推老宿。別亦六年多。鬢髮尚如舊。一語徧高層。神明天所授。搔爬隔痛癢。目恨才力匱。方知名山業。操觚匪急就。願誦龍標詩。茱萸插髻壽。

感逝四首

開國文章期我輩。發揮忠愛幾人詩。魂歸應化遼陽鶴。愛晚亭前唱楚辭。

吳碧柳

遊戲人天孰本師。等身述造儻張眉。願將前世黃冠業。證與青羊老道知。

劉鑿泉

歸帆迢遞路三千。抵掌高談決百川。地下有知當不忘。青神燈火一漁船。

唐迪風

等似萍浮最可哀。是非身後亦塵埃。舊時淮水東邊月。曾照行吟側帽來。

朱子沅

北都歸後重過玄武湖作

甲戌

去年重九登掃葉。今年北游正三月。元武打漿我未歸。孤負瓊春花如雪。湖中鍾阜如盆供。水底觀山更奇絕。卸裝已過上巳天。詠覽難入衆仙列。驅車獨過後湖邊。繞堤尚有柳千結。懸竹曹子侯官黃。俛仰當前興不竭。豈必歸塗蝙蝠飛。新詩定許我心折。見湖有若見故人。朗吟補我襍游缺。

揚州和榆生

扶醉重過香影廊。十年夢不到雷塘。拱宸門外悠悠水。容我扁舟一日狂。北郭尋春岸草青。柳陰深處且消停。一篙撐出虹橋雨。濕響風鈴不忍聽。

寄懷衆異匡廬次饒蘅均

梁鵠題詩壯北湖。却憐單舸近來無。覆盃未覺鄉原異。隔水旋驚物候殊。落橡滿山纔托命。好書奪眼古爲徒。舊時酒社都雲散。相約銜茅儻可圖。

兆豐園與蔣蘇盦李仲乾黃駒庵偕游

滄翠杉松草自齊。意行閒過小橋西。虛闌膽對蘆花老。殘世平看夕照低。醉裏放歌消白日。年時有夢到青谿。相逢失喜秋仍在。未覺橫空北雁啼。

謁父執隨爵三進士時方南歸

小樓一片月。照我十年心。父執承相問。孤兒感獨深。遺經終在抱。稚弟尙同衾。共仰趨庭日。沉哀直到今。歸來還是客。畢竟亂離前。腸或因時熱。貧能助志堅。寸心持母訓。懸眼望堯年。巖谷宜予置。天風幾海田。

衆異寄示春雪詩次韵富之

抱瓮朝朝酒不空。未須一枕受仙翁。閉門支影知何世。懷刺生毛大可風。亂眼凍枝搖戶外。托身枯樹亦泥中。元知時難無從免。翻笑鴟娘祝歲豐。

南徐雜詩

幾日春寒染綠蕪。雨餘相約下南徐。棟花風裏城西路。側帽年時著酒徒。

蕭寺鐘聲漸不聞。沉沉萬綠綴山雲。尋春合向南郊住。會有聽鶡戴隱君。招隱寺

策杖重來又一年。花前拄頰思茫然。竹林零落游人少。讓我山堂自在眠。竹林寺

經樓分手各西東。欲覓闍黎問舊蹤。說到兒時無賴事。碧桃還共夕陽紅。魚山別二十年矣

臨江北固賸危樓。濺雪春潮幾白頭。年少雄於跳浪虎。眼中何物是曹劉。北固樓

疆裁詩句答殘春。失喜相逢蘊藉人。筆意差能隨日健。却憐春已托埃塵。歸途似清涼

京口春游次荆公西太一詩均

柳下如盤月大。望中燈火春酣。一舸夷猶湖上。去年曾過淮南。

倦矣天涯驛旅。幾回夢到邨西。門外千株楊柳。歸來燕子悽迷。吾家本丹徒。祠墓在千顆柳村。余數過京

口迄未得往。

望衡叔南歸久不得訊

淮上初成別。青州夢繞之。短髭撚更少。黔突苦難辭。衽席安何世。流離定有詩。歸應先夏至。早報故人知。

淮榭詩和衆異

宋梁未享百年祚。醜毒山川漫得名。靡扇纔過桃葉渡。降幡又出石頭城。蘭橈政目關興廢。藕孔何堪託死生。嗚咽樓前衣帶水。繁華流盡不成聲。

問禮亭詩以禮運章分韻得疾字

世亂如人病膏肓。不醫何由起廢疾。醫國良方在六經。經旨惟禮不可失。永明一片石猶存。我嘗訪之游。雒日云昔夫子過柱下。就聘問禮興周室。國之四維禮冠首。大小戴記有完帙。孝園淵源出家學。見此儒道喜同術。是年移載向南都。樹立華林館之側。它時邳治躋成康。請眎此亭與此石。

次韵送榆生南游兼呈映庵拔可躬庵

瓦石能含亦子師。高吟風雨志姑持。從教衰世紛千變。不廢初心曜二離。寄語朋尊期歲晚。隨緣物象待春滋。此行願入三摩地。過嶺還添水調詞。

冊前詩選

為爰居閣題漁洋手稿二絕句 乙亥



作者三十三歲時畫像

抱冰詩論主清奇。老去新城信有之。出手何嘗輸北宋。寒廬夜雨獨吟時。

鬼伯瑜珈盡異端。揚波誰復挽狂瀾。後生莫擬桐城派。早有蓮洋與古歡。

杭州

莫對杭州說汴州。和非至計戰無謀。滿城猶帶中原語。誰與潘楊辨濁流。汴中有潘楊湖。土人以水清濁。則興衰。

游靈隱經花港不入

路入橋南樹漸疏。玉泉過了未停車。勞勞轉作回頭笑。非子安知不識魚。

夜游北湖

暗中失去欽天閣。纔到菱洲向四更。寂寂湖山已沈睡。星星燈火尙能明。懸知荷蓋擎無力。斗覺蚊雷聚作聲。剩有摩胸飛動意。不因風歛穀紋平。

呈映庵兼寄駒庵青島

丙子

三年海上住。俛仰已成世。交游幾人在。矐我翁爲最。翁性夙敦厚。於詩得真味。或曰此宛陵。所擬甚無謂。吐語要自出。何必託漢魏。詩好未足多。詩人雅難致。問誰識連城。世乃重排比。堂堂忍古樓。我欲彰其義。所以挾詩心。故不在文字。隔海黃駒庵。聞言倘予勵。

過松江 丁丑

塔影依依入我眼。我心匪石不可卷。當年側帽下雲間。撰杖承懽日遊衍。醉白池與陳公祠。壁間題滿父子詩。豈意流竄有今日。車輪腹轉首低垂。

于湖雜詩

青山埋得淳風骨。一廛爲氓百事安。說與慈親開口笑。于湖許作武陵看。八月二十八日移家于湖。江左流人比戶居。前王後冷論。醉餽參戎作字兼。張旭主計雄譚笑。惠魚賃居羅家閘。與鄉人王禹莊冷。羅黎樂共晨夕。

故人楊李幾回還。肯傍陶塘看緒山。百畝碧荷零落盡。豈知身在亂離間。時僧清悚家路大。花園茗坐。

對酒攤書了一秋。蟲窗日日苦埋頭。叩扉知是倪天子。蹋雨東門挾我游。倪健飛校長時相遇。從
舊時小步荒榛。痛今日環城廣道開。金馬門前咫尺地。滄桑都到眼中來。重過儒林街
曳杖秋陰一款扉。憩園花木潤山衣。沉冥天也知人意。放肯斜陽送客歸。訪謝无量不值
无酒而歌口愈饒。階牆招我共盃街。大晚高論王調父。翹指談詩更不凡。戲贈王調甫
迢遞潭州一紙書。平生師弟竟何如。傷心卻似驚弓鳥。待命誰憐涸轍魚。寄霜匡師湘潭
廣雅維舟舊有詩。西江社裏甚微辭。賞音獨感周郎顧。四海逢人譽項斯。喜周慶光至
咸豐廢礮未沙沉。兵備當年開濟心。何處盞堂容嘯傲。至今惟見漸西亭。南岸問袁爽秋舊席
登壇早媿豐干舌。眼底青青盡麥田。畢竟老農關國計。讀書無益子孫賢。高級農業學校邀往演講
絮斷萍飄等可傷。一時買棹渡江忙。回頭終回于湖別。明日于湖亦故鄉。別于湖

無爲雜詩

澹蕩烟波思渺然。浮家都聚一蓬前。匆匆三月于湖住。又上無爲縣裏船。十一月二十七日發于湖
江口風帆燈火裏。兩三茆舍接圩堤。夜深時見下弦月。一樣彎彎照裕溪。夜泊裕溪口
涉險曾經濯錦還。拏舟又過十三灣。纔知一里濡須水。未讓川江盪瀾難。濡須舟行
望中朵朵蓮花堞。指點州城傍一川。景福還經雙塔峙。此間雞犬儻登天。河口望無爲縣城
一行作吏幾迂儒。坐見顛翁起一隅。投硯爲妨蛙鼓動。稻孫樓外勸農初。過西門街
黃竹青絲簇幾眉。舊家亭館我來登。繡溪避世真奇絕。問舍求田媿未能。游繡溪

青骨成神信有之。杏花泉上蔣公祠。慚余少日填詞筆。未盡甘棠去後思。請吾鄉將紹由先生祠十二年。前余有無為州雜劇之作。

吾家門弟感三唐。弈世儒宗式此鄉。簪履半城誇望族。劫餘尚有魯靈光。治急言宗人秋浦先生年八十一矣。一鄉耆彥推為祭酒。

抱膝聞吟鞍子巷。問天子豈欲逃名。平生劉過陳同甫。但飲醇醪莫論兵。閒吟。

歸甫熙王守後直接章大金正希未許成弘作正音。五百年間八股體。仗憑老手好追尋。居停薛翁日摩挲。制

藝不去手。

殘鞠支離共一尊。十年心迹比秋痕。北樓夜月鰲峯雨。憶到宣城總斷魂。舊徒薛繼曾張名德盧前駁招

天荒地老歲云暮。投我兵戈離亂前。四海親朋果相憶。慰人聊誦告存篇。寄各地親友。

宅門

夕陽何限意。寫影宅門南。老樹猶如此。流人更不堪。無疑歸是夢。回味蔗同甘。葉落烏啼處。銜愁孰可諳。

怡隱軒呈秋浦宗老

吾宗怡隱老。白首坐高軒。煖眼陳編在。安心眞性存。伊川終有懼。明允識其原。世亂何年已。天乎不可言。吾鄉耆彥盡。屈指一爲陳。竺叟袁公諱。國興山河逸。蘧庵吳公諱。鳴新墓草新。於公爲故舊。賤子屬嫻親。

尙想趨庭日。須眉座上人。

喜倪受民自合肥歸

一勺繡溪水。微瀾染鬢絲。殷勤留客住。展轉益余悲。仗酒能銷被。殘年向盡時。倪迂歸未晚。風雪繪無爲。

倚祭

掉頭不復視。始去我故居。隔江望兵火。意者成丘墟。忽忽十三年。逢辰涕淚初。列篋銅陵笥。佐以濡須魚。今朝爲僑祭。陳几鮮珍蔬。孫行五六輩。跪拜從徐徐。張羅兩新婦。肩隨侃與仔。皆父未及見。相偕喪亂餘。放歸期旦夕。好整舊門閭。

夜市

予于聲滿街。籠燈夜入市。邏卒呵叱之。行行不能止。徧叩醫者門。殘月冷如水。所懷骨肉親。所念腹中子。國難苦逼人。家難猶未已。兩肩叢百憂。萬事欠一死。幸醫隨我來。使我破顏喜。看看東方天。魚肚浮淺紫。

蓋棺

蓋棺了一世。扛上太山頭。地曰老虎洞。無爲之北疇。全家泊河干。欲去止能留。城中變亂後。樂土倏荒州。空巷絕人迹。入國卽墟丘。烏乎吾叔母。于歸十四秋。賢以事季父。平生乃多憂。季父今遠隔。江河道且修。

况復干戈阻，再元遂無由。四妹既我託，共載於一舟。叔母其瞑目，我必護之周。承平倘可望，季父來扶柩。方言平可歸，葬愿有日用以告九幽。

遇吳大

俊升

漢口去故都之別五年矣感而爲詩

戊寅

擲身離亂，漸覺中年苦。家室已累人，况復多兒女。寇從東海來，我不能禦侮。蹙蹙一孔中，何者爲樂土。五月千里行，展轉成倦羽。室家終未安，相望翻高舉。死者豈足惜，知我有老母。眠蠶目作繭，病鶴非不舞。賈勇溯江上，我亦止於楚。里中遇長兄，絮絮窮酸語。回首梅庵松，把臂燕臺雨。感舊每驚心，乃落少年伍。始信是哀樂，力所難拒取。毋謂今馴羊，當日故猛虎。收京若可期，抱書甘寂處。

寄李白華

晉芳

宜日二首

往古從政士，曰官與吏僚。策畫者賓客，筭掌歸掾曹。官實推行之，政舉力不勞。冢宰起州牧，明察及秋毫。觀民由寒素，未習於梁膏。一方旣修治，相國已有操。兩漢爲龔黃，三唐則宋姚。宰輔何足貴，牧令彌可豪。吾友李大令，二十始爲仕。前後宰黃梅，賢能譽自致。運斤如弄丸，文字其餘事。明年出修門，奉檄守海澱。溧陽強項名，一日喧都市。掉頭入幕府，腐心將逃世。故知用世才，世亦不之棄。彝陵得斯人，我欲觀其治。故人今尙在，令亦憶之乎。八月奔京師，奉母走于湖。一席未暇暖，渡江成斷瓠。脫手了不惜，所惜萬卷書。平生龍川集，意者肇燔如。近來楚郢客，以我爲酒徒。倚醉歌長句，得似鄭莫無。從政或有待，並世孰會胡。

歸元寺

一舸而今緩緩來。迎眉萬綫壓崔嵬。重過當日歸元寺。只有江流去未回。

饒歌 百章之二

馬上英英對敵時。歸來蘸血寫歌辭。合爲一手真豪舉。捉住槍枝與筆枝。他年好給兒孫說。父祖曾留護國功。不是一番心力換。那能雄立亞洲東。

受參

江總離家忍被貂。秦淮煙柳夢中遙。未愁沸鼎遊魚歎。坐見圍城穴蟻澆。翼亮可堪千里啓。丕承終仰五雲飄。風塵歷徧艱方盡。報國書生鬢未凋。彈棋世局百年馳。劫運因人每轉移。懸眼桑田都往跡。驚心文物異當時。果持否泰無違觀。不爾窮通或過悲。多難邦興容獻曝。中原況復有雄師。招邀者彥萬方來。翊贊中興亦壯哉。明日元戎收捷獻。他時黎首儘鳴哀。解懸早使能安席。聞凱無妨對舉杯。一溺一飢如在我。不然何以答隗臺。衆流趨壑迥非常。樞要精誠接八荒。廉藺早知同事趙。李牛相執已危唐。歸鯨渤溟翻然至。構厦株樟未可量。願共蒼生憂社稷。諸君莫負雨霖望。屋梁能供幾回看。一任爭墩晉謝安。正戀北湖蘭蕙穩。豈知東海陣雲寒。振衣儀鳳無餘子。揮扇蟠龍出

百官王氣從來天所屬。安危責在匹夫完。

下城

下城今昔已滄桑。屈折江流繞胃腸。兵氣每於文字見。秋心不與壯夫涼。康衢曾識崎嶇路。荒瘠看成稻麥場。獨爲人間留兩眼。旌旗峽水共低昂。

七星岡

樓閣參差出道旁。一簷越過七星岡。纔知身已登高處。尙有千家在下方。

義犬行

有倭賈於渝。買犬以爲奴。肉食無或缺。豢養十年餘。弄摩不釋手。犬主兩歡愉。爲主守門戶。行則從徐徐。或謂是倭犬。犬亦任人呼。盧溝事變初。倭囊括所有行李。旣在肩。牽犬臨江口。登輪待東發。犬獨繞闌走。去留心未安。俛伏亦已久。一躍倭賈前。一怒嚙其手。掉頭復上岸。還自入渝城。歸立大道旁。坊鄰咤且驚。犬不作人語。而人識其聲。曰我中國犬。與國共死生。赴難有大義。敢戀區區情。烏乎有此犬。於人已難得。大夫無私交。豈不以敵國。

雨

可憶東城履滿街。舊時門巷長蒼苔。秋宵爲食龍池鯽。曾有詩人踏雨來。

一種瀟瀟入夜深。江南江北兩沈吟。分明今夕巴山雨。滴碎燈前萬里心。

入覲國府主席林公垂詢近詩敬謹獻頌

邦家多難日。元首幸康疆。劭德輝千紀。深仁馭八荒。回天終在我。策力自能王。坐見祆氛靜。樓船返故鄉。逍遙行在所。鷓鴣着詩人。少小耽辭賦。歌成告鬼神。載攜黃帝魄。含茹杜陵春。建國兼文事。雄風戰地新。

游南北溫泉詩

適從地坎來。權入花溪路。問塘不可見。云在山深處。夾溪皆修篁。左右難兼顧。竹盡忽白巖。隔岸懸瀑布。瀑枯飛不起。惟巖發古趣。斑斕滿蘚苔。相對得狂悟。明知非文字。從橫疑有故。看看近南泉水。上漸蒸霧。一樓拱蒼翠。上有建文峯。千古此疑獄。帝子曾塵蒙。豈甘傳祖鉢。叔不爲周公。少師呼道衍。囊智逞其凶。天南始駐錫。手植萬年松。世移惟松在。濤聲撼晚風。溫泉若魯沂。吾乃懷點志。同行老壯冠。亦有六童子。何必春服成。笑回塘門指。一室旣已闢。取次就湯水。悠然忘朝暮。俛仰不肯起。浴罷詠而歸。御風隨所止。北碕半日留。因泉更入峽。峽乎我舊交。於我如相狎。知我往采泉。泉故藏諸篋。難以百步梯。困以山路滑。行行未能止。欲速愈不達。下聽幽澗鳴。濕氣透毛髮。且憩桐陰道。林外蒙爲豁。隔望西山坪。與語而不答。嵯峨萬綠間。云是溫泉寺。當年元憲宗。力盡於此死。天下旣歸胡。釣魚城獨峙。不變宋正朔。倔強蓋一世。父老所傳聞。具載合川志。黷武終有窮。嗟胡何不智。

紆道出瀟湫。言探乳花洞。參差萬乳垂。後先互控縱。亦復狀蛟龍。相糾合成囊。不然暗如漆。幸有窺天縫。天風吹石走。黃梅挺不動。洞口掛飛瀑。聲音時在弄。吾未解續事。晝境胸能熟。以文擬二泉。語或乖時俗。南者柳周詞。北乃關馬曲。莽蒼與明秀。各自一面目。巴渝了不奇。平淡厭重讀。何竟去陳言。得此意先足。一日北泉游。兩日南泉浴。

稗木歎 巳卯

稗木鎮居大道旁。穀輪日日往來忙。但云公家事火急。誰念當者遭其殃。前夕老翁裂腹死。今朝童子破頭亡。翁三百金童五十給。卹早已具定章。可憐民命在車下。何不使之赴疆場。

內江行

內江乞兒滿街走。長者十三幼八九。白身垢面首飛蓬。破盤殘羹捧兩手。一聲哀號數人和。東號西號不絕口。行人那顧乞兒號。但道此邦多富有。邑有流亡責在誰。寄語內江賢父母。

重至成都宿衡叔家

一往江關再見難。入門眞作夢中看。更何言語如人意。只遣盃盤助此歡。別後鬚眉無恙在。燈前骨肉幾家完。十年重理城南屐。明日相攜出錦官。

過文廟後街故居

樹影扶疏廟後街。書聲日與鶻呼諧。摩塗几案人重到。露井西偏舊寓齋。

小南海

眼中突兀小南海。鎖鑰岷源又一關。儘有洪濤喧日夜。忽呼毅魄護河山。

油溪

彌望油溪水。高歌白屋詩。記曾搖膀過。纔恨識名遲。山野多豪俊。旌旗又昔時。一肩擔國事。所願好男兒。

憶昔日篇示珥妹

母年今六十。妹齡適其半。憶昔妹生時。頭角兄生卵。宣統初改元。江左尙安晏。兄在家塾中。歡喜溢書案。申猴未得留。戊申生一妹。不育得犬殊。弄翫堂前會大母。偏憐嬌養慣。恃寵陵弱妹。未敢謂兄悍。呼來斥之去。惟命從不叛。妹乎信能恭。而兄何其慢。忽忽三十載。思之祇顏汗。老屋望鶴岡。九房各折爨。徒奢不治生。且屢遭喪亂。室家既已毀。紛紛都雲散。婦教天下衰。閹閱多冰炭。先君坐燈窗。對此輒浩歎。督兒課故嚴。女亦習柔翰。襄樊千里游。茸城十年宦。先君忽見背。迥遭遘大難。重勞慈母心。辛勤及宵旰。奮兒十指力。炊煙時或斷。歸妹安定程。深致重閨贊。翁姑皆曰賢。門第於焉判。何以爲中年。厥名是憂患。前年軍興後。迢迢共流竄。皖江南北行。終乃至武漢。展轉復巴渝。賃宅沱南岸。沱南有白沙。合作桃源看。望衡對字間。商量到菘蒜。兩家骨肉完。此樂金不換。秀才紙半張。同發母一粲。

江行 二首

顧南失北兩全難。江水迢迢一線看。只有航師知此意。拏舟早過萬重灘。
龍浩蒼蒼瑪瑙青。滄沙一水慣征程。不擡倦眼闌干外。便聽潮聲識地名。

鍊士

火器日以猛。何有七寸匕。艦海鳶飛天。列國共常軌。甯恃血肉軀。一拳克強壘。誰見圮橋人。亦無盜盒婢。
說劍其虞初。齊東語至鄙。客自大我來。云是鍊氣士。師年四百餘。祖師不計齒。六歲從之游。金頂昔進履。
吐內受深祕。口吸百盂水。腹置千斤石。任椎得不死。沫花噴四射。可以當弓矢。斂氣翕胃腸。隱雷聞人耳。
又有囊中藥。可使鋼鳶止。彼倭何足患。師命始入市。座上諸紳耆。聞之心顏喜。士進乞前言。前乃作而起。
勵精圖健強。厥術豈不美。江湖南北宗。流派雜談詭。是謂匹夫勇。無與軍旅旨。當時義和團。誤國茲所恥。

重過美專校街十七號

會此秋燈共酒卮。一時背道獨奔馳。黃臺四摘分明事。瓜蔓都無聖得知。

送東野返宜昌

西蜀爲家久。中郎作客仍。信稀兄性懶。歸省母歡承。江樹催行役。蒹葭思奮興。明年收漢水。相待聚彝陵。

秋思八首同李證剛方東美作

倦鳥歸飛失故林。江東雲樹日森森。端居未覺花如錦。凋落裁憐葉滿陰。醜毒祇存梁宋諡。凱歌惟誓弼
儀心。流人一往嘉陵道。夜雨扁舟處處砧。

參差百雉寺樓斜。井寒螢泣麗華已負鳴雞三尺劍。未妨閒鷺五洲楂。胭脂淘洗餘薪膽。弦管銷沈揆
鼓笳。悵望臺城一片月。照誰收采米囊花。

此地清涼送夕暉。望中王謝亦寢微。猶憐籠裏雞爲侶。却歎磯邊燕不飛。風景無殊花自媚。園林裁半世
相違。勞勞笑爾西亭主。新柳新蒲兩未肥。

西北高樓指勝棋。殘荷依檻若爲悲。空梁燕子銜泥迹。小閣人豪駐節時。曠代風流爭想像。中興事業久
欽遲。湖山自具英雄氣。擐甲彭郎語可思。

葱蘢佳氣鬱鍾山。開國威儀咫尺間。樹倚流徽靈谷寺。門通神策秣陵關。十年戰伐頻翻手。百萬生黎幾
笑顏。隔海妖氛飛羽至。一時奮迅出朝班。

擬絕天驕古石頭。驚濤掠岸大江秋。誰沈鐵鎖降王濬。忍惜風花向莫愁。故國周遭空踞虎。荒洲平闊好
棲鷗。吳中父老長相憶。何日樓船下益州。

走馬城南問大功。一坊矗立棘駝中。雨花台上尋遺蹟。正學祠前唱大風。斷碣千年凝血碧。殘楓一夜帶
霜紅。修門文獻都零落。收拾何人繼可翁。

東關流水更西迤。歷歷南山與北陂。星月爭隨三峽水。袈裟會上萬年枝。若窺天道通窮變。事在人爲自

轉移詞客哀時歸不得。未成詩賦淚先垂。

二資道中

天馬橋頭雨。球溪鎮尾風。放車遲坎上。留眼對資中。有樹松針密。盈筐橘實紅。家家忙送竈。歸擔幾村翁。

鄜望 庚辰

依舊鄜州月中天。此夜看未圓。先半缺。離易合仍難。伐桂摧剛斧。疑雲幻廣寒。啣愁甯得睡。甯忍久長安。

記花園口戰役

寇從沁水至。疾行如鬼走。黃河憤不平。怒向中原吼。誓此吞日心。未敢一日苟。奔騰盪以決。敵死十八九。汜濫匪河罪。河實國之紐。桓桓孫將軍。轉戰南北斗。聞聲寇膽落。將軍攻以守。十襲開封城。掣汝左右肘。一鼓出中牟。再舉驅羊狗。旌節轉鄭來。歡顏動童叟。威名在天下。元戎論功首。何以表功績。旂授將軍手。所慚勞視使。旂外無所有。昨抵京水鎮。遙望花園口。烏虜壯士血。乃在口門東。千古田橫島。化碧盡哀弘。將軍說戰役。河上起悲風。昨年三月廿月堤。見寇蹤。壯士請渡河。挫彼猖獗鋒。敢忘九世讎。恥與戴天同。生不能殺敵。死必爲鬼雄。果然背水陣。壯士相始終。奮以血肉軀。搏擊砲火中。天地爲我昏。河水爲我紅。衆寡本不敵。成仁原夙衷。將軍辭未竟。涕泗知何從。堂堂國殤人。馬革裹厥躬。耿耿雒陽節。史官旌其忠。往者應無恨。指日飲黃龍。我歌花園口。河水日瀟瀟。

宿萬縣次和子逸翁書懷之作

桃李紛三峽。春光一半輪。有枝巢燕雀。何地不江湖。少喜雲沙靜。行歌詠數俱。宵來留萬縣。打漿去徐徐。

詠蠶

身甘就繭重重縛。一念僵蠶直是癡。到死絲成還待繅。會無蛹起已眠時。知桑如鳩甯能食。結草爲山底不辭。入市更難憐繡口。嫁衣縫好只餘悲。

聞魏建功至

累我翻然喜復憐。將迎北客到門前。當時馬。隔。脚。白。滌。洲。真。成。鬼。今日蠶叢半箇天。蹤迹未殊謀穴鼠。生涯仍恃賣文錢。算。瓢。陋。巷。能。安。樂。祇。要。王。師。下。漢。川。

今昔詩爲龍夏葆初夫人作

常樂庵邊昔賃廡。錫。簫。聲。過。日。將。晡。滕。文。公。了。離。婁。熟。放。學。歸。來。替。背。書。家難重重今一身。獨撐病骨飽艱辛。三年事付千秋筆。卓絕中壘傳裏人。

雨中買棹赴渝同蔣慰堂辛樹幟魏建功慰堂談北
都舊事是日止宿江津縣城明晨始得登輪

江山生意滿。風雨一扁舟。浩蕩灘灘水。參差岸岸樓。當前供煖眼。卽往屢回頭。此境他年憶。江津六月秋。

觀割稻請寄漱溟黑石山中

向陽莊下好梯田。早穀登場七月天。糊口細民空望歲。苦心野老過豐年。汲倉不發誇兵食。韋令甯知媿俸錢。弊政不除吾輩恥。欲憑長句叩梁先。

白沙秋思

未禿青桐小院幽。一聲聲雨撼山樓。明知今夕猶昨夕。竟望滄州似潤州。豪傑並時聊指屈。江山千古騁神遊。起來笑向西風裏。心上愁無未是秋。

次韻答呈野

鍵戶眞成山徑幽。紫蒲桃上亦吾樓。門庭何處九千里。烽火猶然十六州。豈不懷歸慈母老。最難相忘少年游。橋頭日共荆高醉。那識承平太古秋。

敬答拙喬師海上見懷之作

去日如流水。搏沙問舊痕。劫餘鬚滿嘴。仕久稚無禪。滄海嗟何極。詩書養鈍根。廿三年一別。幸不辱師門。十載西征再。江東指日還。收功成戰伐。放手整河山。裁寄甯多語。重逢定破顏。昔遊那可記。松寥白雲間。前初侍杖履時年。方十三。是年秋有焦山之故遊。故未句及之。

雨

激湍迴瀾併作潮。濛濛漸遠漸瀟瀟。望中卽是長江水。踏雨鳴笳日過橋。
片夢零情斷續聲。燈前拄頰總貪聽。連絲春雨還秋雨。便到冬來不肯停。
夏夜星辰秋後雨。人生可味只兒時。中庭冰簟涼如許。世路瀟泥那得知。

臺靜農屬題唐玄宗戊寅投紫蓋洞銅簡柘本

不見長生法。照顏惟銅簡。載依上清真。告文紛在眼。云投紫蓋洞。本命乙酉產。君臨不獲拜。金龍傳敢緩。
亦有孫道士。智涼賣信版。開元方盛時。神武所馭遠。案戊寅爲開元二十六年。三年崇玄學。開元二十九
年置立元皇帝朝六年置別館。天寶四載册揚玉環爲貴妃。太眞賜號新。長生殿名誕。何嘗道非常。不惜
情私款。馬嵬一坏土。聞道君何晚。太上要忘情。肯使葉法善。黃泉與碧落。招魂魂難反。空說長生長。祇餘
短簡短。知眞無外求。豈待丹九轉。

題延光四年磚次沫若鞭字詩韵

論中和者無慮百首。余詩最後成。聊以附驥而已。

生逢永初日。願爲王執鞭。正朔旣五易。惟此延光磚。昌貴著在字。紋藻徒娟娟。未及倭來朝。安帝永初元。
年倭使來朝。飲恨向黃泉。豈意重閱世。征倭幾經年。孰不知思漢。何待彈斷弦。燈底撫石墨。廢我中宵眠。
一吟三歎息。四壁起雲煙。

聞喜饒嘉措大師說西藏詩學次行嚴先生寺字韻

往謁喜饒長安寺。師爲解說連雅字。藏稱詩曰連雅云。詩教出小五明。西域身毒原無異。師從拉薩來。峨
泯黃褂前席氣。閻閻脫口求結求。結者斷句四句成一頌。復求路。求路爲長行。作散體。諸天龍象一時馴。
十功德品。此品爲藏詩極品。高明者習之。旣備載。大什伴達。謂大智慧看猶在。尤巴見。卽持杖人。詩鑑一
編準四海。外道尤巴見。作詩鑑其人喜持杖。故名金剛幢。譯動公卿。薩嘉派執政時。熊譯師傳入藏。我聞
妙喻喜還驚。詩體如身意如命。莊嚴聊舉服飾名。詩鑑有三品。三十五義與莊嚴居。十功德之次。莊嚴猶
云修辭。

黑石山梅

一笑相看去。又來虛堂疏影映深盃。山花山鳥都零落。賸得寒梅緩緩開。
萬樹依然繞墓門。一輪圓月想溫存。平生不是林和靖。却有梅花解報恩。萬樹梅花月正圓。亡友吳碧初
詩句。

東廔漆

至日還山一事無。但逢故舊話陪都。床頭酒好今須飲。隔巷招邀鄭大夫。

三十年元旦試筆 辛巳

破夜荒雞動四鄰。江光山色一番新。果然望到東方白。笑起樓頭守歲人。
初陽漸上闌干角。爽氣迎人第一天。能得晴明過此日。何須龜卜問今年。

山居擬何處難忘酒

何處難忘酒。山房深夜燈。情絲長在竹。意味淨於冰。玄武門前路。鳳凰山上層。此時一追憶。不飲我何能。

復興關答贈喜饒嘉措

師時爲吐蓮華舌。啓我雕龍繡虎心。不待微言傳四海。發揮忠愛卽潮音。

和驢溪月夕詩

丘壑旣吾廢。神往卽山居。高瀑自南來。成溪是名驢。驢溪豈云廣。幽寂頗有餘。遲遲涼月上。燭此松篁區。
於時二三子。席地天爲廬。入手各盃酒。下酒惟詩書。山鳥不一鳴。雲月共翕噓。飲罷何所事。行歌以相娛。
忘世有魏晉。騁心已唐虞。嗟我塵網中。失與賢者俱。

偕君展逸雲遊黑石山遂至高洞觀瀑

二百七十八層坡。疊疊重重上碧螺。松竹一溪爭嫵媚。樓臺百尺足嵯峨。禽啼祇恐春歸早。風靜微嫌晝

意多懸瀑亦能疆不息。尙攜鐘鼓在巖阿。

聞湘北再捷作

汀泗橋南漸合圍。投戈片甲定無歸。歌鐃喚出中秋月。照見長沙上將威。
一步雷池越未能。年前於此破倭曾。又看戰史標名姓。喋血瀟湘薛伯陵。

雙十節西河壩會上作

鞭爆歡呼聲滿村。彝陵窮寇正東奔。偏逢今日成雙捷。決勝明年告九閩。戰愈堅強人共信。地全收復志常存。直須鴨綠江邊去。莫道榆關是國門。

碁江

建安片石今仍在。夷長嚴男信不同。四海聲名吹角壩。姜維碑後有盧豐。

播州雜詩

天不使常見。一面眞辛艱。三日桐梓驛。百折婁山關。居然播之友。共我几席間。一庭娟娟花。心喜秋未闌。
卽坐有至樂。浮辭甯多刪。明知爲暫聚。情熱故閒閒。
出門將安之。往謁鄭莫祠。祠樓懸榜字。西南兩大師。堂上肅遺像。庭樹生華滋。念昔遭喪亂。草間常苦饑。
理情端治本。經世始以詩。雅頌不得所。詩亡世可知。

貴陽雜詩

南雲孤負十年期。仰望黔靈悔我遲。大醉茅苔不可得。案頭幸有柴翁詩。
瓦解金陵事可傷。南明河水閱興亡。禪機一葉僧前落。誰識詩人馬貴陽。

九日登甲秀樓同仲麀作

何地逢重九。人間甲秀樓。三山分鬢色。一水寫心憂。遺鐵銷鋒鏑。揮戈尙寇讎。明年同北上。譚笑記南州。

登黔靈山

峯巒七十二。第一上黔靈。徑曲迴巖壑。林深掩竝亭。新楓蛇舌赤。古殿佛頭青。寺已無僧迹。晨鐘不可聽。
瞿脈傳燈舊。名山世所知。赤松洗鉢水。花杰狀元詩。伏虎誰爲勇。籠紗語亦卑。花近樓主人。讀書山中楹。
帖云再窮無非計。口不死總要出頭。象王嶺上望。白日去遲遲。

松坎晚步同張曉峯

邊地山多草不生。蠻烟瘴霧晚來橫。迴車領略蕭條意。散策閒申澹蕩情。幽壑斷橋荒到水。疏燈遠戍寂無聲。可嗟朝市因循久。插柳栽花百未成。

四年

飄泊支離過四年。幾回東望隔雲天。平生不作傷心語。憶到金陵一惘然。
波譎魚龍又上場。大風吹動太平洋。收京只是來朝事。說與流人莫斷腸。

三十年除夕偶成

破除宵睡倚山樓。樓外清光接九州。歸計來年天定許。年初一夜月當頭。

燈龍曲 壬午

度陌越阡西復東。秧歌處處接燈籠。春風黃桷坪前路。依舊承平在眼中。
門外嵯峨盡蜀山。燈邊齊唱大刀環。爲君一奏遼東曲。準擬今年共出關。

答樊紱秋

與子山樓共起居。無爲相對意常餘。原知回變非天命。且誦貞元用世書。一代廢興關制度。壯年心力惜
蟲魚。沙漚幾點荒江闊。便爾忘機媿未如。

爲樊漱圃題劉又詩二首

諫議栽樓絳居記。劉又冰柱雪車詩。幾家文字從已出。長慶元和兩大師。
收拾叢殘四十年。又爲節士一詳箋。白頭書客多慚甚。應有功夫到玉川。

飲許介忱心武家卽席贈女公子麗云

麗云吾小友。婉孌忽齊肩。掠眼紛千變。驚心過十年。龍亭貪日落。鳳酒奮髯先。復共而翁飲。狂言唾滿箋。

南行賸句

壬午六月。前將再入黔。以車阻止行都。未幾部聘典樂教八閩。始移家北碚。值參政會啓。與會五日。乃飛航桂林。取道韶關。越嶺而東。經贛縣瑞金。抵長汀。塗中聞見。託之小詩。積六十餘首。十一月九日。車次連城金鷄嶺。爲暴客所劫。掠置黃勝地。備嘗苦楚。而篋中文稿盡失。既脫險。從李寶坑步行三十里。至姑田。得附車達永安。十一日。蒞上吉山。視校政。追惟往迹。恍同隔世。默書賸句。分寄良朋。答慰問之情。當告存之什。

會犯嚴冬趨北戒。又於六月下南疆。三年奔走嗟何補。賸寫新聲託短章。

鳴禽桃樹夢分明。隔座低徊踏唱聲。不是因歌悲老大。愬愬春色太無情。返沙舟中聞諸年少歌所謂本
事曲予年十七八時作黃自教授爲製譜者

壺中魏晉身何世。哦在山窗倚枕時。一點秋心燈相接。混茫惟有砌蛩知。青木關宿一樵次。長兄山居

沙頭倦羽四年投。明日條然去聶樓。樓外江山如惜別。一天風雨作中秋。中秋後一日自白沙移家北碚
貧賤相依患難中。廿年德曜與梁鴻。明知此去增君累。助我先成化育功。別雁門君

三上靈山畫策多。功名四十已蹉跎。東南苦望旌旗至。一手先傳破陣歌。既受命典樂教於第三屆一次
參政會開幕前四日啓程入閩

山外雲烟雲外山。如波如帶復如環。回首一瞥千山逝。知出修門第幾關。十月廿七日飛桂林四十號機
中作

白下樓霞夢繞之。六年一別竟誰知。燈前且酌三花酒。灘上重逢二北時。喜晤中敘

便入穿山叩草堂。山花山鳥總堅蒼。八家不作吳岳廬。王一亭死老菊西來此擅場。題詹菊農畫冊

掩淚初過定桂門。姚州宿草我銜恩。芙蓉屏上鶯聲急。憶到雙林耿不言。過霜厓即定桂門寓廬

千朵週遭一掌平。盤龍鑊鼓下中興。肯將九曲相思水。盪滌平生慷慨情。爲中央軍官學校六分校演講

畢上銅屏山題盤龍岩

寂寞吳門土一坯。撫松亭下舊池台。百年疏鑿詞場手。祇道人間事可哀。宴榕湖功德林半唐老人故宅

平蠻當日高三將。清議憑誰定一尊。皇祐勦勞元祐黨。月牙山下兩碑存。龍隱岩訪石

丹楓翠柏森森地。縱有流鶯那忍聽。多少故人今陌路。南來還上茹經亭。無錫國學專修學校邀往演講

賦贈馮校長振心

講堂燈掩真如夢。臨桂山埋長者車。同學少年知取則。莫隨世口責詩書。發桂林別暨大舊徒並悼馬君

武先生

燈下全州拄頰看。三湘八桂此遮攔。卽今四海爲家日。收拾談資供稗官。全州車次聞傅沐波談往事

爲誰流下瀟湘去。試問郴江豈自知。望斷桃源歸路渺。却憐淮海尙奔馳。次郴縣誦踏莎行追懷秦觀

連天搖蕩碧波柔。也似秦淮十月秋。斜日晚風湘水上。相看無語過衡州。衡陽車中作

亂髮飄髯大布衣。山城夜夜飲忘歸。人生隨處能埋骨。一曲關河舊侶稀。樂昌弔羅鈞任先生

奏韶舜迹兩皇岡。想見笙璈下大荒。文武合流興樂教。曲江終古協宮商。韶州懷古

九齡風度靖風采。唐宋張余各萬年。路轉樓高風益烈。後生應不讓前賢。風度路風采樓

禪機明鏡染塵埃。心向南華祖殿回。伏虎降魔仙佛一。曹溪深處幾人來。遊南華寺

鼓山長老寶林僧。敷座登壇說慧能。誰道虛雲今九十。少年腰脚氣峻增。謁虛雲禪師

嶺外秋光馬壩西。猶多香米供蒸藜。居韶三日加餐飯。不買渝州黑骨鷄。馬壩

拋却南雄過嶺來。望中嶺北嶺南梅。梅花自具忠貞骨。不到深寒不肯開。度大庾嶺

贛南光景一番新。家訓當門語切真。夾道樟枿生意滿。發揚看足采風人。贛州

斷壁村村草接天。雩都東去少人烟。纖兒撞壞家居了。白髮低垂破寺前。雩都道中

行人憑軾各沉吟。龍霧雲遮舊瑞金。白骨山堆紅是血。十年惡夢總驚心。瑞金

曉發長汀間道馳。餐風飲露我無辭。如何白日金鷄嶺。豪客相逢也要詩。九日入連城境遇匪徒二十年

來手稿悉被劫

彌天兵火閉來往。薄命斯文值幾錢。生死關頭黃勝地。居然跣足近姑田。既掠入山至黃勝地得釋明日

步行三十里于姑田脫險

遊魚知聽瓠巴瑟。樂正纔回天地心。願與諸生勤象德。考亭遺教慎追尋。十一月十一日示永安國立音

專諸生

紅米

諸生戲呼鐵銹飯。一餐紅米六兩半。不念老農畎畝間。念我戰士流血汗。盃中粒粒敢興嗟。吾徒所餐亦已奢。戰士沙場艱一飽。安得黃豆與南瓜。

捕鼠

驚殘好夢日方午。擾擾一室從橫鼠。相鼠紛然從東來。天之驕子汝自許。汝謂我非捕鼠人。捕鼠有意含未伸。戶牖旣閃竇亦塞。鼠乎就縛勢已陳。

練存軒雜作

練存軒獨坐。且傾大紅袍。四壁琴音絕。松風起夜濤。
吉山落我手。一笑告山靈。吟多不稱意。山色徒爲青。
緩緩燕溪水。峨峨退可坊。路旁有榕樹。迎送替垂楊。
前年巡河朔。去年下牂牁。今年東海月。照我吉山阿。
淡眉曼爵克。隆準李歌羅。西來三教授。隔屋聽吟哦。
失去霧中山。但憐霜不草。霧山何足看。霜草日枯稿。
少年似春花。爛漫出牆東。壯歲如秋葉。無霜色不紅。
七歲夜遇盜。張帷呼我起。從容抱篋眠。頗使父心喜。
十歲能文章。所望成大器。馳驅二十年。一掬孤兒淚。

神京望不見。天半來黃鶯。鶯語雜胡語。聞之暗驚。
燈前無一事。忽憶小兒女。兩女曾位在沙頭。大兒僦壩上住。
北碚有山妻。渝州留老母。念我鎖雙眉。思兒杯在手。
空中謬竟傳。入樂始黃自。使我九迴腸。聞君歌本事。
枕上六年事。熒熒燈底醒。峽雲掛心眼。夢不到江甯。
能歌趙芳杏。能琴吳逸亭。吉山此兩絕。譽滿永安城。
楊生碧海工。伴奏鄭生滄。善指揮。三年出江海。一日載名歸。
山深咽流泉。夜深啼杜鵑。今古兩歌者。秦青蔡麗娟。
黃帝作咸池。六代始天樂。章韶夏漢武。殿以周公勺。
風雲氣概多。行後詩常好。收拾海天吟。寄與三原老。

廿九年春代表參政會視察北戰場各區道出南陽
始識玖瑩名不意握手燕江相聚日暮爰賦詩贈之

前年歲庚辰。持節宛洛路。故人趙芝亭。過我語絮絮。威稱別香齋。導民多部署。收槍自編兵。子弟樂就募。
村落鷄犬聞。碉堡各成戍。保家不顧身。倭兒見者懼。從此阻唐河。未敢越一步。安危反掌間。南陽待鞏固。
別叟誠異人。奮起亦有故。朱侯專區政。堅信能託付。士爲知己用。豁然見侯度。窮壤勤求瘼。下馬書露布。

惜侯不我留。侯難再遇。言已指觀門。日盡甘棠樹。賢哉此循良。高風空想慕。燈下長太息。據以入章疏。
龔黃乃並世。思之啓寐寤。叟墓木拱矣。與侯始相晤。天南上吉山。講舍隣流寓。何圖孔北海。知備若交素。
山中半日閑。商量到詩句。爲歌柴桑篇。聊發淵明趣。

笠劍詩

聲樂匪所學。典教謬使前。萬里出閩嶠。脫難走姑田。君時赴行在。道路左交肩。此鄰失王翰。山中思鄭虔。
束髮成茂才。毛詩補舊箋。家學苦未足。致知格丹鉛。直欲窮造化。海東載歸船。管觚屬君手。發蒙斯乃專。
仕宦等匏繫。浮沉忽十年。何以昌閩學。請歌笠劍篇。

無產有恆心。惟士卓然見。海內重許行。一笠亦云善。習稼匪求田。荒齋守古研。珠玉褐中懷。多能始鄙賤。
或謂閩士馴。其俗瑜以漸。君欲振起之。曰有劉琨劍。豪俠與儒林。意將合一傳。入手旣耨鉏。潤身復書卷。
孔墨歸殊途。持此宏大願。更以十年期。笠劍士當踐。

山居 癸未

看山不語意常餘。祇辦長吟遣索居。句法每能追北宋。屐痕時復數南徐。有田蜀客空歸計。出水鱗魚上
市初。百種情懷無處放。永安城外一愁余。

次韻酬玖瑩

抗塵南北空皮骨。鬢髮蒼蒼各宛然。元白比鄰要永契。龔黃一輩論猶賢。路人舊日碑傳口。溪水新居詠

滿箋上吉風光中有我。秋山雲樹碧於烟。

水尾

下渡西頭水尾鄉。秋林鴉背出村莊。分明殘日銜山處。却似棲霞落道傍。楓葉豔於年少事。蘆花染到鬢邊霜。行來都是南都客。試向茶亭話海棠。

皆山題辭

洞口寒泉雜管絃。舊時書屋渺荒烟。大湖早是秋收了。但養肥魚水滿田。

奶峯道中

山中松葉戴盈篋。漸逐歌聲過短岡。羞向奶峯高處望。三刀髻子女兒妝。

送鄭寶吾之連城縣長任

往贈白華詩。剴切論時政。服官原非難。所難在縣令。有爲有不爲。一身百事并。巧婦無米炊。雖健亦不勝。况政出多門。叩我如叩磬。世徒或取媚。奔趨尚捷徑。彼以丁癸呼。此以馬牛應。滔滔者天下。孰能導之正。果能一縣治。可以操國柄。龔黃猶人耳。遂爲吏中聖。既語彝陵李。復勉連城鄭。吾黨宜有爲。天下與論定。

閩侯雜詩

又逐殘年襍被征。平明回望永安城。燕溪遠與沙溪接。流入閩江水獨清。三十二年一月廿四日別永安。曳杖山城踏雨來。劍津樓閣尙崔嵬。燈前喜共兒時侶。莫話長干且傾杯。過南平飲胡健中家。浮翠荒江兩岸煙。蓬窗袖手損宵眠。洪山橋上三更月。照送龍潭角外船。廿五夜抵福州。五門洞路滿榛蕪。萬字亭闌掛網蛛。如此園林兵後見。海南招悵又西湖。廿七日游西湖。湖上岩嶠大夢山。山人去幾時還笑。他一枕邯鄲客。不耐騎驢被褐閒。望大夢山。

九山藏見未同科。玉尺吟台老樹多。光祿坊中車小駐。今朝初起病維摩。視曙青監使疾因。覽玉尺之勝。七閩文獻拾殘餘。未讓吳門士禮居。自出校讎家法眼。知君插架有奇書。廿八日沈祖牟過談編纂福建叢書事。

藍田玉暖亦明辭。秦夢偏詳沈亞之。不向宮闈箋本事。何人能解義山詩。與客談樊南集。舊日交遊半死生。榕城遲我七年行。覺廬一老今無恙。操縵猶聞正始聲。三十日訪何梅生先生振岱文儒坊。

好事癡兒文肅孫。招來宮巷舊家門。在杭抄本枚如稿。除却齋供不存。祖牟約觀所藏書。平遠高台傍廓然。戚公祠在白雲前。更誰飲至于山路。靖海勛勞映後先。三十一日謁戚武毅祠。指點烏山郡守祠。棠陰猶繫庶民思。南豐千古文章在。何待多傳有韻詩。二月一日再過烏山曾文定祠。道是多情未有情。樓前浙瀝到天明。去年一枕南台雨。護得春歸尙作聲。四日爲廢歷除夕寫樓偶成。乞得新晴趁早潮。迎風一葉去迢迢。分明石鼓雲中見。海上峯巒氣態驕。七日遊鼓山五首。百尺松濤疊翠微。山中石上澹忘歸。野僧解道降王事。會此亭前換紫衣。

漸盡千梯接上方。湧泉寺外放生塘。行人那識遊魚意。春暖花開樂未央。
白雲堂上月明樓。隔海台灣眼底收。劣削高峯拍手笑。依然還我舊神州。
喝水巖泉一往深。靈源晝夜發清音。一襟操慮何須洗。不舍中原安此心。
劫後重逢夢也無。風光依舊滿西湖。當時社友都零落。著我榕城作酒徒。
湖上

河口弦歌接早春。山中風物一番新。門前桃李垂垂發。惜取芳辰要主人。
講舍

重過金鷄嶺時招撫猶未卒事

回首金鷄道左邊。空桑一宿信前緣。事誠奇遇生難再。山不崇朝海內傳。
解帶何時收伏莽。請纓有路肯歸田。白雲洞莫非吾土。願取功名惜少年。

自連城還永安三過金鷄嶺作

狹路相逢鎮不驚。能吟李涉亦生平。當時虎賁移冠帶。今日兒童熟姓名。
記入荆榛猶坦履。漸泯恩怨足豪情。隔年花滿山中樹。慰我蕭疏眼漸明。

北還陪都四過金雞嶺賦似同車許蟠雲魯長葆兼

寄玖瑩

太上忘情媿未能。車輪歲月共飛騰。燒餘草樹新生綠。山頂煙雲舊躋登。已是花開歌緩緩。更無風動各
競競。他時還乞長沙筆。爲寫思歸張季鷹。

癸未四月初三日渝郊展禊時羈旅桂林王鈍禪爲

代拈得帶字

南山不滿眼。雲氣何巖巖。聞歌春夢婆。去年落嶺外。夢中長江水。嘉陵一衣帶。流過我家時。莫濤益澎湃。
兒正望爺來。老母倚門待。坐我澹湖上。燈底發深慨。懸知朋簪樂。尙有挑菜會。勝事未及與。隨緣掉書袋。
更琢五七言。寫此流民態。獻我海壖吟。願早還行在。

桂林逆旅次韻答方子兼簡琴可

秀峯眼底果雄奇。八桂風流故可思。王半塘沉夔笙埴壇匪異世。呂朱笙磬亦同時。幾回過嶺行還住。此
地誅茅計最宜。灘上煙波三百頃。榕陰宴坐好垂絲。

梅花山張自忠墓下作

深宵礫石共燈聽。雲夢驚傳落將星。大義終能垂竹帛。眞書何用考蘭亭。梅花一例埋忠骨。墓草三年帶
血青。地下有靈應自慰。未煩生祭數零丁。

寫張北海小象上

壯歲還依舊。靈和柳一枝。惟燈杯忘倦。峽酒夜歸遲。經眼三千牘。攢眉七字詩。此中含至樂。惟許白雲知。

山館坐雨貽紫封

抱膝宵來意暫伸。虛廊坐雨更何人。全天轉覺詩爲累。避地能安道不貧。未信桃源忘漢魏。每傷柳絮逐風塵。中年漸領遺山語。滄海橫流要此身。

疊韻答紫封

歸來林下足眉伸。肯使文書又擾人。百事依違無不可。四時風月未爲貧。寫心水部輸詞筆。冷眼安仁拜路塵。東去修門三百里。勞勞人海早抽身。

議罷偕荆人從陪都還北碚山館適值九日

轆轤車輪送重九。沈陰無雨好還山。四圍不脫千層綠。一歲能拋十日閑。安得茱萸酬令節。尙憐兵火徧人寰。瓦盆斟滿瀘州酒。早置吾身醉夢間。

九日李園雅集分韻得客字

淮南緹犬各飛昇。手把茱萸插未得。念我當日題糕處。不知此身亦仙客。李園黃花戴滿頭。兩考星星今

漸白。座中半是舊京人。登臨忽憶鍾山色。喜無風雨過重陽。眇眇江天雲霧隔。

題嘉陵社示傅心逸

大漢天聲懾再張。嘉陵江水協宮商。人間別有西崑曲。一任他年誚魏梁。道咸間水磨腔流行于京師者時謂之北崑曲

北泉和狄君武 膺

滄翠秋山霧不開。三年重過舊池臺。寒枝東向仍啼鳥。但數江帆入峽來。

次寄仇述庵丈

未信儒冠肯誤身。載塗風雪飽艱辛。白頭仁父今無恙。來日開門便是春。枕上分明倚故山。眼中光景破愁顏。麻鞋萬里勞勞客。祇覺輪翁一味閑。

乞賈韜園敘常評事集

山右聲家五六輩。三百年中喬吉常倫。最笙鶴翁在蒙兀兒。足與前朝白石配。夢符生平具見錄。鬼簿愛寫西湖太乙宮。脫手新詞出肝肺。灑落俊生樊榭評。紅牙錦瑟如相對。詳厲鸚鵡符小令。跋百篇梧葉播江湖。憑仗殘編名豈晦。樓居先生能高吟。捧悶葫蘆成粉碎。千秋一曲山坡羊。浩氣直欲吞大塊。數從隆

萬替北音。並世梁辰魚。徐渭等自鄒。獨於沁水得傳薪。豹頭鳳尾終不廢。祇惜平生苦未詳。評事樂府徒賞會。韜園丈人公鄉人。言之鑿鑿殊有味。請書當日公所經。高風助我青燈味。

癸未除夕守歲山館寄東野弟老河口子孟野弟渝州

星野弟成都仔女白沙侃兒沙坪壩 六首

榕南猶昨夜。歲盡忽今宵。五處終相望。一年夫不饒。酒盃承色笑。花鬢益雛嬌。看取山居趣。圍燈守寂寥。兵戈江海窄。所念七年前。虎穴餘生在。蘆花淺水邊。芒鞋三十里。風雪一家船。種種成追憶。今宵耿未眠。鄧陽書不至。東望鎖關情。違省懷慈母。貪盃念長兄。今宵知阿儉。解事話陪京。轉眼三年別。爐邊坐到明。入城非異縣。道路尚艱難。亦有今宵憶。應多故舊權。長安居不易。生計儉能寬。首藉家園味。鷄豚共一盤。城南舊遊地。錦里弟羈遲。大被常依我。今宵定有詩。草堂人日約。花市武侯祠。願早歸裝卸。山窗祝柳絲。今宵燈下數。尚有未歸人。離亂憐兒女。詩書誤此身。煩憂除不盡。含意苦難伸。爆竹鷄聲動。聞根始一新。

四十雜詩 甲申

四十頭顱慨歎多。栖栖道路久蹉跎。門前剩對桓譚樹。海內空傳陸厥歌。漸覺驚心添白髮。定能洗眼俟黃河。平生躍馬橫戈意。只惜風雲紙上過。

三十尋思淮水東。清尊猶接老仙翁。懷人感事金梁月。按拍當筵玉笛風。許我能勘邯鄲夢。積詩不算玉川窮。平生師弟見無日。宿草姚州落照中。

二十南雍上令生。一篤脫手薄時名。駘蟲技足楊雄悔。射虎功期李廣行。攢轡果然償壯志。流雲端合寄閒情。平生獻甫時還共。白鳥亭前話晚晴。
十歲抽豪寫幾行。也知笑罵到侯王。無端父老奇頭角。直欲詩書納胃腸。溫暖甯愁天墜落。稻粱不辨事尋常。平生敢負匡時略。咄咄隨人歎海棠。

楊仲子六十

感同諸老去堂堂。盜麓雲天未可望。人海百年重劫運。先生六十尙殊鄉。祭詩挑菜應難再。縱酒高歌爾許狂。山館一燈攜夜雨。龍蛇腕底見滄桑。

馬客談得孫

生子甯能足萬事。抱孫始覺世摧人。縱然心壯猶堪用。却惜頭童未是真。吾輩辛勤終不在。他年壁壘自然新。祖庭有日重懷舊。峽內風光降汝身。

聞吳氏從母沒於湘桂道中

故里忽傳噩耗至。家四叔新喪。又聞薤露出衡陽。平生爽直如男子。一死倉皇近戰場。不見收京難瞑目。已拚熱血盡剛腸。縱橫老淚憐吾母。白髮燈前說舊廂。

嘉陵晚渡

向晚橫江一舸輕。千山過雨乍晴明。清新願付玲瓏筆。試寫虛堂葉落聲。
一葉驚寒夏壩秋。沙漚蹤跡傍扁舟。丹楓一樹江頭見。却憶蘆花半白頭。

贈何纂甫兼似敘甫

君家兄弟如龍虎。六十豪情少壯無。分得北泉好風月。願從盃底話西湖。

冀野近詩



冀野選集

避暑雜詠 乙酉

作者十四歲照像

烈日中天灼體膚。一時如火復如荼。可堪望向西山落。宇內炎蒸滅却無。

偶爾睥睨被酒時。聊於壁上逞雄姿。平生一墮中條馬。此事君家綠舅知。示吳清儂

寫罷南唐二主詩。小樓昨夜夢兒時。宮亭遺蹟山僧指。玉砌雕闌應在茲。

何年補築詞皇閣。如此江南亦可哀。花月春風都不是。玉樓瑤殿照秦淮。

翰墨之間規國運。家家趙董日陵夷。宜黃獨作風雲氣。充量書人或未知。

散樂忠都正作場。趙城壁畫識關王。正

音誰復知元曲第一銷魂玉茗堂。

馬君仙張仁羅鈞墓草披每憑嘲謔透先機他年史筆承遷腐應有佳文傳滑稽
會無高論驚朝士平實翻疑說夢人門戶至今猶洛蜀調停孰許范純仁
一角山樓作退藏七年暫得此清涼頭銜何必題居士也不隨人入戲場

調滄波

哲嗣修稟有大人
英俊猶昔之語

前賢難免譽兒癖。英俊初聞頌父辭。休道斜川欠斟酌。本來洗馬足丰姿。江關早歲稱能賦。喪亂多年尚不絲。五十朱顏應未改。卽論知父亦佳兒。

九日

病起逢辰過半秋。灑然風雨滿高樓。端居卽是登高地。久客難爲致遠謀。三峽關河猶閉置。少年兄弟各飄浮。未遑將母虛歸計。一點心魂尙九州。

還鄉雜詩

華表前頭一鶴歸。依稀城郭是耶非。九年水火誰相問。萬里關山願已違。匝地瓜蔬新宅廢。小時坊里至親稀。鄰家老婦猶能識。笑指修髯汝尙肥。
南門矗立菊花臺。萬骨堆成事可哀。遠近新墳添怨鬼。參差老樹剩殘梅。偶逢降虜垂頭過。時見村人笑

口開獨向佳城私敬禱。孤兒初自峽中來。
成賢國學我重經。一雨難消劫後腥。古寺還依北極閣。荒庵不見德風亭。此中士女衣如雪。當日兒童鬢
失青。惆悵十年辛苦地。天涯師友半凋零。
丁字簾前酒一卮。未曾聞笛早成癡。黃墟再到山河渺。白蟻徒翻桑海思。千載興亡彈佛指。六朝烟水對
蛾眉。後庭高唱秦淮月。化淚中腸衆不知。
挾杖從尋趁夕陽。豪華過眼信無常。頽垣下泯鷓鴣迹。亂瓦中支花石綱。寺壁紅泥增想像。霜風白日助
悲涼。外家舊夢錫籥裏。炊熟黃粱飯不香。
一掉頭間便九年。海天峽月百回圓。會無高議驚朝士。剩有蒼髯拂錦箋。洛蜀由來勞夢寐。越胡何日靖
烽烟。自慚先作還鄉客。又望陪京路八千。
暱我虹蜺兩女孫。傷今父輩幾人存。蘭芽漸茁新庭院。鴨翅還登老瓦盆。淺淺梨渦含淺笑。微微櫻綻近
微醺。吾家往事吾胸熟。酒罷虹來習舊聞。
詩酒風流海市空。重來惟見兩衰翁。萍蓬至竟分難聚。溝水猶然西復東。始信墨巢尊碩果。尚憑劍氣慶
元豐。未知一代文章業。大筆誰成開國功。謂李拔可夏劍丞一先生
劫後來歸詠冶城。異時笙磬亦同聲。元戎與話洪楊劫。晚進頓忘金蔡名。倘得風人歌小雅。何須花月飾
承平。蔣山無恙秦淮碧。半壁東南孰啓明。

乙酉除夕始得飛返陪都機中作

雨打風吹一味寒。天衢聊比世塗寬。海南漠北三除夕。庚辰此夜宿陳倉。壬午在侯官楚尾吳頭萬疊山。隨處爲家無不可。甯能相忘幾回看。長懷父老殷勤意。瀾倒徒傷出手難。

渝州元夕 丙戌

山城八度元宵節。今夕傾城笑語偕。鑼鼓燈籠人耳目。上清寺接米花街。先生挾杖出沙坪。一路歌聲爆竹聲。始憶今宵是元夕。銀花火樹礙人行。瀉如流水金錢板。插上花枝怕裹頭。一樣蓮船舵把子。春江風月古渝州。

次韻和孝威將軍壯懷詩

羽書一夕出青徐。歌舞魚龍氣勢纒。同室戈矛聊復爾。彌天風雨欲何如。掌中空畫平戎策。眼底重翻相斫書。安得武陵容我輩。壯懷銷盡獨躊躇。

南京市參議會初集香鋪營民國十六年蔣總司令

駐節處也誠彰屬記以詩

扶疏槐影舊池臺。劫後江南今又來。芹曝安排從二老。謂伍仲文張簡齋。一丈笛風懷怨尙多哀。元戎旌節經時駐。我輩舟車異地回。歷歷十年成噩夢。賸埋白骨土千堆。

烏魯木齊夜宴索詩余起舉盃誦二十八字中土之

七言絕句猶波斯儒拜體也

蒲桃美釀胡旋舞。西域當年各有聲。四海一家今日事。天山爲我證斯盟。

迪化月夜

烏城六月十三夜。啼哭有人在月下。誰家畏吾好女兒。逼我生離何爲者。月子從來照九州。照人歡樂照人愁。今宵也照伊犁水。不向東流向北流。

樓望

十六天山月。當樓白玉盤。垂雲疑近樹。深夜尙憑闌。塞上烽煙靖。人間袖手看。明知時有缺。所願永團圓。

聞道

北庭久絕中原訊。聞道徐州正合圍。西域亦如小中國。高樓無奈入斜暉。流離道路從生死。割據關山孰是非。一紙家書曾未到。懸知望我此時歸。

飛度天山遂抵阿克蘇

俯覽三千界。天低山愈低。星星眼底綠。掠影過焉耆。
天山未是山。茫茫比碧海。一峯一波隨。射日生光彩。
一線庫車河。浮翠環如帶。不作雪邊人。已落天山外。
稻米白於珠。南疆阿克蘇。還留溫宿住。萬樹入平蕪。

庫車嘲嚴五監察 敬齋

信有妹哥花一朵。摩挲老眼愛花看。沙洲安得無窮綠。心地能如大漠寬。偶爾笑談見風骨。知他疆土別
炎寒。生來強項搖難似。且試腰支學小蠻。

庫車聞歌吸血鬼慨弊政民怨之深也

未到蓋棺論已定。爲能吸血鬼名歸。古來只見甘棠樹。讓汝生前鑒是非。

發庫車前夕奉酬宋將軍蔭國 希濂

六月天山南北路。計程明日入焉耆。登盤隨處逢瓜熟。攬鏡經年點鬢絲。收復河山功已就。籌安邊鄙義
難辭。儒冠誤我心徒悔。又逐流沙枉費詩。

再似蔭國

將軍雅好放翁詩。爲戍輪臺老去思。南渡已無河朔地。冰山鐵馬夢空馳。

焉耆者爲左專員曙萍題冊子

洛靖恩波被西域。餘光今又看賢孫。白楊千樹焉耆水。一笑相逢在鐵門。

庫爾勒道中口號贈蔭國

麗貢曾登最上層。手提一旅克龍陵。年來試馬天山下。未竟邊功薄仲升。

贈徐汝成將軍爲率國軍入新疆第一人

整齊師旅出關來。麻納斯河却敵回。安定北疆功第一。兩年堅苦戍奇臺。

喀什噶爾別張關長裕如阿圖什歐陽縣長兩夫人

味茶如薺託邊城。何媿肩戈萬里征。草底牛羊非異域。林間絃管盡新聲。歸心日夜關山遠。回首鄉園花柳明。且住爲佳吾敬慕。女兒能致丈夫名。

紛紛

尊前試按伊涼調。莫悔西陲勃罕行。人到酒泉郡漸省。月經嘉峪關纔明。空言難抵籌邊策。絕域終當置重兵。掛眼紛紛徒亂意。此時不飲我何成。

西域雜詩

伊甯發難廿人耳。阿山塔城相繼失。一旦馳突向綏來。委曲求全有今日。君不見漢唐西域服以威。恩威兼濟衆心歸。甯恃孤恩守邊陲。設省未及七十載。新疆不名抑可改。自昔西域國之西。東土爾其名殊怪。君不見斯坦一一屬鄰邦。名不正兮聲不揚。錫汝嘉名固邊疆。非以爲寶和寘玉。非以爲寶焉者馬。堂堂西域我國門。敢越雷池窺諸夏。君不見大漠黃塵白日昏。陽關古道少行人。中朝何以安邊民。

蘭州雜詩

復見河清終有日。關山帶礪尙如今。玉門生入邊人歎。只惜文襄枉費心。宿澄清閣
西從烏嶺下蘭州。漸近中原豈解愁。悵望天山千里雪。幾人未負少年頭。
投老耽吟高達夫。流傳佳句徧江湖。眞從淡處標風骨。沾溉詩壇道不孤。題高一涵金城集
出山泉濁在山清。裝點山林負盛名。開創黃冠小天地。何須台閣濟蒼生。五泉山懷劉果齋
遺蛻興龍壯大千。英風消歇亦千年。我來高詠天山句。一試人間太白泉。游太白泉

興龍山謁成陵

大帝威名舉世驚。金戈所向兩洲平。千秋獨啓風雲局。宇內猶傳父子兵。如此霸才難再得。或疑嬴政卽

前生辛樹巖語胡蘭更出虞姬上。曾受降王馬首迎。

靈山

誰道尋芳去。又來山中十度見。花開。盧生原是靈山侶。此入靈山第四回。

井二村謁曾王母墓作 丁亥

鄉關一別十清明。纔向梅岡載榼行。眼底莊田隨劫盡。更無喬木厭言兵。
焚黃南陌走村童。昔日兒童今已翁。我見墳丁易三世。未知物變鄉風。
地老天荒井二村。墓門羅拜跪曾孫。抗塵萬里歸何晚。四十無成最負恩。

憶甲戌秋與梁鴻志黃李宣李同遊後湖。梁有句云。溟渤年來一半輸。淺濠單舸着吾徒。盧生倚醉矜

豪語。準備他年主此湖。不三年而盧溝變作黃。既伏法。梁亦叛國。幸九年龍戰。終獲收京。余從亡萬里。得慶生還。頃文伯招尋置酒。重至湖上。小艇夷猶。感而有作。

天放盧生未老歸。湖山依舊鬪芳菲。當時不受黃梁枕。十載重敲白板扉。失著楚齊空墮劫。能收溟渤願無違。卽今始信非豪語。夕照菱洲柳臂肥。

雜詩

愚公不用移山力。輕薄猶持煮海心。要爲蒼天乞霖雨。願君慷慨莫沈吟。
伏闕呼天涕泗陳。少陽已現宰官身。可堪俛仰成今昔。一輩新人換舊人。

紅冰詞拾

鳳皇臺上憶吹簫 遊鳳游寺懷李供奉

盧冀野詞翁印象

乙酉七月廿七日 冀野



(繪愷子豐)

晉代衣冠。吳宮花草。算來多少春秋。認三山天外。二水分流。白鷺洲邊弔古。人已遠。鳳也難留。重臨處。雁歸桃渡。星點瓜洲。凝眸。斷霞錯綺。天際望江陵。千里悠悠。念舉杯明月。散髮扁舟。謾浪說騎鯨往事。乘風去。好自遨遊。猿啼岸。輕帆過盡。負手江頭。

小桃紅

侍霜匡師太平門外訪桃花

莫道青衫薄。莫負春花約。江南三月。綠楊城郭。

况青山灼灼。徧桃花。且盡花前酌。空裏鶯聲落。枝上紅絨托。鬥草光陰。禁煙時節。金粉樓閣。羨十里鬪紅粧。唱徹迎春樂。

霜花腴 和夢窗

燕歸聽笛。記往時堂前。王謝衣冠。三月鶯花。一城梅雨。尋芳策馬偏難。綺懷疆寬。倚小樓羅袖風前。指雲山一角清涼。斷橋流水。釀春寒。時節到今難說。早青谿瘦柳。換了歌蟬。簪菊籬邊。樓香樓外。愁心待寫。濤箋恨無畫船。載小紅煙月。嬋娟問么。蟾不少。憂思倚欄誰共看。

浣溪沙

中秋前夕飲筠丈家

湖海飄零一少年。芒屨歸後故人憐。黃花消瘦夕陽前。客裏襟懷如病酒。夢中風雨未寒天。不辭殘醉落吟鞭。

偷聲木蘭花

月圓花好相思老。一夜風涼憔悴了。謾訴歸舟。縈得阿儂樓上愁。嬋娟不怨秋娘妒。夢冷霓裳人散處。萬疊雲山。新雁蕭關還未還。

鵲蹋枝 三首

鎮日凝粧。簾怕捲。點點殘紅。飛入誰家院。莫道飄零君未見。昨宵風雨停針線。南國煙花千萬變。無定陰晴。芳約朝朝換。經醉湖山天不管。流鶯空有春雲怨。芳草天涯猶似昨。未老韋郎。依舊成飄泊。如此江山原不惡。歸來恐化遼陽鶴。陌上花開春有約。楊柳千條。還是依城郭。愁到湘樓盃酒薄。不許浪說還京樂。

一種蛾眉何處認。月到初弦。蝶去無芳信。今日西園重過問。東風吹起桃花陣。拚得相思紅淚損。鶯燕樓臺容易韶華盡。閒倚闌干多少恨。無端又是黃昏近。

臺城路 夜坐小齋感賦

平生心事從頭說。青衫淚痕多少。走馬求名。挑燈訴怨。如此勞人草草。孤雲自好。祇兩袖風懷。一囊詩料。奄忽春光。依稀歡意。怕人曉。滄桑彈指。閱徧認兒時巷陌。遊屐猶到。雨滿江城。雲迷驛路。嬾向長安西笑。黃鸝正悄。有千百橋西。一聲聲早。未白秦郎。可憐春夢老。

點絳脣 戊辰除夕與中敏集曹全碑字成此調不匱先生爲書之

萬里人歸。故鄉華事年年早。酒錢還少。且訪長干道。桃葉桃根。舊事商量好。休相擾。子規重報。不任劉郎老。

減字木蘭花 己巳三過姑蘇訪兒時故居齊門感而爲此

鐘聲帆影。映水垂楊搖不定。拂水飄絲。又向長堤試錦鞮。華嚴彈指。三宿而今成隔世。紫陌東邊。一夢匆匆十六年。

洞仙歌 賦柳寄中敏白門

飛青楊翠。正江城春早。陌上柔條更多少。散輕絲阿那。手種扶疏。官渡畔。苦憶建安人老。風雲還似昔。

舞向東皇。葉底金衣弄音好。舊館築忘憂。白日遲遲。吹清管相看一笑。歎轉眼韶光去如流。怕別後長堤。阮郎猶到。

銜街行

悲思閣呈疆邨先生

柳絲不挽韶光住。忽灑廉纖雨。愁邊燕子又歸來。萬一春懷如故。故家何在。白頭吟望。往事憑誰語。風雷抗疏傾寰宇。今日西台去。乘槎攜得海天雲。夢裏光陰炊黍。冬青依舊。斜陽黯澹。莫問前朝樹。

淡黃柳

詠寒山限夙職韻

西樓一角。猶弄傷心碧。不見圖中驢背客。看到斜陽淡淡。遙想倪迂舊顏色。朔風急。殘鴉半天黑。望村落晚烟直。恨鐘聲閣住疏林隙。野寺歸來。四橋回首。應有梅花信息。

壺中天

成都秋思

出南關去。認橋邊紅葉。殘陽在樹。拍徧闌干愁未已。負手市樓無語。萬里秋歸。枕江酒美。依約來時路。漁歌向晚。聲聲却笑羈旅。最是零亂風燈。幾回悵惘。低誦周郎句。屏掩孤顰雙淚濕。凝小猶憐兒女。屈指行程。牽衣問母。不識還如故。相思兩地。也應一樣朝暮。

西河

金陵感舊次清真韻和邵次公

歌吹地。秦淮舊事猶記。烏衣巷北小紅樓。畫船沸起。淡籠月色榜聲中。笙簧遠度空際。露闌畔會悄倚。

玉驄柳下重繫山園故國一周遭。旌旗四壘大江日夜繞南朝。抽刀難斷流水。蕊宮夢起貝貨市渺當
初花外坊里幻想百年身世問明璫豔迹何人還對桃葉桃根寒烟裏

水調歌頭

紫老歸來自傷遲莫念其少日聲華浮沉宦海都如夢寐余感其言譜成
此解本東山台城游體並依四聲

喬木繞荒井夕照下長亭前游重省碧紗籠句獨關情猶記東方千乘撤却陶家三徑孤負歲寒盟爭解
羅欄冷不似老書生更何年閑淪茗別銀燈當時優孟如今應自換猩屏吟過雲林新詠還唱歸田小
令垂老莫聰明纔有尊鱸與雙鬢已星星

浣溪沙慢

甲戌三月映厂爰居霜腴偕至真如張氏園先後作此調余與榆生復廣
和之

淺碧映鬢色輕粉添眉嫵廢園半角花柳驚如許塵黯樹石閣住黃昏雨知道春成土前度老劉郎怎重
來天桃換主且行去問道士玄都謾看花太息斜陽易沉紫陌去流光莫倚徧畫闌荒了冶游路獨恨
啼聲苦噉到血乾時却誰憐枝頭杜宇

倚風嬌近

映厂爰居既相約賦舞詩鐵尊譜爲此調用草窗聲韻爰倚和之

跳月無聲市樓低按金縷歛燈初起回風舞相識可知情倚玉繞雲屏一瞥娉婷帶素含顰眉嫵
輕移難得驚鴻過處新曲隨雲無據倦眼蛻虹障煙霧覓裳譜袖邊暗濕薔薇露
狐步

八聲甘州

林子有詠庵填詞圖

數南來斷雁寫遙天。不知幾人歸。賸無多好景。斜陽催暝。冷換荷衣。清夢西風俱老。吹淚付烏嗁。一髮青山遠。入眼還非。莫念蓬萊婀娜。歎平生蹤迹。漚鷺都疑。祇商絃獨響。霜鬢苦成絲。幻蜃樓沈沈海市。算廿年彈指已堪悲。千秋事。託逋仙筆。寄我相思。

泛清波摘徧

海上歲暮次勸鶴均

冰花擁草。臘鼓催年。人海半生藏未了。俊遊如昨。幾點寒燈。夢回早。憑誰道。荒橋賭酒。孤館停歌。偏是近來。懽意少。譜入鷓鴣弦。尚覺商聲動。離抱瑣窗悄。羈旅縱忘。故家路徑。漸迷池沼。挑菜歸時。畫中燕鶯都老。暗情裏。依舊共飾太平。烏衣巷。邊重到。祇怕銅壺漏滴。夜長難曉。


中興鼓吹選

中興樂


代序

漸覺摩胸劍氣沉。問誰肯作狂吟。辛劉語。冷落到而今。余心。

新詞鼓吹中興樂。雄風託莫嫌才弱。將我手寫



蜀刻本中興鼓吹之一頁



中興鼓吹手印 (張鏡明作)

滿江紅

送往古北口者

如此乾坤。當慷慨悲歌以死。君不見胡塵滿目。殘山賸水。萬里投荒關塞黑。幾家子弟揮戈起。問江淮若箇是男兒。無餘子。且按劍從新誓。豈肯洒英雄淚。縱天乎亡我。死而已矣。叱咤風雲驚四海。憑君一洗彌天恥。細思量三十九年前。傷心事。甲午去。今且四十年矣。

水調歌頭

君左集民族英雄故事勵士氣

說與諸年少。涕淚早滂沱。吳山立馬相待。劍影共婆娑。千古英靈不昧。一點丹心不滅。前進莫延俄。不見梅花嶺。俠骨九原多。惟壯士。弔雄鬼。更高歌。指劉侯樹。擊韓王鼓。收拾舊山河。皆書中所述故事。留取人間正氣。不負平生師友。一挽魯陽戈。行矣諸年少。頑虜奈吾何。

臨江仙

讀劔南詩稿

一髮青山愁萬種。干戈尙滿南東。幾時纔見九州同。縱教空世事。世事豈成空。胡馬窺江陳組練。有人虎帳從容。王師江上鎖相逢。九原翁應恨。世上少豪雄。

木蘭花慢

嘉靖三十三年四月。倭寇猝至崑山。由三江口薄東關。邑令堅守。寇不得逞。轉攻西關。垂破矣。忽有一老父進曰。以沸桐油從月城隙下之。可擒。如其言。果大破賊。其後有過卜將軍祠者。睨其像。則西關老父也。案卜名珍。字文超。唐時西河人。今年四月。余來游。縣長江右彭百川爲言其事。感而詠之。

過關人怪問。此老父是耶非。想生是英豪。死爲雄鬼。不媿神祇。當時事。今未見。但窺江胡馬疾如飛。只道和戎無奈。偷營有計誰奇。書中咄咄淚沾衣。報國願終違。對江上安亭。震川故里。堂中素履。亭林遺物。墓草離離。知己若逢地下。說人間近事。更堪悲。約與使君明日。虔誠先拜靈祠。

沁園春

玄武湖晨與東野攜侃兒游

幾日商量。且自拋書。回湖上來。趁拂涼初曉。朝陽未起。飛輪奔走。如挾風雷。弟謂晴湖晨游最好。百畝蓮花。一夜開出。城後果碧荷滿眼。錦繡千堆。當年我寓南齋。記日日來游。不計回對雞鳴古寺。欽天廢閣。沉思往事。但覺傷懷。招手扁舟。一時容與小飲。何妨借酒盃。兒無忘。倘東頭日出。汝莫徘徊。

鷓鴣天

江小鵝招游靈谷寺遂至孝陵

陵谷千年幾暮鴉。人王佛子兩無家。舊時綠鬢驚華髮。今日紅梅傍菜花。
初月上。晚烟斜。眼中老樹尙
槎枒。丈夫敢忘功名事。肯向東陵學種瓜。

點絳脣

雨中過岳墓撫古柏

柏已參天。千年還傍君侯墓。艱難國步。誰向君侯訴。
欲乞侯威。下拜精忠樹。風雷怒。一時大霧。隔斷門
前路。

點絳脣

聞綏警書憤

無降將軍。衝冠一怒安吾土。戰旗開處。戰士皆歡舞。
慷慨而前。壯氣吞雄虎。堂堂去。吾何懼汝。藐爾穿
牆鼠。

點絳脣

招西北之魂

一髮江南。笛聲吹老愁懷抱。柳絲環繞。飛絮知多少。
願汝歸來。願汝歸來早。百靈廟。連天衰草。塞上風

光好。

點絳脣

百靈廟既收復更招東北之魂

鴨綠潮寒。奔流不盡酸辛淚。雄關衣被。尺寸傷心地。一別遼陽五度春秋矣。沉沉睡。白山黑水我欲呼之起。

謁金門

爲蒙古少年格君作

歸不得歸也可知何日。草底牛羊關塞黑。東風吹夢隔。見說浮雲西北。不見舊時相識。拍徧闌干寒惻。惻天涯腸斷客。

沁園春

論詞示夢野

弟學詞乎。今日而言。豈同曩時。算花間綺語。徒然喪志。後來李賀。搔首弄姿。歎老嗟貧。流連光景。孤負如椽筆一枝。自南渡。始天生辛陸。大放厥辭。於戲逝者如斯。念轉益多師。吾所師。便白石揚州。遺山并水。

豪情逸興併作雄奇。天下興亡匹夫責在。我輩文章信有之。如何可爲他人杼寫。兒女相思。

沁園春

伯鷹投詩有血戰文壇亦一奇之語因廣其意以報

欲問東坡人海一身。其何可藏。想平生抱負。使君與操。幾親戎馬。猶復登壇。氣奪三軍。才吞五嶽。豈惜譏彈。感孝章。凌雲筆。如萬流奔赴。推倒瞿塘。古人莫笑余狂。看舊日文場。今戰場。便揮毫掃蕩。已成鬥士。或誹李杜。或薄蘇黃。直廢周秦。無論漢魏。不是吾儕孰主張。三千載。祇精靈未泯。尙吐光芒。

摸魚子

題史督部絕筆家書後

是何人手澤如此。斑斑淚也。還血雖然和墨。無多語。落筆盡成嗚咽。心似鐵。情怎絕。所難忠孝兩無缺。國籬未滅。祇飲恨吞聲。與城共命。先不負臣節。揚州路。剩有梅花勝雪。登臨多少詞客。縱教解得萇弦碧。誰識孤懷芳烈。空悲切。東廠獄恩師當日。丁甯說。千回百折。讓一紙流傳。相逢異世。催我羽音發。

臨江仙

三月十日示侃兒二首

阿侃今朝都十歲。驚心我入中年。堂前老母笑而言。當時兒性劣。最是太婆憐。兒亦有兒還肖父。願他

比父猶賢。文章不值一文錢。父書汝莫讀。汝祖已云然。先君南樓雜詠。有生子當如李亞子。胡爲亦讀乃翁書之句。

阿侃何知天下事。已如不繫之船。做人今後勇爲先。艱難容百忘。擔當仗雙肩。紙上談兵終可笑。成功豈在多言。休嫌赤手與空拳。從來窮則變。立志要能堅。

鷓鴣天

出門

十字街頭立足難。出門未覺世途寬。去留不盡躊躇苦。左右都成罪惡觀。荆棘裏。豈能安。明知艱險一盤桓。男兒要有剛彊氣。肯便隨人掉首還。

鷓鴣天

村居作

世局如茶自在看。懷中有缺不須彈。能爲狂士終豪傑。豈必才人盡達官。傾濁酒。坐蒲團。布袍大袖本來寬。十年嘗徧江湖味。縱使無魚也可餐。

鷓鴣天

北湖偕達雲游

北面鐘山一髮青。綠柳迴抱古臺城。湖山合有英雄氣。林木時聞剝啄聲。春夢遠。暮潮生。踏歌堤上女郎行。休將玉樹南朝曲。唱與潭州宿將聽。

水調歌頭

右任先生今年六十。中國公學諸生稱觴以祝。卽席所致辭。語至可味。爰隳括入詞。俾開國佳話。流傳久遠。兼寄先生以爲壽。

猶願供鞭策。自視尙如牛。但知耕種。不計春稼與秋收。三十年來飄蕩。幾萬里程奔走。辛苦果何求。爲解蒼生困。還我舊神州。聞此語。思奮發。有吾儕。掀髯一笑。或許年少可同謀。收拾邊氛事了。整頓炎黃家業。未雨待綢繆。異日公稀壽。高會勝茶樓。樓在莫愁湖上。爲中山王建也。

百字令

讀馮玉祥悼佟趙辭復爲鞞章弔麟閣將軍。將軍亦基督教徒。

備嘗艱苦。在練兵當日。憤然而作。二十六年多少恨。將軍從戎自民國元年始。只恨吾民溝壑。西來頑寇。鐵蹄所至。無不窮其虐。人間地獄。幾回默誦新約。我祝永久和平。我懷博愛。我願先鋤惡。勇士喪元原。不忘犧牲以求復活。上帝鑒余式憑忠勇。與敵還相搏。裹君馬革。他時畫像麟閣。

滿江紅

寶山之役

斗大孤城。竟一日化爲碧血。今又見田橫忠義。張巡節烈。六百士當千萬敵。出生入死。吳淞缺。聽子香奮臂一聲呼。君休怯。彈已盡。槍雖折。頭未斷。心還熱。况此城與我。存亡關切。有我不能寸土失。要知吾土堅如鐵。載姚營他日史書存。歌先發。

滿江紅

斧頌 王禹莊少將言前方巷戰已易刀爲斧。所至輒勝。余嘗誦刀之威於斧。亦可無詞。狹路相逢。問出手燦然何物。依舊似大刀。英雄神威無獨斧也。關開新戰線。倭兒見者吞聲哭。但落頭如草。不聞聲。堆成簇。前隊上。後相續。仇易盡。心難足。念丈夫本色。包羞忍辱。到此纔酬卅載恨。運斤還羨風來速。是誰家手法有真傳。真圓熟。

詠棉背心

予倩作山歌有云。拿起線來抽起針。想起我前方作戰人。不繡鴛鴦與胡蝶。替他作幾件棉背心。又云。一件一件的棉背心。也表愛國一分情。願身化作棉和絮。與我戰士共寒溫。余感其言。詞以詠之。

着意裝棉。手中線針針縫起。聞道是沙場霜重。夜涼如水。儂願化身成輦絮。寒溫與共。秋風裏。箇兒郎爲國作干城。眞英士。我欲問。前方事。知推進。若干里。料禦寒送到。這包衣褶。勇氣益增千百輩。鼓鼙還我山河美。是衣中縫就熱心腸。非棉耳。

滿江紅

謝晉元團附楊瑞符營長共死守閘北據點者八百士

尚有孤軍留最後鮮血一滴。準備着頭顱相抵。以吾易敵。蘊藻浜前鉦鼓動。蘇州河上旌旗色。看青天白日自飛揚。君應識。衆口誦征倭檄。望閘北。兒童泣。問橋頭大廈。近來消息。萬國衣冠都下拜。千秋付與如椽筆。記張巡許遠守睢陽。今猶昔。

滿江紅

聞達雲已率所部上東戰綫矣

佛子書來。謂我友親提勁旅。昨日已陳師東綫。氣雄於虎。古北威名天下重。江南殘敵囊中取。待前方捷報到于湖。盃高舉。如痛飲黃龍府。破陣樂。添新譜。更招尋嘯傲。舊時遊侶。能賦兄猶辛棄疾。談兵弟媿陳同甫。恥和戎。豈似紹興年。應心許。

滿庭芳

喜聞蕪湖收復訊

藉麓塵昏。陶塘柳暗。舊時風物依然。却憐殘月。盪影照難圓。回望浮雲老樹。揮手處。零雨沈煙。憑誰問。一江流水。流轉是何年。初聞襟淚滿。猶疑夢寐。乍覺狂顛。但詩書漫卷。笑語窗前。落拓江湖未久。道今日

還我山川。青春伴。收京可待。悲喜不成言。

探春慢

踏雨過王陸一逆旅。陸一握手歎曰。金陵之別。豈意遂相見於此乎。余感其言。託詠垂柳。次姜白石去沔陽時自度曲調。依依之情。殆過無不及焉。

閒却靈和。繫情碧浪。離枝都成飛絮。冷燕泥歸。荒江萍碎。零亂東風不語。過了清明節。已三月。煙花誰主。故人今夕重逢。小樓深處。春雨。迢遞天南夢斷。吹酒旗十里。輝映金縷。翠幕輕遮。龍池在望。鼻娜幾家兒女。空綰同心結。算只有游蜂無數。白李天桃。相憐拋擲何處。

臨江仙

漢口待張佛千至

邂逅于湖纔幾日。眼中風景頓非。扁舟載我到無爲。死生何足計。老幼此心危。東去西來良自苦。有時淚滿征衣。逢人不敢問兵機。收京如可待。先送一家歸。遙指武昌城外雪。過江有箇人來。殺雞煮酒早安排。聽譚東戰線。笑口爲君開。虎擲龍拏親眼見。豪情足傲吾儕。雄兵早晚渡長淮。定能行宿諾。奮臂與相偕。

賀新郎

張適令世希談昔年上海之役

誰識降魔手。鷲相逢。匆匆行色。渡沔而後。百戰光榮歸抵掌。笑我馬牛空走。說海上當年馳驟。會向廟行提一旅。抗烽塵與敵周旋久。停不住。懸河口。伸眉今夕燈前。又喜將軍依然年少。掛符於肘。熟讀六韜。裨世用。驕虜終成芻狗。更無忘巴山詞友。待到收功償夙諾。問橫戈躍馬人來否。玄武外。一尊酒。

賀新涼

五月二十五日記事

久亦齊生死。便埋身一抔黃土。等閒間耳。只惜未能將革裹。孤負平生豪氣。剩一點丹心無味。自此從容歸上界。信詩書沾溉垂危際。何苟免。我行矣。鋼鶯過盡羣呼起。戴吾頭。歛魂收魄。又來人世。但覺眼前森鬼域。彈片槍痕而已。炸不了。堅強意志。以齒還牙。終必報。肯投降。屈服非人子。重誓約。洗茲恥。

齊天樂

二十九年三月于役老河口李德鄰將軍招飲秦村席上賦示第五戰區諸友

樊襄千古英雄氣。征衣早迎東路。落照中條。凝烟宛洛。旗擁青山無數。愬愬鉦鼓。過光化嚴城。暫時停駐。一角秦村。小窗殘共晚來語。台莊前事記取。突圍飛萬騎。呼嘯歸去。勝概如虹。精忠貫日。都是風雲兒女。三年內渡。募重過臨淮。酒邊深訴。不待聞鷄。只教琨起舞。

醜奴兒

聞湘北三捷喜而不寐

汨羅江上橫天塹。一捷長沙。再捷長沙。三捷長沙不自誇。
歌鐃喚起中秋月。照見君家。又見君家。薛字軍旂出海涯。

臨江仙

三十一年七月七日作

天上鵲橋兒女事。人間但說盧溝。當年於此啓戈矛。斑斑留血債。種種記仇讎。星火燎原閒戲弄。算來五度春秋。要看來日整金甌。黃河鳴咽水。流到海東頭。

三戰長沙應未忘。捲濤挾浪而東爭。從龍虎一江風。豈徒規半壁。定使九州同。

漳國勛勞千古壯。楚弓極日嶺雲猶。鬣鬚珠江日夜何聲。王師一旦下羊城。台琉歸故土。不獨復思明。

漳國勛勞千古壯。楚弓楚得能名。好憑頭血滌羶腥。南疆方足恃。海上出奇兵。

勝券在操今已再。去年師出仰光寒敵膽。揚威薩爾溫江。能摧強暴。卽沙場微華無正義。忠勇示盟邦。

十二月八日前我抗戰已達勝利期。後此卽同盟國共同作戰之日也。陸沉第一扶桑。幾回西望海茫茫。築台高萬丈。共受德倭降。

探春慢

蜀中憶北巡之樂次白石韵

持節初過。叩關徑出。東風吹翰原野。奪眼黃河流。天大月。曾記茅津上馬。太息兵間走。問何意容君抒寫。中條千古山川。笳鼓聲裏閑話。還似當時洛水。驚景物。漸非。杯酒重把。玉殿虛無。銅駝荆棘。縱是好春難冶。迤邐荆襄路。載滿鬢。緇塵南下。肯自思量。梨花開。又今夜。

清平樂

三十二年一月在永安聞我與英美締平等新約收拾百年世局安得而不喜也燈下寫付諸生歌之

普天同樂。平等成新約。血戰六年吾不弱。桎梏一時除却。並肩共赴疆場。從今盟友相將。試望太平洋。上青天白日旗揚。

齊天樂

于山謁臧公祠

當門野意晴空闊。神龍羽旗低護。紀效新書。蒞戎要略。猶見登壇風度。親裁奏疏。便無敵名聞。義烏初聚。陣出龍山。果然一戰使倭懼。榕城羈旅。却後歎亭留醉石。吳客空慕。飲至何年。白雲在望。春滿婆娑雙

樹歌傳道路。願覓箇封侯。壯懷如故。誓海盟心。莫忘元敬語。

念奴嬌

八月十三日感懷用東坡韵寄達雲桂林

那年今日。問將軍眼底。跳梁何物。血肉長城東海上。是我銅牆鐵壁。寸土黃金。頭顱甯惜。戰地飄紅雪。大場埋骨。可憐年少英雄。遙想毅魄歸來。無名墓道。菟草芄芄發。不見甌完身。早死。不見倭奴摧滅。三峽淹留。兩京未復。白了元戎髮。也應含恨。吳淞江外殘月。

菩薩蠻

歿存四首

季鸞手執陳琳筆。兩儀街上初傳檄。仲叟髮如銀。高呼老子軍。懸河奚若口。掉臂滇南走。異日說三張。齊東語應詳。張檄章張一慶張奚若

蟠胸知有羲皇史。生前落墨無多紙。香草祀蚩尤。重逢話汴州。雄談驚屋瓦。亦是能言者。筆壘護東南。今年四十三。胡石青胡健中

飄然日向城中醉。一官未抵閒滋味。意氣老來平。千杯出性情。魯生長偃蹇。卷舌爭無辯。舌底有蓮華。男兒莫戀家。羅文翰羅隆基

長安閱遍公卿相。貧無錐立詩猶壯。心血賀徒嘔。可憐廣不侯。還思今檢校。落落多才調。明日過衡廬。

狂歌共酒徒。李仙履李中襄

鵲踏枝

三十三年十一月十五夜書

伐桂爲薪還折柳。會幾何時。斧落他人手。爲問吳剛今在否。昂頭欲向天追究。莫道清輝如白晝。雁過衡陽。一去千回首。只怕烏雲遮蔽又。惱人最是三更後。

揚州慢

題包達倉蹇驢運彈畫卷

貂帽綿鞋。步槍灰褐。此翁跋涉千山。儘風塵面皴。有血碧心丹。向長白松花道上。十年遊擊。無改容顏。且牽驢一箇。揚鞭吾又南還。大河戰友。臥空壕。星枕霜餐。縱九死奚辭。同仇敵愾。驢亦欣然。背送彈丸來。到投將去。火海飛翻。踏扶桑明日。振衣重出榆關。

永遇樂

送陳納德將軍返國用稼軒韻

驅海鞭江。騰雲擎日。天外來處。隊整遙空。簇新堡壘。取次扶搖去。名題十四。威聞世界。吾願健兒長住。七年來。坤乾運轉。論功第一飛虎。己饑己溺。蹈湯赴火。難得義無反顧。戰鬥千場。氣吞三島。歷歷航行路。

暫時言別。廣陽壩上響。徧簫鏡。鼓爭相問。明年此地果重到否。

北望

盧冀野詞
林玲曲

Andante *dim*

忍與共聞外日對梅枝望台極憶白山草
除却年後無別味教人北望添憔悴
家聲於今時獨醉高池江湖邊是流離淚
情妙風來分向背花法有羞心未

城。中。傳。毛。澤。東。雪。詞。柳。亞。子。易。君。左。先。後。和。之。寒。夜。燈。前。依。韻。成。此。

白。雪。何。辜。黑。水。纔。收。碧。血。還。飄。念。無。端。起。釁。予。懷。耿耿。何。時。安。息。天。下。滔。滔。地。割。鴻。溝。名。題。雁。塔。越。是。培。塿。自。視。高。朔。風。裏。祇。花。飛。六。出。那。算。妖。嬈。如。今。夢。想。多。嬌。看。萬。紫。千。紅。柳。舞。腰。惜。殘。梅。數。點。經。霜。憔悴。孤。松。貞。挺。顧。影。蕭。騷。日。落。荒。江。柝。傳。遠。戍。大。漠。盤。旋。隼。與。鵬。冬。將。盡。待。蘇。回。九。九。春。到。明。朝。

沁園春

凱歌聲裏

舊多角小上組
今改用六字調

盧前漢詞 楊隆潤記曲

正叨叨令

莽烽煙滿目就驚怕。他艱辛說不盡流亡話。誰料得

八年一旦功成作。從頭起思量多少堪悲詫。兀的不笑殺人也麼

哥。兀的不樂殺人也麼哥。今日箇凱歌聲裏人東下。

于右任先生題北游草墨迹

題于右任先生北游草

仙居宜可生草也。這可是箇知都

這可日馬與王。這可箇言書老

此輩推宗匠。這可箇詞後進

希子望。這可箇婢頻

相識。這可箇吹會其誰況

北遊草

發重慶

（越調凭闌人）昨別元戎今出征。通遠門前行未行。看天雞已鳴。雞鳴天放晴。

沱水夜渡作短柱體

（越調天淨沙）行蹤壁水匆匆。重逢已擁窮冬。潮涌漁篷暗動。晚風寒重。望中燈弄春紅。

却後成都

（仙呂遊四門）停車夜入錦官城。重向御街行。暗中空想樓臺景。荒闌獨心驚。腥血債記分明。

夜半曲戲余景陶家菊

（南呂闕金經）夜半先生起。無門喚奈何。掀徧人家熱被窩。摸碎滂破。所幸插瓶多。

蘇廬聽賈瞽者道情

（越調天淨沙）短前漁鼓傳情。木皮簡版丁丁。狀出河梁夜景。未歌先哽。停盃四座無聲。

車過桂湖不入因念庚午春日之游

(雙調河西水仙子)聽鶻曾賦桂湖詩。風雅一門共此祠。楊廷和父子慎夫妻皆詞人重來只不見劉夫子。謂燈泉誦陶情曲幾支。

過德陽姜孝子故里

(雙調河西水仙子)孝泉坊樹漢姜詩。想見安安負米時。劬勞我未報猶人子。念親恩愧在斯。

白馬關龐士元祠墓

(仙呂遊四門)同心匡復漢山河。謹慎武侯多。粲粲臣統才何大。無命奈天何。過落鳳此斜坡。

緜陽逆旅

(越調寨兒令)呵硯田。補闌箋。臘中北征經古絲。星月寒天風雪殘。年明日劍門前。少陵樓下渚烟。放翁驢背詩篇挑燈吟意。賴倚枕柝聲延眠。冷透五更甍。

梓潼林示柏

(越調凭闌人)貞柏參天忘歲年。飽閱滄桑陵谷遷。風煙連八千。孤蒼禁柏前。明刺史李璧種柏八千餘。

自瓦子至王老土。地時禁砍伐。謂之禁柏。

宿劍閣

(中呂紅繡鞋)孤玉山。中鄧艾。重陽亭下摩崖。顏真卿書中興頌。迴車晚向劍州來。未知雲起處。尚有鶴鳴哀。又兵戈三四載。聽雨軒留筆乘。盧雅書聞溪水爲誰名。曾無小閣跡。聞鈴重於家國事。不在女兒情。耐思量。冬夜永。

出劍門關

(中呂醉高歌)劍峯上與天齊。峭壁旁生豹齒。出關一怒張吾臂。大笑從戎去矣。

白水獻黃金

(雙調枳郎兒)早淘金。晚淘金。白水一摸尋。一寸黃金一寸心。共朝朝來浸。唱一支白水獻黃金。

廣元問皇澤寺垂圮矣寺俗稱武則天廟

(越調天淨沙)嘉陵兩岸風沙。利州城郭千家。一寺獨無片瓦。武家天下。路人誰問嬌娃。

明月峽

(正宮白鶴子)東川無此峽。大隧曲如弓。行客向南來。請入朝天甕。峽近朝天關。

甯羌遇雪

(雙調枳郎兒)雪霏霏。雪霏霏。雪白戍縷緋。甯羌城下雪沾衣。映七盤山美。把酒盃。炊餅蒜葱肥。

沔

(南雙調玉抱肚)西山天蕩。讀書臺柴門草荒。供祠堂羽扇綸巾。冷墳丘。夕下牛羊。兩城合抱。沔蒼蒼。回首成都八百桑。

石門棧道

(雙調清江引)嵯峨石門秦棧古。蹟在嗟行旅。先民剪草萊。開闢嘗辛苦。巍巍漢唐。追夏禹。

廟台子留侯辟穀處

(中呂四邊靜)崇墉留壩。廟祀留侯。紫柏斜。誰說丹砂。且引退功成暇。秦家漢家。只博浪椎聲大。

柴關嶺

(中呂四邊靜)柴關西口。茅屋三間也。白頭風雪村謳。呼叱着黃驃走。難收。不留。早滑下山坡陡。

鳳嶺

(中呂四邊靜)山中窰戶百結鶉衣煖氣無。雙石徐徐漸雪盡沙飛舞。迴紆坦塗。又小憩黃牛舖。

秦嶺

(中呂四邊靜)從容馳騁凍地冰天結伴行。大散關橫便涉雪登秦嶺。寒生馬驚燈火裏陳倉近。

寶雞除夕

(正呂白鶴子)投門艱一飽。爆竹滿東街。除夜寶雞城。五處思量在。妻兒侍母在白沙。維客老河口。續留滄繩在沙坪壩。

絳帳鎖

(雙調慶宣和)學有宗師德望崇。一代扶風想見鼻比講堂中。坐擁坐擁。

武功 康張故里

(中呂朝天子)汧東一翁詞苑稱南董。大聲鞞鞞發關中。誰不辨雞和鳳。幸第一書傳。康海武功志時稱。關中第一書。壯年無用只雙溪。海陽張錄步武從。二雄武功仗筆陣開文統。

馬嵬坡懷古

(正宮白鶴子)江山千古淚。肯爲女兒揮。能不惜蛾眉。只有陳元禮。

興六平

(正宮白鶴子)窮荒班定遠。矍鑠馬文淵。兩漢幾人豪。落落興中縣。

長安新城

(中呂醉高歌)問秦藩一片塵沙。剩老樹荒園破瓦。行歌牧馬新城下。未午衙齋散也。

碑林

(越調凭闌人)訪問碑林南郭行。半日摩挲唐石經。開成傳至明。姚公功可名。

慈恩寺

(雙調折桂令)步樂遊原上纖塵。問無漏城南。尙有慈恩。想永徽當日。窺基圓測。鞞譯遺聞。草創了禪門。經論畢竟是玄奘超倫。六寺平分。六祖名尊。慈恩開相宗。華嚴華嚴宗。靈威律宗。興善密宗。草堂三論宗。香積則淨土宗。六寺皆在城南。薦福遙看雙雁干雲。

雁塔

(雙調清江引)浮雕四門何秀美。聖教河南最。朱衣點額人。寂寞多顛頰。題名有碑徒驥尾。

曲江遺跡

(雙調清江引)宜春苑中春似海。流飲追前代。蕭條賸水痕。尙有桑田在。夫容紫雲花事改。

五家坡王寶釧廟

(正宮白鶴子)寒鑿王氏女。離合出稗官。廟貌供香花。點綴鴻溝岸。

杜公祠

(正宮白鶴子)祠堂黝蔭上。客自草堂來。忠愛久江湖。詩在公常在。

遊韋曲遂至杜曲

(雙調清江引)城南杜韋天尺五。往事都塵土。花光似酒濃。潘水東流去。當時決明誇翠羽。

樊川

(雙調清江引)春回少陵原上草。攬勝樊川道。終南縹緲間。龍首神禾抱。蓮華洞前風物好。

跨轅

(越調天淨沙)長安野老車驟。登登緩緩經過。一揖相逢道左。跨轅閒坐。出城南指灤河。

南院門燈市

(雙調山丹花)長安昨夜燈市前。歌采蓮。荷葉圓。秦淮今夜月可憐。不見荷葉圓。歌采蓮。

鴉林

夜宴彭昭賢宅。在建國公園側。枯株十餘。衆鴉集止。如葉在樹。昭賢云。無夕不噪。達旦始已。余戲呼爲鴉林云。

(雙詞清江引)鴉林噪時天未曉。暗裏安排好。成羣結隊來。只在枝頭鬧。啼雞一聲飛去了。

咸陽

(越調天淨沙)二陵澧水蒼蒼。三橋西去咸陽。濁渭清涇遠望。釣魚人在何方。

北院贈蔣長官鼎文

(雙調折桂令)將錦旂贈與軍前。正十萬貔貅。笳鼓喧闐。話蒙塵往事。載活母子。曾此周旋。今眼底依然。北院奮神威。捍衛西邊。做戰士中堅。毋負斯言。落日關河。積恥終湔。

渡澹

(雙調阿納忽)橋外幾度潺湲。村外幾畝桑田。水外幾簇馬走牛眠。山外幾點炊烟。

灞橋

(雙調慶宣和)灞水千年綰別愁。不語東流。讓爾行人一回頭。折柳折柳。

邵平店

(白宮白鶴子)東陵何處也。不種故侯瓜。一老倚柴門。負手南山下。

驪山蔣公蒙難處

(正宮白鶴子)高崖書仰止。兩字可名峯。戰史此開端。石上多題鳳。北方將領多有題字者。

別長安

(中呂朝天子)阿房。未央。蹟在繁華往。對一抔黃土夢黃梁。閒付與盲翁唱。幾日流連。幾回迷惘。又征車向洛陽。建章柏梁。只寫滿吟箋上。

望華

(中呂醉高歌)三峯浮碧天隅。落雁蓮花玉女。華陰道上欣相遇。仙掌招人。不語。

閩底

(雙調清江引)春來麥醒青到柳。阻絕潼關口。黃河不得前。道出桃鄉右。停闕底時沙石走。

陝

(南呂閱金經)夜出嶠函路。當窗月色多。北望中條簇黛螺。河明朝過。枕上且魔駝。

渡河至茅津

(越調天淨沙)會興渡口褰衣。茅津劫後全非。馬背沈吟未已。銜空空地。晉南風土雄奇。

棗溝

(雙調慶宣和)平陸坡陀去路斜。撲面風沙。棗子溝前乍興嗟。墮馬墮馬。

東延元夜

(中呂紅繡鞋)最是中條月夜。填然鑼鼓人家。軍門一隊舞魚蝦。戰場成鬧市。村樹燦銀花。喜東延初駐馬。

會此三年苦戰。陣中一夜無眠。將軍陳碩儒將軍。坐話小窗前。平明遙礮動。號角助詩便。望溝坡人去遠。至郭原道中有四溝八坡。

土街上寇題字跡

(越調天淨沙)桃林剩對荒墟。銜垣灰筆模糊。四字分明短句。回東京去。有家何日歸塗。

沙澗

(中呂紅繡鞋)林外一泓秋水。澗邊幾上柴扉。戎衣笑自戰場歸。馬頭天地闊。烈士血花肥。染中條山色美。

忠馬讚

歸塗一老卒。指余所乘云。去年平陸之役。我騎兵連六十餘騎。悉遭劫掠。獨此赤馬奔至河崖。浮渡過黃流南去。今軍中惟此一馬。爲身經百戰者。

(雙調清江引)吁。吾馬非中國馬。那許胡兒跨。風鬣走若飛。奔至南崖下。甘心死於河上者。嗟斯馬猶忠義子。大勇原明恥。雖雄決有時。未了疆場事。黃流死何如戰死。

過澗池

(雙調落梅風)對澗池月。思秦趙盟。藺相如獨宗君命。當時坐中賓主定。缶無聲瑟也休聽。

重遊洛陽

(黃鍾節節高)北邙山色。舊時明月。依然照我鬢。鬢短髮落。下塵伊中影。陌上別。隔着鄉關遠些。

西工過衛長官立煌

(中呂滿庭芳)西工北隈。別來八載。莽莽烟蘿。龍眈虎視。黃河在夜。宴初開。歷百戰。公何壯哉。便千杯我。飲無猜。優遊再。輕裘緩帶。共上讀書臺。趙所居。日惜陰書室。上有平臺。

未得至郭原比。乃與蔚如將軍相見洛中。並讀其近作。

(蔚如詩有中條立馬日將曛句)

(中呂喜春來)一行潞水當前陣。百戰中條獨此軍。總戎凋儻夙能文。吟句穩。立馬日將曛。

壽國臺 (吳子玉駐洛陽時建昔所謂廣宮者)

(中呂喜春來)登壇上將知何世。風雨中州又一時。後凋松柏歲寒姿。人到此。南去便關祠。

安樂不窩

(正宮白鶴子)行窩愁老子。地氣語微茫。天下事紛紛。不必南人相。

春意

(雙調清江引)香山洛中詩境裏。衾暖添朝睡。恬和嫋嫋風。虛潤陰陰地。邊花懶鶯人醉已。

客談黃汎

(雙調枳郎兒) 回東流。又西流。淚眼望扶櫓。南岸開堤。北岸愁。看波飛濤走。一甕兒洪水灌中牟。

雪晴馮欽哉將軍招赴淺井頭村

(中呂紅繡鞋) 淺井亭然大樹。周原邈矣平蕪。邛山少室列庭除。六韜書幾卷。一飲酒千壺。出村來歌又舞。

鞏

(中呂四邊靜) 洛川東去。嵩下孤城水四隅。識此名無能保得中原固。行都要樞。望黑石關前路。

宿汜水

(中呂四邊靜) 雪深風勁。老犍坡前半日行。敗壁昏燈樓角上。權安頓。深更笑聲起。捫蝨忘宵冷。

滎陽

(中呂四邊靜) 鬢絲茸帽。慷慨當年過虎牢。轍跡前朝如意事能多少。坡高石橋。又上了滎陽道。

鄭州視察河防孫總司令桐萱談往歲花園口三劉

砦來同砦南月堤諸戰役

（中呂紅繡鞋）京水鎮整蓬帳。花園口關疆場。去年此日渡河忙。茶庵摧左背。右路斷藍莊。勇兒郎前進。莽。

十襲開封尤勇。三劉岩與來同。當時一戰竟全功。堵修癡望絕。坐守反爲攻。助河防兵氣猛。王屋南來河近。月堤北出奇兵。啣枚疾走夜無聲。探巢先拾卵。背水自安營。敢窺河投陷阱。

伊川

（正宮白鶴子）相齊無左袵。微禹歎其魚。宛洛道中人。甯免伊川懼。

臨汝（二章）

（正宮白鶴子）斷橋平野闊。新寨雪初晴。未聽汝州雞。喬木多幽韻。汝墳嵩嶂外。洩水石門東。無地問莊光。白日懷高鳳。

葉縣詠古

（正宮白鶴子）葉公今有邑。獨上翫龍臺。四海際風雲。世亦眞龍待。問津逢沮桀。荷篠過尤潦。逃世此何時。俯首昆陽道。暗鳴滎水上。會築霸王城。勝敗數歸天。戰豈爲王病。中興十二世。紫氣鬱葱葱。一戰鬼神驚。鼎以眞人重。

南陽住元妙觀

(中呂迎仙客)深院靜。小庭幽。容我虛堂閑負手。壁間書。尊中酒。一任神遊。領略這無中有。

游臥龍岡諸葛躬耕處

(南雙調王抱肚)山中松桂。笑岡頭耕人未歸。更無時抱膝長吟。只紅泥換了柴扉。宛南千里暮雲垂。三顧堂前草尚肥。

鄧

(雙調落梅風)舒榆柳。向白牛。醉春風。穰雨晴晝。願起冠軍呼蕩寇。獨遲回孟家樓右。

老河口晤東野

(雙調清江引)仲來鄒陽三四月。長是音書缺。聯床被已濕。對酒胸先熱。又今宵弟兄歡聚也。

秦莊別李長官(宗仁)

(仙呂青歌兒)荒村端居端居清暇。長堤草樹草樹初花。晚過秦莊野老家。後日揚帆出楚巴。辭光化。

道出樊襄 先君舊日宦遊之地

(越調天淨沙)行行陟彼高岡。杏花時過樊襄。峴首羊碑在望。廿年遊浪。孤兒久慣流亡。

過工部墓下未及展拜李曼叟與余皆惘惘也

(雙調清江引)成都草堂來去久。瞻望墳丘。又公心夙我心。我手慚公手。車中有詩惟曼叟。

題快活鋪(在鍾祥城東南)

(南呂四塊玉)渡漫河。張濞過。歷歷人間險艱多。左瞻右顧如何可。山有坡。水有波。誰快活。

荆門

(仙呂遊四門)青山城郭此荆門。憑軾向黃昏。河溶社鼓歌長恨。不弔畫中人。墳招汝國殤魂。

當陽

(雙調清江引)天南虎牙浮翠美。鴉雀參差起。迢迢長坂坡。冉冉朝雲氣。當陽縣城烟霧裏。

抵宜昌將入峽先寄妻妹白沙月亮井

(南呂一封書)西陵峽上船。照征人月半圓。黃陵廟口烟。飽風塵路八千。江河流轉勞軍使。仍共南天望。北天春。又妍花。又嬌書。在人先到井邊。

巫山

(中呂快活三)秭歸復秭歸。萬里泛舟回。杏桃幾樹傍荆扉。處處山居味。
老人正寂寥。神女自岿。兩峯帶東峽江腰。一縫容歸棹。
暮天獨倚闌。燈影向巫山。十年此地幾來還。少壯多憂患。

夔門雨望

(雙調沈醉東風)正夔府好春氣象。望瞿塘細雨微茫。花隨峽路生。眼滿流波漲。肯扁舟久臥滄江。白帝城高杜老鄉。隱粉堞笳聲更壯。

萬縣

(雙調太平令)萬縣相看無語。一時屏蔽巴俞。薄暮張燈南游。打槳衝波北去。宛如聖湖畫圖。四面被青山圍住。

題冀野北遊草 于右任

(仙呂寄生草)這可是關和鄭。這可是馬與王。會記得雋書老輩推宗匠。會記得填詞後進希高望。會記得貪盃尊嫂頻相讓。念中興鼓吹舍其誰。況詩壇草創終須仗。
年差我學愧君與。君別有相知分。都門握手欽雄鎮。漢皋結社開新運。爲的是民間樂府幾朝湮。盼的是中華豪傑乘時奮。

持節求民瘼。尋訪戰場。眼見那黃河滾滾翻新浪。眼見那太行中條巍巍呈奇狀。眼見那新唐慘
慘無名的英雄葬。惜則惜少陵擋駕武侯忙。惜則惜江山寂寞何人唱。君過工部墓。隆中未駐車。引
以爲憾。

黔遊心影

綦江清風園茶座紀聞

(中呂紅繡鞋)王道士摩挲石硯有白雲二字娟娟羽化翩然忽登仙北郊留古劍故事並流傳歎瀛山人去遠

東溪卽景

(雙調阿納忽)山上濺濺鳴泉瀑上樹樹雲煙道上處處梯田天上座座螺圓

戲題酒店垭時黔中禁酒

(雙調清江引)能娛飲虹無過飲入國驚疑甚如何酒店名也有杯中禁只劉家婦人多謝您


宿松坎

(仙呂青歌兒)揚風崖邊崖邊清話妙龍山下山下塵沙散策歸來喫地瓜八月圍爐百姓家寒生乍

夜郎曲 (三章)

(仙呂游四門) 還荒猶說翰林名。漢醜泥君行。南冠舊日何曾聽。此地有黃鶯。城如此。夜郎情。
 南平城下水流西。無鳥逗花啼。梁州天盡迴車地。趕水尙成溪。溪流盡。夜郎非。
 竹枝會取教秦娥。嗚咽素商多。巴飲唱徹思南破。雅頌不同科。歌奈汝。夜郎何。

石刻在四川江津白沙黑石山中



釣絲崖

(越調天淨紗)中間林壑清幽。上空禽鳥飛投。笑指朝陽洞口。釣崖奇秀。不知人在炎州。

登花秋坪最高處

(中呂迎仙客)望中山徑微。脚下白雲飛。七十二灣天上矣。倚平臺。風兩腋。遠近高低。都不是人間世。

楚米鋪

(越調凭闌人)輓米辛勤千里來。會此平楊歌凱回。顧名今可懷。楚人忠義哉。

捷陣溪

(中呂醉高歌)夾溪七陣劉鋹。馬上刀光劍影。青杠哨口多形勝。處處秧田市井。

三坡

(雙調殿前歡)上天梯。石壺關口虎牙奇。瓦窰坪下行人喜。歸定何期。回頭淚滿衣。螺旋地。磨折盡英雄。氣問紅顏能幾日。落花低。

桐梓展周將軍墓

(雙調水仙子)東山一旦建旂牙。北伐當年換鼓笳。西城特起人中霸。賸荒墳帶弔他。歎英雄事業搏沙。漆水無窮浪。黔靈有暮霞。紅遍秋花。

婁山關

(雙調折桂令)宛延一綫迴環。任轉折盤旋。山外還山。起伏奔騰。大婁勒住。放座雄關。藤蘿峽雲煙漫漫。杜鵑花血淚斑斑。道舊日平番。六載艱難。只樹老秋深。日暮天寒。

遵義作 (三章)

(正宮白鶴子)竹溪曾入夢。不料果來游。一座望山堂。熟在盧生口。

播州初上月。照我出新城。忽憶鄭柴翁。杖外清癯影。
幾年纔聚首。兩日又分襟。話到七襄人。惜取燈前影。別王駕吾鄺衡叔襄社二友

烏江渡

(雙調清江引)烏江渡前山勢改。黔蜀纔分界。這兒是筆架堆。那壁把饅頭賣。讀南宗北宗新畫冊。

刀靶水

(雙調清江引)征車小傍刀靶水。正牧笛聽牛背。梯田漸漸稀。村舍遙遙對。炊烟上時斜照美。

息烽雨夜

(小石天上謠)暮止息烽城。云是龍場境。濕雲多不肯晴。笑歸牛返豕縱橫。百年前詩句分明。更夜來雨聲可聽。一般旅宿。只看殘燈。怎同雨不同心。喚不起柴翁興。巢經巢集有至息烽喜得大雨詩。

札佐

(中呂醉高歌)田中蕎麥紅些。道札佐前頭近也。貴陽亦有長亭舍。未種柔條送客。

九日登甲秀樓

(中呂後庭花)南明不見舟。亭橋喚玉浮。誌表征苗紀。崔巍甲秀樓。共綢繆。重陽風雨。銷愁茶一甌。

武鄉祠相傳爲楊文聰故宅

(雙調清江引)西湖路南祠在否。卓犖楊龍友。千秋洵美堂。不與瑤翁偶。馬瑤草土英與龍友爲肺腑親。於生死間遮萬口。

望扶風山未得謁陽明祠

(雙調慶宣和)舊日文成今我年。謫戍蠻天。茹雪餐風不知怨。澹遠警勉。傳習錄成傳指薪。虎豹當門。惟一惟精始能忍。固本倒穩。

仰望扶風山有祠。展拜遲遲。心辨平生我師事。念此在此。咫尺修文天一方。夢到龍場。出將勤王入賢相。道廣嚮往。

戲賦培養正氣雞

（南呂金字經）陋巷圖培養。公然正氣題。你硬咬菜根太不識機。奇。但看人喫雞。誰知味。笑山中秀才還畫壘。

過華家山房贈問渠（二首）

（雙調河西水仙子）好山圍住聚松濤。家有圖書手還鈔。鳥鳴几案無塵到。且開懷茅一瓢。主人蟬鬢不會殘。五十風流尚朱顏。上樓指給孫兒看。繞柴門都是山。

獅峯將臺明傅友德講武之所

（雙調折桂令）一臺高峙獅峯。想開國威儀。上將英風。講武廳前。旌旗蔽日。擐甲元戎。指揮定邊民多勇。更何須關塞泥封。發憤爲雄。報國惟忠。願興起而今。東向張弓。

貴陽七唱

（商調梧葉兒）瀟瀟雨。昏到晨。欹枕墮愁雲。燈將滅。衾未溫。喜還嗔。孤負了花溪酒人。寄李院長書田園林趣。新雨多。座上女鳩摩。楊夫子吟共哦。笑呵呵。傳譯出離騷九歌。贈憲公兄暨戴萊笛夫人。

雲棲處。山有亭。舉首卽黔靈。紅樓外。月正明。貴陽城。今夜聽誰家笛聲。樓望
眞茅酒。吾所需。一椀進娃魚。無停箸。紛在鬚。受擲揄。忙口食黔游不虛。戲答仲磨
虬髯客。丁曉先。一笑到門前。三湘棹。八桂天。幾顛連。分手已匆匆。五年喜曉先至。
東山月。如玉盤。雲淨上方寬。歌三疊。相見歡。暗辛酸。傾耳聽流泉。急湍光復門外晚步。
牛頭石。鼙鼓間。瀟灑一痕看。揮毫處。偷得閒。寫秋山。不管它南關北關。跋馬瑤草西江月詞。

訪問杏花村夷寨

(中呂朝天子)仲家水家。櫛比山中廈。越人夷自稱。日越人自古樸無華。赤脚勤秋稼。長字呼先生。日長字字讀若瑟。偕來老翁耕罷。相逢在杏花。訪他問他。都是些桑麻話。

苗舞

(越調天淨紗)連環結住纖腰。淡青裙子三條。舞向花街最好。六聲六聲。樂器作蘆笙者誤。歡笑花溪花裏花苗。

百蕙堂觀東坡琴賦口占桂翁 (詩成)

(中呂喜春來)七絃窗下焚香供。臣軾天台所采桐。四年九月宋元豐。婁上董題跋。意無窮。香光有跋。慢彈輕撫。還三弄。流水高山百蕙翁。一時四座起秋風。天籟動。人在雨聲中。

遼鶴哀音

入都感懷

（雙調雁兒落帶得勝令）骨拋幕府山。血涌秦淮水。參差劫後梅。多少刀前鬼。九年我來歸。城郭已全非。癡對陵園樹。眞成丁令威。飛飛。生還客是誰。纍纍國殤土。幾堆。

書所見

（南呂乾荷葉）雨花臺。菊花臺。變換南門外。米行街。運蘆柴。兩三降虜趕車來。一度滄桑在。攜錢包。尺來高。叫做中儲票。路邊拋。竈中燒。不經火焰不堅牢。只是糊窗料。

過陶家巷宅

（雙調十棒鼓）率性將門牆拆了。讓雨打風飄。這幾畦白菜。一角鴛巢。九年不見。不見園主到。想南樓。斜照。憑闌歷歷雲煙渺。樓中書稿。剩殘磚滿地。滿地生亂草。相逢鄰媪。背指吾髯。只是笑道。大少今都老。

馬回回酒肆

（正宮四邊靜）長干橋下。獨過西街舊酒家。爐邊人馬。爭來答話。早安排團雀。鳳蝦。又添上琵琶鴨。

七異

（南昌閩金經）不是香山叟。却逢折臂翁。誰使先生居賊中。窮車來一臂空。書何用。不如賣菜傭。折臂翁

父母年前死。鄰家一女存。百結鶉衣加短裙。貧從無可告人。承相問。心頭淚暗吞。鄰家女。觸目稱株式。假名書。擘窠糕餅招牌。天婦羅。摩真楷。能不訛。今宵臥。他他靡要麼。市招。立柱剛。雙十表。高神社。低衰草。連天歸路迷。奇隨園。馳道西。休揮涕。君當怨土肥。神社。戲有雙包案。寶無魚目珠。文告煌煌張四衢。噓。昭和兒自居。抬頭覷。奴才公博書。偽府文告。滿口和爲貴。友邦黃種黃。囤積金條千丈長。商身家纔小康。七也唱。也會地下忙。和平商。味道千般好。一支三寸長。軍用香菸名旭光。降菸都登市場。誰來享。知非賢二郎。旭光牌菸。

鬼臉城偶占

（雙調阿納忽）山下一夢荒唐。天下一度滄桑。眼下一夥虎豹豺狼。城下一抹斜陽。

甘松筠篴街說書

（中呂滿庭芳）茶樓一角。引人入勝。暮暮朝朝。後方消息宣傳早。西望迢迢。泥足陷抽身不了。衆心歡。士氣增高。爪牙到。由他謀報。準備進監牢。

哀玄南

(雙調折桂令)高吟易水之歌念我玄南無讓荆軻血濺荒岡心摧落日跋涉關河至今虛廟食英靈未
妥好頭顱當日何多正亂舞羣魔風月婆婆沒你個鼎足揚叉方孝孺孤負了木末魏峨

新命談市中水漬貨充斥詞心哀之

(雙調祆神急)當初清白身落水那堪問渾身水漬叫如何來辨認到而今誰能洗得脫况道是無
處無痕印更牌號獻殷勤好在原先面目未全真從頭起再作新人

月夜私祝

(大石初生月兒)初生月兒落漸低照我還鄉家尙西同時兩地數別離轉相期春水宜歸舟傍萬朵
薔薇

虹霓燈下丐婦

(中呂喜春來)虹霓照眼千燈豔舞伴迴腰一捻纖鶉衣窺戶討人嫌枯癯臉意快快分不到香甜

放命債

允。
（雙調清江引）誰想到眼前果然還血本。借券上腥紅印。知君命債多。恐我言無信。不加賠利錢天不

鄉人之苦悶（次無咎韻）

（正宮黑漆弩）當時悔在城中住。做了個箇順字號愚父。因飢寒困頓顛連。受不盡尖風酸雨。望光明畢竟來臨。黑暗一朝除去。半空中掉下神仙。那裏有安排我處。

鄉人生活縮寫（仍次無咎韻）

三間破屋城南住。一窩浪小把戲之父。他們索飯啼寒。賣不了風雲雷雨。是兒曹累我如斯。沒得跟隨西去。到如今勝利東歸。那裏有安排你處。

放冬賑二首

（越調天淨沙）門前結隊成羣。竹籃麻袋銅盆。只望半斤麵粉。一家安頓。難民多是鄉人。喧嘩吶喊紛紛。本官今日開恩。未到時間不准。主持冬賑。北腔南調何人。

燈前九歎

（正宮白鶴子）龍蟠而虎踞。社鼠與城狐。無怪老香濤。爲我山川詛。其一
九年亡命客。國破亦無家。今日得生還。遇事徒驚訝。其二

燈筵陳旨酒。饗客食多魚。還唱後庭花。誰謂無商女。其三
萬般皆下品。第一是豪商。資敵罪從輕。功上諸公上。其四
少年無志氣。枉讀聖賢書。從賊受青衿。非偽猶豪語。其五
或云方面吏。幹練出材官。爲爾示方針。還待操珠算。其六
東南遭劫後。此地最清貧。十室九饑寒。何以蘇其困。其七
兒童初失學。婦女半孤孀。師已不爲師。養待憑誰養。其八
燈前書九歎。一歎一迴腸。閣筆誓燈前。鑒我言非妄。其九

自題遼鶴哀音後

(正宮白鶴子)還鄉仍是客。苦痛畫難成。題詠盡哀音。唱與何人聽。

東還

(仙呂點絳脣)甚處吾家。紫金山下。歸來乍。驚喜交加。將熱淚頻揮灑。混江龍夢耶非假。一車送我入光華。頽垣敗壁。野草開花。不似雕梁歸紫燕。有如老樹繞昏鴉。添悲詫。向誰行宿。只自嗟呀。六么遍望門投。向城南罷。百年老宅。或免風沙。堂兄從嫂。粗飯淡茶。兩碟三盤爭迓。魚蝦笑九年。饒嘴客三巴。后庭花。今朝會姨媽。明朝看舅耶。里巷多親故。清寒盡苦瓜。眼巴巴。相逢今日。誰將勝利誇。賺煞聽排衙。逢人罵。這羣庶都如井蛙。我是神靈天降下。又鑽來地上仙家。算吾儕功勞皆大。不會打些兒官話。莫疑心我遇事。

便裝哈。

點絳脣

于右任

題冀野遼鶴哀音

遼鶴歸來。金陵更是傷心地。寒梅開未。造物含深意。
難記。多少亡人淚。

田野哀號。血染一作變長江水。長江水。當年

西域詞紀

越調天淨紗一百八首

皋蘭一瞥

五泉山我不會留。凝熙園我不會游。與我訂盟左柳。西陲歸後。朗吟飛過蘭州。

涼州

雪山六月晴天。河西萬頃良田。莫歎江南路遠。武威初見。米糧八百金川。

憩肅州

古酒泉郡
自是入沙漠矣

悠然對我祁連。未能飲我名泉。此去玉門不遠。土風稍變。蒼蒼莽莽無邊。
蒲桃瓜果琵琶。漢唐盛世堪誇。烏峪關前去罷。玉門關下。依然戈壁流沙。

哈密

蘇巴什城北名湖。伊吾廬漢屬匈奴。行館回王避暑。綠蕩圓宇。嵯峨想見穹廬。

龍王廟舊建湘營。阿牙橋曾繫蘇兵。戈壁中多坎井。一時吟興。天山送我西行。

抵迪化右公有作

山川黯淡經秋。如今銷盡煩憂。度越大山未久。白頭吟就。暮雲收處芳洲。

西公園訪問微草堂遺址

河間一叟娛嬉。相傳曾此羈縲。烏魯木齊雜記。客情聊寄。鑑湖高柳廊西。

紅山嘴

礮台相望紅山。紅灣烏拉拜譯云紅灣。紅廟春還。紅到柳花一半。夕陽人散。那時春意闌珊。

紅顏池

滿池皺起微瀾。願君休洗紅顏。不怨紅顏命短。看花興歎。朔風吹到紅山。

觀康巴爾汗舞

將纖纖玉指輕拋。漸送眉流盼頭搖。轉踏纔知窈窕。李唐遺調。要來沙磧重瞧。

阿布杜克兒噴吶

聽有時吹做吳聲。也有時吹做秦聲。疾疾徐徐等等。吹吹聽聽。嗚嗚咽咽鏗鏗。

畏吾舞爾

有演男女調笑者。阿不都克力木。阿巴索夫。告余是游牧時事。與俗劇小放牛極相似。賦示哈的爾。

瑤池玉樹誰栽。黃河地上誰開。綿似嬌娃面白。牧童歌在。始知此曲西來。

柳花

柳花不比他花。却似龍井春芽。綠色清香一把羽。全應詫。茶經未載之茶。

駱駝

駱駝緩緩前來。經過多少軍台。萬苦千辛不改舊時形態。有誰知汝心懷。駱駝默默前來。建新門外徘徊。忍耐略無憤慨。抗塵邊塞。幾人如汝之才。

麥斯武德監使招飲明園盡歡而散

席間飽啖肥羊。園中喬木千章。雪水經年供養。蒲桃佳釀。舉盃爲祝新疆。

詠張騫

張騫持節三來。終留田卒輪台。計斬樓蘭傳介。漢威西邁。頓教劉敬疑猜。

記從劉敬和親。康莊大宛烏孫。共事單于竺謹。漢高遺恨。白登圍我何人。
經營幸有張騫。陽關西去三十。都護官家調遣。北庭初奠。心馳神爵三年。
何須自我成功。要能發奮爲雄。大智大仁大勇。儘爲時用。勸君休計窮通。

七月一日和平大會獻頌詞穆默德伊敏譯之

試看今日新疆。新生臨降新疆。幸福和平共享。頌歌同唱。新疆永是仙鄉。

胡豆

登盤二月渝州。白門四月盈甌。六月嘗新出口。吐番胡豆。一年三度綢繆。

二轉子

嬌姣二轉容儀。生來混合華夷。集聚南樑市裏。自成風氣。何曾疆受羈縻。

卽席奉酬史學家迪牙闊夫

帝俄時代王孫。卅年流落吾新。古幣搜尋考訂。僅存殘燼。一編示我殷勤。

伊不拉引穆提義爲誦畏吾新詩二章試譯其意

蒼鷹擊兔傷餘。郊原尙有家居。似我拋家踽踽。更誰相遇。此間尙有嗟吁。

仙葩我的仙葩。含苞爲甚不發。枝上百靈競訝。百般牽掛。天明等你開花。

初食哈密瓜

前天會剖西瓜。吐替番產今宵。又食甜瓜。笑道瓜分不假。霸郎爭煞。畏語謂小兒爲霸郎。果然甜似糖砂。

再賦哈密瓜

一枝花比缺哥。庫車遙隔麻河。麻納斯早把瓜挑。饗我一瓜先破。燈前供我吟哦。

爲哈扎克文會題壁

行歌哈扎諸豪。自然雄偉風標。天際茫茫綠草。雪山斜照。詩人千古刁騷。

郿鄠子

嚴敬齋先生云當作媚胡子一作走馬子
右公言幼時嘗見之不圖再觀此劇於塞上也

南腔北調西逋。白頭重對氍毹。塞上新翻舊譜。不成郿鄠。年年走馬江湖。

郿鄠歌者馬秀貞

梨園歌者貞娘。對花賣水沉箱。戲名三齣。名曲燈筵俊賞。元音低唱。兒家生長甘涼。

東花園小飲

東園血染花紅。花前伏刃藏弓。十二年來噩夢。終歸何用。那人枉費心工。

聞人談妖魔山神話

是西遊記裏牛魔。在此山久結行窩。可惜無人問我。一言題破。城中還有妖魔。

讀補過齋文牘

一編往跡堪尋。其間功罪疵醇。留待史家評品。後來爲甚。此才深在人心。

老滿城歸途所見

紅霞綠草藍天。博山白雪盈巔。馬踏黃塵路遠。畫圖中見。柳梢月正初弦。

比勒錫克

烏孜別克舞之一
譯云鐺舞

無猜兩小綢繆。聽他宛轉歌喉。歌罷金環出手。願郎相就。贈郎別有溫柔。

羅麻楞

亦烏孜別克曲
譯云帕舞

蒙頭薄薄輕紗。看他多謔嬌娃。無限光明在帕。象徵華夏。伴歌金鼓三擗。

翠禽之唱

原名塞納布露爾
亦烏孜曲也

行行問汝何求。花間小鳥啁啾也。道嚶鳴爲友。忽然相違。幾回延佇凝眸。

畏吾爾奏梳粧樂

一名那格銳加烏蘇

臨鸞女伴梳粧。照人鬢影釵光。疑是清商合響。十番瀏亮。龜茲疏勒高昌。

經羅爾渥賈扎克草原

牧場奔突黃羊。蒙包閒坐紅粧。依朗白雲在望。一車原上。未知身在何方。

廟兒溝野餐

(在依朗考布
爾哈峯下)

禽聲繼續風聲。水聲搖盪松聲。樹外車聲日影。笑聲相競。娛人又是歌聲。
樹陰淺酌葡萄野人來獻羊羔。馬奶一盃醉倒。倒頭一覺。夕陽猶在林梢。

過艾林郡王蒙古包

入門馬奶三盃。一包七口相陪。四壁和寘錦被。欠身長跪。無言只合唯唯。

歸途原上見天鵝

草原三兩天鵝掠車一霎飛過還似白雲幾朵鏡天點破不曾驚動明駝

題志薑齋銳塞上詞冊

烏城幾闌春詞投荒白首嗟咨自是淒涼滿紙上元燈市河橋徙倚多時

巴拉提節觀馬良駿大阿訇領衆祈禱

四圍捧手焚香百闌諷誦三章摸過眉心又響讚歌高唱一堂二十三坊油化共二十三坊寺

游水磨溝浴溫泉

承曦門北奔馳上坡輪轉遲遲水磨村人笑指熱湯初試溫泉水滑凝脂

過六道溝

非刑百樣翻新煤審會此坑人不道心腸怎狠彌天冤憤黃沙點點斑痕

因薩維諾夫總領事寄蘇聯詩人西蒙諾夫

廿年我詠中興一編君賦長征氏有戰爭詩集正義終能戰勝果然笙磬同聲還祝和平

小低窩舖望博克達雪峯

遙峯下卽天池。滿山雪積羊脂。襯映四圍黛紫。問君何似。宛然姑射仙姿。

昌吉縣

古回紇昌
八喇城

停車諧邇門前。闔城居戶三千。莫道窮荒外縣。也堪留戀。柳邊幾樹榆錢。

頭屯河參觀舊蘇聯農具工廠

回車遠到頭屯。經營想見初心。馳道樓台隱隱。西陲重鎮。有人爲我耕耘。頭屯今已歸來。何年講舍宏開。風被五洲四海。天山學派。養成一輩人才。

十四宗族歌訣

初分漢滿蒙回。又分塔吉克塔爾其烏孜伯克歸化。錫伯索倫哈薩克柯爾克孜韃靼畏吾爾。同吾族類。並無貴賤高卑。

次韻嘲覺民思歸

昨宵飛夢鍾山。藍莊深屋林間。萬里居然獨返。白雲無限。醒來依舊樓閣。

原作

年時夢寐天山，雪峯遠出雲間，留戀烏城不返，流沙何限，此心直到樓闌。王士禛

迪化飛阿克蘇機中望焉者

漢唐故事雄奇，經過名國疆圻，水草都呈眼底，綠洲明麗，雲端遙指焉者。

阿克蘇小景

紫顏隆准銀鬚，黃泥白板精廬，市外偶逢四五，老年回婦，隔紗面目模糊。

瘦垂頸項何纒，白衣巴扎盈塗，年歲幾人會數，廣桃紅處，劣泥帝始生吾。南疆傳說云：上帝取泥之精以造喀什人，而阿人皆由劣泥產生，巴扎者，趕集之謂也。

播來白米如珠，纏回呼水爲蘇，上等南疆風土，百年楊樹，衙齋棲息剛夫。專員劉君剛夫，最爲能吏，阿人種稻播穀而不插秧。

宿溫宿

果然溫宿留人，其間小有園林，最苦蚊蠅擾枕，半窗愁悶，暮天密布濃雲。

溫宿阻雨

雨聲一夜瀟瀟，行期誤我今朝，傾動溫城父老，德威感召，爭看元老髯飄。

阿克蘇南園

巴依去後凋零。城南尚有園亭。樹下平臺試茗。菓林遊興快人。雨過初晴。雜語稱富人曰巴依。

觀阿克蘇劇團演塔依爾棗娘

情節極似羅密歐
與朱麗葉

應從梵劇尋源。猶傳來自蘇聯。悲劇莎翁不忝。獨開生面。豈徒歌舞翩翩。

阿克蘇飛喀什噶爾機中望塔里木大沙漠

流沙漠漠無垠。冀無鳥獸留痕。北望層層隱隱。天山橫亘。教人慘怛心魂。

風沙白日荒荒。東流不見湯湯。若有人令漠上。縱懷圓饜。音同浪土。人謂餅爲饜。會因口渴而亡。人生常在芳洲。誰能沙漠淹留。烏壘崑崙左右。龍堆前後。幾人漠上飄流。

抵喀什噶爾從疏勒北門入穿城赴疏附郊迎者數

萬人

歡呼帕夏聲聲。北城還接南城。觸手消災祛病。有人自幸。門前帕夏親行。畏吾人稱王曰帕夏。

疏勒所聞

或云漢世名邦。或云義謂多江。疏勒古今有兩。此言非妄。吐番亦在南疆。

畏吾人呼我漢人

曰黑大爺契丹之轉音也。或云教外人義。

契丹音轉爲爺。呼成黑大爹爹。宋後會無假借。趙興朱滅。任他教外傷嗟。

喀什婦女臉帘

垂臉帘一尺而強。有青灰黑白紅黃。望眉眼迷離。倚小街深巷。他揭來暗地偷張。

喀什塵肆皆阿拉伯式

坐賈却似行商。店家跪倚門窗。貨品由人翫賞。擺攤模樣。一家一個包廂。

游馬紹武花園

威傳卅里闌干園。中瓜果堪餐。可惜無人照管。歸塗却看阿圖什一帶屏山。

再過香娘墓寺

香娘九世曾孫。聞聲而至靈墳。怕夏前來散賑。指池相問。帝天所賜芳醇。

桑桑靡地桑

畏吾民歌名。猶言我恨你。

曲終又奏桑桑。民謠此最情狂。拍手歌聲正嚮。一回團浪。一回珍惜流光。

耿恭台

耿恭尙有高台。神泉猶傍台厓。偉烈難忘漢代。威儀漠外。旌旗曾日東來。

不忘亭

疏附專署有亭。乞名於右。
公名曰不忘。詞釋其意。

居安不忘艱危。從公不忘章規。不忘民間譽毀。願民無畏。中樞不忘邊陲。

疏勒城外龍王廟閱騎兵第九旅操演馬術

焉耆神駿何雄。開張天岸行空。馬上兒郎健勇。鐵蹄飛動。笑看萬騎追風。
一回豎立高懸。一回障礙超先。劈刺跳乘幾轉。及時操練。國家要汝防邊。

送艾可能還英吉沙

可能爲吾友。艾沙伯克姪。在京渝
上學甚久。英吉沙爲依耐地。

江南度汝童年。渝州亦汝家園。依耐風光繾綣。莫多留戀。待君國父陵前。

抵庫車

古龜
茲國

朝從疏勒云辭。未初已抵龜茲。展讀隋唐舊史。兩朝樂志。中原人所欽避。

烏恰有唐城及點將台遺跡

何人點將當時。問誰今日能知。道有唐城廢址。更無人至。殘陽沙底龜茲。

去城十五里。紅梅里克村有明譯古墳。土謂之明他拉他。不及往視。

萬人枯骨中存。云何明譯無聞。一切冤親盡泯。無恩無恨。一墳獨向黃昏。

庫車姨哥

南疆諺云庫車姨哥一枝花

姨哥緩緩言歸。紅花一朵當眉。顧影卿何豔美。晚來國會園中。桃杏方肥。

庫車王建武提來謁

爾王尚在青春。可憐飽歷風塵。話到親離忿憤。草原無盡。復家善視羊羣。

有人在庫車城南檢得元幣。上有大元通寶四字。

時中筆下譏嘲。劉致有上高監司曲。閭閻舌敝唇焦。只爲流通廢鈔。大元通寶。至今留與人瞧。

問鳩摩羅什遺跡渺不可得

兒時母國棲遲。呂光萬里求師。載在苻秦戰史。物非人是。西行空訪龜茲。

下馬拉巴克村觀千佛洞

飛仙女樂俳優。奔羊躍兔獼猴。壁畫蝕餘洞口。積年塵垢。瞿曇面目無留。
威時未遜敦煌。畫風遠啓隋唐。滅教亡邦。營壤新痕相向。我來弔古荒岡。
前唐堡壘猶存。龜茲霸業沈淪。馬背私心自忖。轉移世運。興亡所繫何人。

庫車飛焉耆機中望輪台

冰河鐵馬西來。放翁夢裏輪台。遠樹層層翠鷲。古城還在。回頭早被雲埋。

焉耆贈蔣師長雲台

漢城

重逢西極東歸。故人久駐旌麾。畫裏焉耆信美。飽嘗豚味。沙梨樹下揮杯。

開渡河眺望

廖平里許長橋。天山雪水滔滔。一幅江南畫稿。倚闌閒眺。不會著箇蘭橈。

和靖水阻

蒙民碩靖爲城南疆多分漢城回城惟和碩和靖爲蒙城積潦阻礙行程有兩萬人引領豈忘和靖停輶無限關情。

焉者一名哈喇沙爾西南有效爾楚克卽今四十城

王覺民偕馬文彥韓樂然前往試掘余不得與

黑城卽哈喇沙爾意發見唐墟會傳天部泥軀古塑神情栩栩別饒風趣墟中應有殘餘

鐵門關風景優美相傳卽塔依爾棗娘殉情處

癡心王子三還一歸一度狂歡死去天堂不遠鐵門難限人生第一情關
情天妒網難逃願爲枝葉相交孔雀河邊木草不成合抱喧聲日夜波濤

告庫爾勒青年

分明西域居西云何東土名題自是中華體系不容兒戲相攜前進奚疑

由庫爾勒還焉者夜行戈壁上

暗中失去天山一車闖入雄關戈壁南連達坂七明星爛漫漫長夜風寒

新令得高昌錢屬記

得高昌吉利之錢。這青銅何厚何圓。百四十年祚踐。世間重見。不讓迪翁專美於前。此錢惟迪牙爾夫有之。新令無意得之。故頗自喜。

途次阜康縣（即古金滿城所在）

城南剩有浮圖。阜康曾被兵無。白骨同歸糞土。幾株枯樹。秋生一派蕭疏。

入博克達山馬上作

靈山突兀千年。白雲飛瀑高懸。馬上豪情不淺。雪峯當面。流泉處處琴絃。

天池月

天池上下銀輝。雪峯前後冰圍。一鏡照人在水。廣寒風味。涼蟾送我宵歸。

天池雨

霧中失去千峯。池邊零雨冥濛。不似長江浪湧。細鱗搖動。微微吹轉西風。

馬雲章軍長呈祥招飲帳中

將軍洗馬天池。帳中有酒盈卮。健卒迎風唱只。我聞如是。幾支青海歌辭。

山中野火會

熊野火頻燒。擔來盡是杉條。可惜深山樹老。伐爲庭燎。棟樑都付烟銷。

別迪化

平生不抱悲觀。玉門人又生還。所願花開月滿。永無災患。春風時度天山。

歸次皋蘭寓澄清閣燈下書詞紀卷尾

千年果見澄清。黃河不負平生。塞上秋風漸緊。玉門猶近。興龍獨弔成陵。

飲虹五種選 (北劇)

琵琶賺雜劇

正目 琵琶賺蔣檀青落魄

(淨扮蔣檀青抱琵琶上)



(北正宮)(端正好)錦江
 雨春如畫抱一面舊琵琶
 走遍天涯怕前頭鸚鵡迎
 人罵况又是前朝話

咱家乃咸豐宮中樂
 部蔣檀青是也如今
 流落江南正在落花
 時節勞人草草負了
 這一片春光想咱餬
 口四方憑着這一面

琵琶相依爲命。說也可憐。記四十年前。隨俺入宮的時候。那是什麼光景。到今日俺落魄江湖。大內亦非復當年景象。可惡那英吉利國的番奴。把圓明園付之一炬。強權世界。那裏還有什麼公理可言。只恨當日在朝一班委靡不振的庸夫。一箇箇不顧國家興亡。只貪自己的安樂。思之可恨也。

(滾繡毯)沒一箇張子房博浪沙。只一曲俊楊妃媚眼花。獨自的裝璜做啞。一箇箇大纛高牙。先帝在天之靈。能無一嘆。有福的別了咱。無情的恨了他。羞殺他麒麟擅一班措大。軟哈哈愧煞烏紗。這穴中螻蟻。真無用。眼看他錦繡河山亂似麻。都做了鼎沸魚蝦。

從前事不消提起。想起來轉覺令人傷心了。來此已到維揚地方。正是江南好風景。煙花三月下揚州。只俺有心人。對此繁華益增惆悵。論起俺身世。倒與李龜年一樣淒惶。眼見着夕陽西下。怕已有酉刻時分。不免落店去也。(下)

(丑上)春光二三月。陌上遊人行未絕。只怕歸來日已傾。到此何妨歇一歇。您道在下面是誰。東南西北四路指揮使。坐鎮這座招商大客寓。李大老爺名喚小七的。便是。此刻到了黃昏。正值俺衙門上市。因此啓俺大駕。光降門前。指揮便了。於今先把旗兒高高掛起來者。

(淨上)來此廿四橋邊呀。招商客寓已在目前。借問掌櫃的。此處可有空屋麼。(丑)有有。請進去。(淨)咱一路奔波勞頓。異常疲憊。權且假寐片刻。喚您時再來波。(丑便下)(淨)

(叨叨令)俺一雙破襪閑遊耍。便天南地北無冬夏。只這四條絃。彈得俺寒毛乍。莫笑我困來一枕瓜棚下。兀的不是笑殺人也麼哥。兀的不是苦殺人也麼哥。須知那風波塵海多驚怕。

好不困倦人也。(睡科)(搗鼓科)(雜扮番將番兵蜂擁繞場俱下)(揉眼恍惚驚科)噯。剛纔隱

約過去一隊兵馬。彷彿當日殺進皇都。英吉利的番兵番將。咱想他每西洋大國。自號文明。只知殺人奪城。那裏知道什麼仁義道德。可憐俺們中國人。又太知道仁義道德。只落得喫下一場大虧。此後當知猛省了。

(倘秀才)他那裏厲兵秣馬。我這裏自尊自大。省可的舉國都如花木瓜。縱然有三寸舌。還能罵。只教他一輩子不着家。弄出這許多話攔。

(場上作火光衆喊科)(驚科)

不好了。圓明園一片火光。咳。這何苦來。你每既掠我財。復侵我地。還把我每這數千年奇珍異寶。萃集的地方。化為灰燼。英奴英奴。您每之罪。不在項羽咸陽之下了。噯。

(滾繡毬)那裏有定中原老孔明。老元戎。姜子牙。這火勢兒比咸陽還大。眼見得宮闕塵沙。雖是他小番奴。弄狡猾。可惜的朝廷倒架。使不出勢劍銅鑿。空教人西宮南內悲秋草。只賸俺落日西風聽暮笳。埋怨誰家。

可恨呀。可羞呀。此仇此恥。倘不能報。焉得爲人。

(雜扮各大臣狼狽逃走繞場下)

眼又見一班懦夫倉皇奔去。可笑您每得意之日。箇箇趾高氣揚。如今事起倉皇。又一箇箇東奔西走。

(塞鴻秋)往常間九卿六部擡聲價。一年四季多瀟灑。陶然亭多少忙車馬。崇效寺多少閒杯斝。萬柳堂揚柳佳。十刹海荷花大。幾會料半空中霹靂從頭下。

哈哈既有今日何必當初恐未免悔之過晚了。

(呵欠大醒科)方纔所見却原來是一場春夢日之所思夜形於夢只怪俺不肯忘了當年影事所以常常現於夢寐不知這箇夢境到了何日纔能醒來俺今日雖夢猶醒怕天下人雖醒猶夢哩

(耍孩兒)笑咱家慣說淒涼話問醫國手有何妙法俺寸心中吐出惡根芽那裏也舌粲蓮花這一場惡夢何時了(指琵琶科)怕半生生涯未必佳丟開罷儘着他墮中得鹿也不管井底鳴蛙

(作四更科)一夢醒來已及四鼓茫茫長夜天尚未明恐怕到了天明的時分國人或可醒了咱憑一面琵琶往來南北沿門叫唱近於乞食爲生不識知俺者尙有幾人蹉跎半百回首興嗟咱自家想起來

(煞)愧不如屈大夫賈長沙論聰明還在龜年下這飄搖身世年年老祇落拓江湖處處家搔白髮俺莫談家國且弄琵琶

從今後咱只願做一隻啼晨之雞朝朝暮暮彈着琵琶訴咱心事任他千里迢迢咱都不怕如今離光明不遠又要料理行程所謂馬蹄明日天涯路誰是燈前昨夜人咱便出門去也
(尾聲)調新絃重說法便芒鞋踏破都不怕且準備着幾支兒醒世歌詞作道情打(下)

茱萸會雜劇

正目 茱萸會萬蒼頭流涕

(淨扮萬蒼頭上)蒼頭蒼頭。知愁不知愁。老萬老萬。依舊窮光蛋。自家老萬的便是。自從來到常府。上算來已有二十八年半。生的生。死的死。聚的聚。散的散。老夫眼中看來。世上的滋味。比水還淡。老萬。您倒不如去做一箇和尚了。閒話且慢。尚有事情要幹。今天九月初九。奉了六主人之命。灑掃庭除。預備他們兄弟大張筵席。正好慶賀佳節。叮哈。一年一度重陽節。人世歡顏得幾回。且拿起了筭籌。捧起了箕畚。咱向廳堂收拾去也。(下)(末常有士上)好在故鄉謀樂趣。每逢佳節換衣新。早開兄弟團圓宴。數盡茱萸少一人。在下常有士。金陵望族。世代書香。三歲而孤。四歲失恃。萍梗飄蓬。居然也能自立。且喜身在家園。尚無跋涉天涯之苦。今乃重九佳節。擬作天倫之敘。昨已分付老萬。此刻光景尚早。堂前還沒灑掃。蒼頭何在。(淨上)

(北南呂一枝花)咱依人苦。一生悔不抽身早。看遍了興亡千載事。都向夢中拋。禁不住風雨飄搖。世態炎涼。老好一似長江東去。潮說將來一件件。妙想天開。一箇箇心機異巧。

唉。老了老了。朽木不可以雕。世上事也不忍心瞧。(相見科)六爺早安。今天起身恁早。老奴還沒把堂前打掃哩。(末)此刻大約已有卯刻時分。你掃過廳堂。還要去請諸位老爺。(淨)老奴未見吩咐。不知請那幾位爺。(末)東宅的二爺七爺。北宅的三爺五爺。還有垂柳巷的四爺。咱每系出同胞。長年疏闊。此番相聚。聊盡手足之歡。老萬。你切莫忘記去者。(淨)還有前面碧桃里的大奶奶呢。(末)俺每是兄弟會。大爺既已下世。何必請大奶奶。(淨)這箇(末)這箇怎麼樣。(淨)這箇自然從命。(末)對了。請了大奶奶。便不好辦了。還有二奶奶三奶奶多着哩。(淨灑掃科)

(梁州第七)(淨)俺且把廳堂灑掃。(掩淚科)不由俺珠淚潛拋。(末問科)你爲甚竟哭起來。(淨)俺不

似您哭不出的心腸。木石翻歡笑。(末)爲着什麼事來。(淨)俺想起大爺來了。想着他和人疼熱。識世低高。玉樓赴召。金谷難牢。(大哭科)大家緣風雨飄搖。小書生獨力支熬。想着他走南園種麥耘苗。轉東堂秤銀分鈔。不隄防返西方魂散魄消。枉勞這遭。尙留下伶仃白髮的當家嫂。兀自的不侍奉他年老。只想他井白衣裳事事操。今日家宴呵。還消不的您一盞村醪。

(末掩淚科)(淨)想老奴初來時。太爺還在。

(玉交枝)老人壽考。看遍侯門花草。一箇箇歌娛只覺春光早。有誰知命不牢。轉眼繁華如影泡。自從椿庭萎後。萱花老。可憐失巢小鳥。全虧你這賢德的哥嫂。

後來太爺太太相繼下世。三爺四爺年已弱冠。五爺年始十五。您家不過十三。可憐七爺纔兩歲。姑娘每也還未嫁。男啼女哭。多虧大爺隻手持門。這八口之家。方寄一枝之託。家內操持。倘若沒一箇大奶奶那還了得。他外則柴米油鹽。內則衣冠鞋履。早則天明而起。夜則三更而眠。及至男婚女嫁。等到各自持家立戶。方纔罷手。這十四年辛苦勤勞。爲着什麼來。記得當日七爺還未脫乳。大奶奶親自哺他。俺每奴婢雖是山野蠢人。談起來誰不肅然起敬。您把這大奶奶怎麼同旁人一樣看待也。

(烏夜啼)則羨他少年忠厚慈祥貌。則爲誰一家兒。瑣屑心焦。則憐他平生辛苦誰知道。守着燈火寒宵。望着月黑天高。那知道受恩不報。有兒曹。受恩不報。有兒曹。畢竟蒼天有眼。終明了。日月光明明照。似這等管家健婦。可不是雪裏芭蕉。

您既量大容言。老奴也就冒死陳詞。今日裏諸位老爺雖不會趾高氣揚。非常得意。箇箇卻都已能

自謀衣食。不是大爺大奶奶何以有今日。大爺若不是爲着操心過早。何至中途遽死。老奴放肆說一句話。大爺大奶奶也就算得是爺每的父母。俗語說長兄如父。長嫂如母。像大爺大奶奶這樣看待您每。那有一點差遲。老奴寄食門下。三代於茲。妄言本不合理。不過骨鯁在喉。不得不吐。六爺聰明當不見責。(末)老萬難得您秉心忠直。侃侃告我。那時節我年紀尚幼。所以事事模糊。您既把前情重新提起。我心裏很覺難受。(掩面科)我的先兄吓。我每負您了好。老萬您去到碧桃里請大奶奶。索性到我這兒來住。讓我稍稍盡心。慢圖補報。正是深恩猶比天來大。幾作天涯負德人。蒼頭您着人立刻前往。所幸路途甚近。咱便在此相候。(淨)吩咐下次小的。每快請大奶奶來。(淨)六爺呵。(罵玉郎)您既然聽我忠言告。是補過在同胞。想人生處世惟忠孝。况他是老年人風燭光。更須要格外看承好。

(丑隨老旦上)(老旦)老身戚氏。自入常門。垂三十年。不幸翁姑早逝。未獲永遠侍奉。此是我生平恨事。那時節小叔小姑無依無靠。煞是可憐。我力薄能微。隨先夫之後。以養以教。至今思之。猶覺未得鞠躬盡瘁。此也是生平的恨事。如今先夫又逝。紅塵事益復心灰。只兒輩尙能繼承先志。努力攻書。近年謬負時譽。這可稍慰予心。我一生只求兩件事。上不愧於天。下不忤於人。其他還有什麼想頭呢。詞纔萬蒼頭差人到俺家中。把我接到此處。不知六弟與我有何話說。(末迎拜科)嫂嫂大恩。我幾負德。今早老萬把從前事對我說起。教我好不傷感也。(老旦掩淚科)(淨)大奶奶聽稟。(感皇恩)恰纔的風木號陶。虧殺俺口舌牢叨。甫能夠想當年。感深恩。萬事請容包。現如今重陽佳節。誰不題糕難得的會菜。奠邀老少共登高。

(末)正是虧煞老萬(老旦)六弟此言從何說起。那本是我分內之事。只恐愧見翁姑於地下耳。蒼頭您又何苦繞舌(淨叩科)

(采茶歌)雖是老奴愚。也是他郎君好。幸他命兒中占定六陽爻。纔見得家宅平安和氣高。正好把花萼樓樂府唱今宵。

(末)吩咐安排家宴(您)領命(長嘆科)早問不過六爺提起。奶奶的辛勤誰人不知道。何須老奴說來(末)嫂嫂請進後堂。一壁廂您還快請各位爺去。正是不是茱萸兄弟會。誰來重話十年恩。(老旦丑末同下)

(淨)俺這一場訴說。把六爺喚醒了。纔知道迎養恩嫂。俺看世上負恩的人不少。有的是受恩不知。還有的是知恩不報。六爺還究竟是有良心的人也。

(黃鐘尾)算乾坤忘恩負義的知多少。况更有綿裏針兒笑裏刀。說甚麼知心好。刎頸交。到收梢只認得鴉青鈔。俺主人家還算是庸中佼佼。俺二十年兩眼昏花也看破的世情早(下)

女惆悵爨選 (南劇)

窺簾

題目 鄭小娘窺簾罷誦

正名 羅昭諫脫白興嗟

(旦豔妝上)

(懶畫眉)杜家有女白如脂。勸惜取青春這些時。春來秋去惹愁思。早描就一對鴛鴦字。羅郎呀。你莫等到無花來折枝。

奴家鄭氏。名喚小娘。當朝相國之女。因前年有一位錢塘的秀才。姓羅名隱。手寫許多詩篇。送呈俺家爹爹。奴從旁看見。煞是羨慕。奴家自幼兒耽些吟詠。嚼墨咀文。才子慚掃眉之譽。吟風弄月。卞和有懷璧之嗟。那羅郎筆掃千人。詩成七步。五車書富。四海名高。想必是個風流人物。這一段良緣。怎生錯過。可是教我女孩兒家。好難啓齒也。

(前腔)畫樓東畔幾沈思。把這一段沒對付的相思。向心上施。好姻緣你千萬莫參差。又不見前度劉郎。至且留下一曲傷心怨女詞。

正是當時自倚青春力，敢讓東風誤了人。(下)

(外扮鄭相國領祇候人上)詩云：龍樓鳳閣九重城，新築沙堤宰相行。我貴我榮君莫羨，卅年前是一書生。下官鄭畋是也，早歲成名，服官多載，於今官居一品，位極人臣，晝夜從公，無時或息。膝下一女，待字閨中，向平心願，又不知何時可了也。(淨扮蒼頭上)遠方有客至，報與主人知。(拜介)上復老爺，門上有一秀才，自稱羅隱，是老爺舊識，千里而來，專誠拜謁。(外)羅隱(沈思作悟介)哦，原來是前年投詩的兒郎，喚他進來。(淨下)(生上)

(前腔)鍾陵別後十年遲，誰承望夢裏飛騰。未有期，畢竟是文章誤我，我何癡，埋沒煞凌雲氣。又來向侯門頭一低。

俺羅隱潦倒名場，依然故我。此度入都，只因想起前年投詩事來，未蒙回報，那鄭相果有憐才之心，何以不提拔於我，且去謁見一遭者。(見外拜揖介)(外)昔時讀爾文章，頗有才思，故因努力前程，怎的自甘拋棄，不務經國大業，只逐雕蟲小技，老夫之所不取。(生作失望介)(旦領梅香潛上窺介作失望介)(外)羅生羅生，爾且記者，三年之內，不成進士，再休來見我。(生)領台命，就此告辭。(出門介)正是時來天地皆同力，運去英雄不自由。(原句生下)(外領祇候人下)(旦轉身介)適聽梅香來報，急忙前來一見，呖却原來這樣一個羅郎，好不令人愧悔也。

(前腔)險些兒做了李華妻，怪不得石子街頭擲左思。似這般醜兒郎，怎值得爲他癡，枉費我纏綿意。咳，早收拾起心腸不着迷。

(白)從此以後，奴也不讀他的詩了。(歎下)

(貼旦扮雲英上)鑾月爲歌扇。裁雲作舞衣。自家鍾陵一個營伎。名喚雲英的便是。(坐介)十二年。前有個姓羅的秀才。與兒相好。叵奈他富貴心熱。憐香意冷。沒多時。便進京應舉去了。不知果能遂意。波羅秀才。你是去了。兒家却依然淪落風塵。倚門賣笑。怎生是好也。

(梁州新郎)柳街花巷。蜂媒蝶使。那裏討金龜夫婿。朝歡暮樂。那都是假的呵。整日僧迎張送李。從沒似梁間海燕雙棲。(生上)(貼旦)呀。那進門來的好生面善。(作思介)起身迎介)客官敢是羅爺呀。(生)正是你。(貼笑)爺已認不出雲英了麼。(生)哦。雲英。至今你還沒嫁麼。我只說尋芳杜牧重。到湖州綠葉枝頭蔽。(貼旦)爺。你的衣冠。至今還沒有脫白麼。我只說春風得意也。上天梯。有誰知書劍依然一布衣。當日事。休提起。可憐爺的功名兒的婚姻。就中無一事。如人意。住了當日事。休提起。我又何嘗同你一樣可憐呢。我也曾被錢王愛重。不過以我之才。自當大用。而錢王沒有重用我罷了。

(前腔)上賓尊客。黃金白璧。俺也曾多謝錢王厚意。實指望分茅開府。早登雁塔。把名題。又誰道封侯無命。只落得釣守磻溪。嘗厭了黃齏味。窮途偏遇也可憐伊。倒同樣有不合時宜。一肚皮。雲英呀。爲汝下同情淚。(貼旦悲介)羅郎不必扯淡了。兒知爺的心事呵。又何須歎息劉蕡。兒也是爲爾下同情淚。兒家當年。又何嘗沒個情郎呢。只是把

(針線箱)好韶光。不會繫繫。終日在芙蓉帳裏。風情一笑。將人殢。從沒個同心偕老。作三生計。也不會神前。鬢臂焚香誓。只道是迎接他來也。送了。你從頭記。不覺的。年華逝也。依舊孤栖。

(貼同生哭介)(生)雲英。你且取紙筆過來。(貼取紙筆介)(生寫介)我來送你一首詩波。(念介)鍾陵醉別十餘春。重見雲英掌上身。我未成名君未嫁。可憐俱是不如人。(貼旦放聲哭介)好一個

可憐俱是不如人。兀的不教兒傷心也。(內作風雨聲)雲英不必如此悲歎。你且聽我說來。

(前腔)問誰是人間知己。央及煞風狂雨細。(向外指介)莽紅塵權做個埋愁地。把文章情愛深深瘞。說什麼佳人才子春燈謎。從沒見得意東風快馬蹄。從今記總不如蓬門蕙戶貧賤夫妻。

(貼)還是你的話不錯。外面風雨恁大。今宵莫去波。(生)咳。

(尾聲)傷心的秀才還對傷心妓。兩下從裏頭說起說起來。此恨綿綿無絕期。(同下)

屏除綺語。今且十年癸酉春暮。羈旅汴州。晴牕多暇。讀羅昭諫詩。因作窺簾一折。振筆疾書。半日而就。選套配調。悉本嚴氏譜秋舊式。夫以貌取人。太冲見辱。自媿倡婦。容甫心傷。悠悠千載。又豈昭諫一人然哉。烏乎。知過難逢。此身已老。關河日落。不覺愁生。四月二十九日。冀野自記。

課孫

題目 夫人城張母諭子

正名 石砭寨秦侯課孫

(老旦上)老身張門霍氏是也。家住在這泌水縣的寶莊。祖翁五典。官拜尚書。早年亡故。先夫銓。爲國捐軀。賜諡忠烈。我兒道濬。道澤。俱官京師。只有少子道澄。跟隨老身在家。這幾日。流賊風信。又不見好。不免喚出道澄來。商量則箇我兒何在。(生扮道澄上)娘喚你兒子出來。有何吩咐。(老旦)兒呀。聽說流賊趙四兒。率領六千多人。東渡山西。已近泌水。族中老少。都打算棄堡而去。依老身看來。避賊而出。家必不保。出而遇賊。身更不免。等是一死。道路原野。死有何別。不如我且堅守。賊必不得逞志。不知我兒意下如何。(生)娘親所見。正合兒意。我們且聚召僮僕。共同防禦者。(老旦)既然如此。且到堂前。待老身自親部署。(同下)

(生上)呀哈。流賊流賊。你果然不出我家太夫人之所料也。一連攻打了四日。我堡中矢石並發。畢竟寸步難進。現已往南退却去了。聽我朝廷表彰此堡。名曰夫人城。(唱介)

(黃鍾傳言玉女前)寇篋方張。問誰是中原屏障。守玉關。可曾有天朝宿將。(歎介)咳。我張氏宗族。雖然一時苟全。那四海蒼生。流離失所。沒有箇天朝宿將。出來收拾世局。如何得了也。我家太夫人。畢竟是個

婦人家也只能保全這寶莊一隅不能出而衛國。(唱)

(傳言玉女後)男兒要勇捍衛宗邦責在吾肩上願執戈馳驅作個丈夫榜樣(白)天下都似夫人城一般堅固那怕這區區流賊橫行我且將賊退的消息報與堂上知道(下)

(童子扮馬氏孫隨日上)蜀錦征袍手製成桃花馬上請長纓世間多少奇男子誰肯沙場萬里行我忠州秦良玉是也回想起這二十年來國難世難出生入死百戰艱難恍如一夢而今是垂垂已老兒子祥麟又不幸早世留下孤孫與我作伴祖孫二人相依爲命今日無事且率小孫在門前作耍孫兒你看我們這石砭寨好險要也(唱介)

(降黃龍)石砭風光也算得巍峨雄踞江上雖然是方百里威名不小白桿兵在當時虎視鷹揚堪傷世移迹往轉眼間一度滄桑看我這鏡中白髮早不是馬上紅粧

(童)阿婆人家說你也曾見過戰來是不是隨爺爺一道走的(旦)孫兒你爺爺馬千乘本是石砭宣慰使在萬歷二十七年你爺爺帶領三千人去打播州我也曾練得兵五百跟隨他去守住鄧坎第二年正月裏賊人趁我們一天晚上宴會便來襲擊被我們打個落花流水東奔西竄一連破了金筑七寨直攻桑木關平了播賊誰知你家爺爺被部民寃陷便死在雲陽獄中(童)什麼叫做白桿兵(旦)白桿兵是我所教練的朝廷曾徵我這白桿兵在援遼你秦家兩位舅公條條都是好漢你大舅公邦屏在渾河戰死的二舅公民屏突圍出來是我用三千白桿兵將他救下那年朝廷給我二品服制並封你父祥麟爲指揮使之職三舅公翼明後來封了四川總兵官還有——佐明祚明拱明幾位表叔皆是能征慣戰的猛將(童)阿婆練兵豈是婦人能做的事你老人家不是會做過武官來麼(旦)你大舅公死的那一

年我派人製了冬衣一千五百套分給殘兵。我另帶了三千往榆關。上急公家難。下復私門仇。果然將身許國。何分男女。記得和民屏回家才一天。樊龍便在重慶造反。遣使送來金帛。被我斬了逆使。隨即出兵。那時奢崇明圍住成都。一位朱巡撫四方告急。只有我一鼓而行。解了成都之圍。又克復重慶。朝廷才封我夫人。賜誥命。授官都督僉事。充總兵官。那時有個總兵李維新與賊一戰。敗戰歸營。反閉門不敢見我。想來一個六尺軀鬚眉男子。還忌我一個巾幗婦人。誰說婦人家不能統軍作戰來。(唱)

(前腔)不是我幾年轉戰河湟。怎保得河山竟然無恙。道我家子弟報國惟忠。血染沙場。便我這婦人也當仁無讓。那其間懦將孱王。抱頭願望風逃走。抵多少鼠膽雞腸。

(白)到崇禎三年。源平四城失守。我又奉詔勤王。出家財濟餉。先皇帝召見平台。賜詩旌獎。收復四城。我纔回石砬來。後來七年二月。夔州失陷。我趕忙前往。賊人聞訊潛逃。羅汝才那廝一扼之於巫山。再敗之留馬垵。譚家坪。仙寺嶺。這幾戰。只殺得他心驚膽戰。親斬東山虎。手擒副塌天。那時節被楊嗣昌驅賊入川。巡撫邵捷春是個沒志氣的男兒。我會說。邵公不知兵。吾一婦人受國恩。誼應死。狗恨與邵公同死。後來張獻忠連破官軍。我見邵公道。只消發吾溪峒卒可得二萬。我家任一半餉。一半歸官家。定能辦賊。邵捷春畢竟不能用我之計。以至於不可收拾。(童)阿婆說來真好耍。你老人家真是將才。那張獻忠那是對手。(旦)是呀。孫兒我退守石砬以來。曾與白桿兵相約。誰從賊的。我就殺他全家。那時分兵守四境。賊人到底不敢往石砬進一步。石砬總算保住。一直到了今天。孫兒呀。你婆婆已老了。不中用了。要等你出來做一番事業呢。(童)阿婆不是說有志不分男女麼。如何年歲大了。便沒了勇氣。那趙國的廉頗。漢朝的馬援。誰不是老將呢。(旦)咳(歎介)

(前腔)已多年收拾起戎裝。將妙略戎機。爲兒重講。我自家是褪毛彩鳳。晚景無多。難再迴翔。(白)自古英雄出少年。何況老婦人。比不得那暮年壯士。孫兒呀。因你一言。使老身不勝悵惘起來。(唱介)那裏似當年情豪氣壯。二十年也曾經搏戰疆場。到如今呀。到如今龍鍾老態呀。畢竟娘行。(白)孫兒。我話說得太多。不覺口渴起來。我們回堂屋去來。我教你的那卷孫武子兵法。你還沒讀熟呢。(同下)

庚午初入蜀。舟次忠州。望秦少保石砦寨。詢之土人。遙指荒山。未得一往。及抵成都。一日。取讀明史。閱秦良玉傳。畢。附以張母夫人城事。寫爲短劇。此套廖柴舟續訴琵琶。嘗假是以自抒其牢愁者。烏乎。萬方多難。國少干城。少保若在。倘亦自忘其老。投袂而起乎。則廉頗馬援。不難見之巾幗中矣。冀野自記。

余嘗欲取復唐以後之金輪皇帝。撰劇一齣。以無事實供採擇。而其情緒與課孫亦近。重錄此稿。遂不復作。丁丑秋月。老冀再記於飲虹簃。

附錄

盧前傳

易君左

—— 載民國二十五年二月一日「半月」第二十一期 ——

有一位江南才子而面團團如富家翁近且蓄小鬚儼若卓別麟其一舉一動一顰一笑無不帶有幽默的味兒此人不至則滿座不歡而詩才詞調曲韻談鋒爲當代曲樂大師吳梅第一高足曾任各大學教授多年一年胖似一年者曰盧前。



余以一百八十九字之魄力介紹余友盧前之官銜不可不謂爲賣盡氣力余甚愛余友余二人之交誼甚篤設使余不幸瘋狂而擊其耳光數十百盧前亦只呵呵大笑因而余得以暢論盧前。

關於盧前之作品作風及著曲刻曲種種世有定評余第介紹其人之性情生活及天才與與余之交誼盧前現居南京小濟府其最近之行程唯余確知之本職任國立暨南大

學教授兼職分在上海南京。南京爲省立南中教孟子。故一星期中。兩天在真如。兩天在上海。兩天在南京。一天在火車上。余笑問之曰。不累乎。其小鬚子一皺。微笑而已。

盧前教孟子有活孟子之稱。學生至有立庭中遙聽者。其講演雖無宏大之巨響。而飄逸若出岫之白雲。機敏如守磯之翠鳥。生平最健談。最喜抽香煙。善飲。在蜀曾醉死二次。皆經女弟子救醒。衣冠不盡整潔。而落拓自然。尙應加入新生活運動隊。顧其爲人。靄然可親。卽之如春風。暖日。可以忘憂。世有牢騷抑鬱。心境不開者乎。請獻二法。包治其一。登明孝陵高台。嘯其二。置罍酒與盧生談天。不云杯酒。而云罍酒者。以盧前酒量大如罍也。不云盧前。而云盧生者。余之交情。可夠呼之也。

余引盧生二字見之。正詩與歪詩者。凡二次。一次爲民十六之秋。余寓白下名園之胡園。爲余與盧前訂交之始。一見如故。傾談至歡。此後萬綠陰中。常見胖哥之背影。余贈以詩云。濁世一翩翩。盧生在眼前。飲虹傳妙曲。抱雨著名篇。浪醉劉伶酒。狂呼李白仙。落花無訊息。悽絕是三絃。因盧前有抱雨攜風過小橋之句。及所著說部三絃也。又一次爲民廿一。余寓京口尤唐巷。成打油詩一首云。尤唐巷口路三叉。勾引盧生到我家。不信別來相憶苦。依然肥胖似東瓜。越一年相見胖乃愈甚。盧前笑謂余曰。不徒東瓜。而且葫蘆矣。盧年前胖得平均。後漸頭大腹大。而腰反略瘦。絕似葫蘆云。

盧前今年甫過三十。而一團天真活潑。則與三歲小孩子無異。偶而於雀戰之中。唱一兩句空城計。或哼三數句崑腔。皆楚楚有致。其爲人。泛交而寡偶。一遇相知。不惜披肝瀝胆。以投胸中。絕無城府。人但觀其嘻嘻笑笑。而不知此詩人。實負有兩肩之重荷。蓋盧生早孤。僅奉高堂菽水之歡。諸弟及子。係教育費皆其所負。而事母至孝。妻亦賢淑。盧前謂四川一行不虛。歸而悉將舊債清還。尙留千餘金刻曲。認爲平生。

第一快事云。

京口招隱寺有梁昭明太子讀書台。寺僧方事修葺。有橫額一方待題。一日余偕盧前及其女弟子趙蜀禾遊招隱。各書一聯與僧。僧復求盧題讀書台橫額。盧前略一歪首。援筆書二字曰：蕭齋。極爲切當。

友人周滌欽刻詩集。余既序之矣。復因余而求序於盧。盧前方坐余書室中。燈光下。吃花生米。嚙酒。卽所謂吃花酒者。周滌欽鋪紙請題詩。盧前方一粒花生米。一口酒。一句詩。花生漸漸吃盡。酒漸漸喝盡。而詩亦漸漸成篇。最后花生與酒皆不敵。詩花生完。酒盡。而詩興正濃。不免有酒闌燈絢之感。

三十以前之男子。其人若非癡。鮮有不經過一次浪漫程序者。而盧前亦自不免。惟盧前自有其分寸。絕不似盧梭。且其偶爾逢場。亦是書生本色。盧前雖不習佛。然而所稟佛性實深。若遇盧前。但覺其真。但見其樸。絕不似一般中年男子。自命爲聖經賢傳之繼承。而其行爲實有不可告人之醜。藜無他。僞而已矣。盧前生平有一至友曰任中敏。治曲學精於盧。而天才略遜。盧前又善於旅行。故暨大旅行團。一月而南。較北轍東奔西走者。悉爲盧前所領導。由京至鎮之一個多鐘頭。曾與余友游省。齋敲詩鐘。至二十次。脫口成聯。綜其一生。無倦容。無惡像。無怒意。待人勤懇。交友忠實。生性和平。余友葉古紅。亟欲一見之。而未可得。來往京滬道上。攜三大皮箱。無一衣襪。但滿儲書籍。并皆線裝書。抽香煙。至煙屁股。猶不肯捨。短髮。微微垂向額前。實電影中美化之黃君甫。設余組電影公司。余必出萬金聘盧生爲主角。而在盧生亦勝於兩天兩天兩天一天之生活云云。

嗟夫。冀野。盧前。字冀野。余正高吟杜甫懷李白之詩。盧前最近來書。謂郎靜山兄爲彼拍一照。頗有雍容華貴氣。當寄余。此信收尾。還來兩句。正是。窗前雪絮紛紛下。筆底波濤滾滾來。

諸家評紀

陳衍石遺室詩話

余嘗與盧冀野前談古今名勝。有未久而大變遷。有歷久而不改者。冀野遂舉所作展香山墓。因憶浣花草堂之游。一詩云。昔年曾過草堂寺。舍北舍南春水生。今日獨來居士墓。當門天闕尚崢嶸。余謂名勝之歷久不變遷者。有二原因。從來水有改流。有枯涸。山不改移者也。伊闕是也。人人共知之。名勝。成都之草堂。采石之太白樓。黃州之東坡。皆是也。地以人傳者也。冀野此首詩。格頗創特。表之。續編卷五

盧冀野詩。自喜學巢經巢錄三首。公諸同好者。夜過故宅云。秋星耿耿街鼓歇。秉燭敲門過故里。麥麵一盂山筍肉。笑煞吾家三妹子。年來健飯况痛飲。往往酣熱驚呼起。挂夢平生望鶴岡。隣寺鐘聲猶在耳。垂髫兄弟羅庭前。抓棗索糖各自喜。勞勞南北可憐人。回頭多少淒涼事。不飲已醇早停盃。揮毫淚上挑花紙。鳳陽得珥妹書云。在家日久望速出。既出家門念轉竺。客邸家書紙幾張。萬遍千回看不足。一言兩言細端詳。一字兩字誦反覆。昨日小妹書中說。慧嫂近來病雙目。年生戀乳麗生瘦。枕邊不覺淚簌簌。遂知父母待兒恩。山海難於况骨肉。此時老母坐床頭。慰媳抱孫定忙碌。難尋好夢渡長江。扶頭猶對鎗光綠。歸家云。兒病不索乳。母睡不解衣。雙眉鎖淚雨。朝朝望我歸。我昔在襁褓。我母亦如之。望我我已歸。父歸將何時。續編卷六

陳詩尊匏室詩話

江甯盧冀野前善詞曲。能詩文。三十許爲真如鎮暨南大學教授。有乙亥京口春游絕句。偕友人赴京口。云。幾日春寒染綠蕪。雨餘相約下南徐。棟花風裏城西路。側帽年時著酒徒。招隱寺云。蕭寺鐘聲漸不聞。沉沉萬綠綴山雲。尋春合向南郊住。曾有聽鷓戴隱君。竹林寺云。散策重來又一年。花前拄頰思茫然。竹林零落遊人少。讓我山堂自在眠。風致翩翩得宋人意境。又京口六言次王荆公韻云。倦矣天涯羈旅。幾回夢到瞳西。門外千株楊柳。歸來燕子悽迷。吾家本丹徒。祠墓在千穎柳村。余數過京口。迄未能往。亦佳。青鶴雜誌四卷四期。

吳必允王軒詩話

江甯廬前君字冀野。少有江南才子之稱。聲華籍甚。近年歷任皖蜀汴滬各大學教授。折節讀書。其學乃益篤實純正。而風流俊爽。健談豪興。不異昔日。行將以其剛健愉快之精神。使吾儕中正宏通之主張。得見知於莘莘學子。及芸芸羣衆。君實有其力與責焉。冀野於文學創造亦圖以新材料入舊格律。其在河南大學時。所編撰之會友雜誌。選材卽本此旨。中多可誦之作。冀野平生致力於曲。製作甚工。其次則詞。所造亦深。詩乃君之緒餘。今錄壬申以來五絕句不足表見君之特指也。此詩第一首第二句殆卽鄧君後鷺湖曲之意。與事歟。五絕句云。一夜我師一夜渡。瀏河却憶東窗細雨多。楊柳無情還自綠。任他旗影逆流波。二。過虎牢。遯跡西來感二毛。北朝車轍接南朝。思量三十年前事。涕淚滂沱過虎牢。三。自馬寺。馱經此日儻能神。突曲勞勞尙徙薪。雞犬依然飛不起。乞靈白馬又何人。四。榆關揮戈慷慨出榆關。不掃

倭奴誓不還。塞上旌旗都變色。更無白日照江山。五。燕月密雲城下飄紅葉。河水於今咽不流。拾得相思詩句在。可憐誰復夢神州。吳必詩集附錄

夏敬觀忍古樓詞話

江甯廬冀野前爲雲谷太史銓之曾孫。少年豪俊。善飲酒。工製南北曲。且能目譜。有飲虹五種曲行世。余爲飲虹糝填詞圖云。偷蜜憎醒村醉回。玉川健倒。在莓苔。蒲江詞句疏齋曲。兼併君家幾輩才。凌躡超驥。有不禁。座中誚嘍孰知音。譜成換取錢沽酒。飲釜如虹。涸吐金。二詩雖不工。蓋能寫冀野不凡之氣概矣。冀野既以曲名。其所作詞。遂不目珍惜。予願謂其詞亦不凡。近寒食前二日。侍瞿安師太平門外訪桃花。小桃紅云。吳道青衫薄。莫負春花約。江南二月綠楊城郭。况青山灼灼。遍桃華。且盡花前酌。空裏鶯聲落。枝上紅絨。決門草光陰。禁烟時節。金粉樓閣。羨十里門紅妝。唱徹迎春樂。調楊定宇偷聲木蘭花云。月圓花好相思老。一夜風涼蕉萃了。謾訴歸舟。繫得阿儂樓上愁。嬋娟不怨秋娘妒。夢冷覓裳人散處。萬疊雲山。彩雁蕭關。還木還。中秋前夕飲筠丈家。浣溪沙云。湖海飄零一少年。芒屨歸後故人憐。黃花消瘦夕陽前。客裏襟懷如病酒。夢中風雨未寒天。不辭殘醉落吟鞭。夜坐小齋感賦。臺城路云。平生心事從頭說。青山淚痕多少。走馬求名。挑燈訴怨。如此勞人草草。孤雲自好。只兩袖風清。一囊詩料。奄忽春光。依稀歡意。怕人曉。滄桑彈指閱遍。認兒時巷陌。遊屐猶到。雨滿江城。雲迷驛路。懶向長安西笑。黃鸝正悄。有千百橋西。一聲聲早。禾白秦郎。可憐春夢老。詩筆懼爲詞傷。詞筆懼爲曲傷。作者往往不能兼美。冀野尙不病此。

詞學季刊

葉恭綽廣篋中詞

冀野曲學專家。馳名海內外。詞不多作。恰是出色當行。卷四

邵瑞彭梧丘雜札

予乘病游梁。小住月餘。日與藥爐丹竈爲緣。所食者雙弓米耳。同客金陵。盧冀野爲老友。吳霜厓入室弟子。專精曲學。尤工套數。擷笛倚聲。四座動魄。歌媛俛童。得其片楮。爭相謳詠。比之元代關馬貫張諸賢。未遑多讓。天津名倡羅蘭者。與冀野未識面。而所歌皆冀野曲。冀野游蜀時。羅蘭展轉倩人往錄新詞。黃河遠上之詩。旗亭賭唱。楊柳曉風之曲。牙板爭傳。好事者爲作羅蘭度曲圖。並將羅蘭所歌琵琶賺菜黃會無縱情仇宛娘燕子僧雜劇五種。精刻行世。霜厓爲之序。冀野每日按拍之餘。輒入醉鄉。予贈以聯云。想開元舊譜。柯亭遺韻。盡傳胸臆。道宦途蹤迹。歌酒情懷。不似當年兩人身世。頗類孝標之於敬通。冀野今年才二十七歲。

錢基博現代中國文學史

江甯盧前冀野亦梅弟子也。著有飲虹五種曲。曰琵琶賺菜黃會。無爲州仇宛娘燕子僧。梅爲之序。曰近世工詩者或不工曲。至北詞則絕響。夕君五折皆俊語。不拾南人餘唾。高者幾與元賢抗行。民國二十一年一月日人犯我上海。以焚商務印書館。而梅之奢摩他室曲叢燬焉。精槧中較學者所憫。而前則承其緒業。專治令套。蒐羅孤本。彙刊二十七種。曰飲虹簞所刻曲云。上編古文學編。

江絮生吟邊札記

金陵盧前冀野工于製曲。尤長北曲。曩聞其於朱仙鎮謁鄂王祠。有雙調折桂令一支。頗負時譽。近代詞宗吳瞿安先生稱其爲曲中之稼軒。任二北謂每讀此曲。輒令人神輒。鄺衡叔則讚其有天風海濤之音。惜未一誦其文也。今夏旅居漢上。適與冀野同住。因獲窺全調。沈鬱雄奇。吳評當矣。曲附後。北雙調折桂令云。問神州今日何時。對一樹槐花。吾欲無辭。斜日荒祠。萬方多難。且讀遺詩。算只有英靈不死。是誰教少保班師。任十萬胡兒。百萬胡兒。談笑於斯。歌舞於斯。青年嚮導八期。

張振鏞中國文學史分論

吳門弟子之能曲者。則有任訥。廬前訥字中敏。江都人。前字冀野。別署飲虹。江甯人。訥嗜北宋詞。及北曲。故號二北。少從瞿安先生遊。居奢摩他室。盡發所藏書。考訂校勘。因輯散曲叢刊。又撰散曲概論一卷。曲譜四卷。持論頗多。獨到之處。訥不多作曲。而所作頗有可稱者。如解三醒二支云。正值我東華人倦。怎當他南國春妍。鄉心汨汨。徧難嚙。撩客絮亂如煙。這夢魂呵。俏隨草脚。連蕪苑。半搭雲肩。落故園。書囊捲長。揖向京塵十丈。多謝年年。一株水裏雲鬆。倩早趕到古渡頭邊。輕帆兒牽亂了風箏綫。真好個到家天。那郊迎柳葉都成串。我笑脫征衫。正是棉萱堂健。趁蘭膏絮別。廚筍留鮮。又有寄生艸一支。弔沙基死難烈士云。靈耿耿千年恨。血漓漓一片沙。誓盟呵。從今切齒心頭挂。責任呵。吾儕死後甯寬假。主義呵。饒他帝國何須怕。說甚麼推翻打倒總非難。只我這空拳赤手如何下。詞旨亦頗悲壯。前所作如朝天子遊春云。

相思折枝說甚麻垂垂子爐邊不見伶僮兒這其間多少風流事映水螺髻當門洒肆早寫下紅顏薄命詞此時發癡又前度劉郎至一封書寄內云南樓外探春萬花開可斷魂南樓上憶人獨憑闌可解神你流鶯扶夢衣猶冷我瘦蝶尋芳翅不勤有啼痕雜酒痕近日來溼透青衫只爲君訥與前親灸於瞿安先生者深故所作曲頗得元明人氣息第三編散曲五當代曲家

青木正兒支那文學概說

散曲集之通行者少最近漸有此斬嚮以元之散曲集太平樂府陽春白雪始明散曲集如太霞新奏新編南九宮詞吳騷合編等罕見本皆影印易得尤可注目者今盧前任訥二氏之專注力於散曲研究盧前編刊飲虹菴所刻曲任訥編散曲叢刊斯學之珍書出世後當益興盛矣第三章詩學

金梁橋夷門瑣憶

開封城中酒家以味蕪樓爲最舊在書店街口四方來者必往一嘗名菜所謂胡石青魚者以羊肉湯汆黃河鯉略加冬菜味絕佳時盧冀野教授河南大學取大頭菜豆腐乾切作絲以金鈎蝦米炒之以下飯亦爲食客所喜呼爲盧炒土人名之曰炒盧冀野者同時有太太魚則因劉主席經扶夫人得名法以江西豆鼓蒸河鯉亦珍品也胡魚盧炒條

張慧劍辰子說林

冀野自西北勞軍歸舟行過高家鋪成一詩路轉峯迴天未晚高家老鋪一停舟崖間叫賣葵瓜子錯認

烹茶得月樓。得月樓南京文德橋畔一茶肆。歷史殆近六十年。矮閣隣水。甚饒風致。冀野居京時常約友朋茗話於此。或有幼婦挈筐來賣葵瓜子。一銅元一掬。此純粹之江南情調。已五年闊別矣。不意冀野乃於數千里外之巴蜀得而重溫之。詩雖澹婉。而其意固甚楚也。江南情調條

張道藩曹庵偶筆

某日朋友多人聚餐。適冀野在座。當侍者送大魚一條上時。冀野十分興奮。以箸指魚曰。老兄許久不見了。同座皆大笑。

孫臨柏溪雜記

詞人盧冀野狂誕不羈。有友住渝城雞街。盧贈以一聯云。雞街閑歲月。巴縣好江山。他曰盧復來渝。其友亦贈以一聯云。雞公山下住。巴字水邊來。蓋盧方移家北碚也。盧冀野之狂條

秦冰臺明氣樓陞記

昔魏武帝歌曰。何以解憂。惟有杜康。又儀狄作酒。禹戒之曰。後世必有以酒亡國者。一戒一歌。奚啻天懸。然文人韻事。往往借以陶情遣興。稽康曰。彈琴飲酒。于願足矣。又李元忠曰。甯無食。不可使我無酒。千古傳爲佳話。陸魯望以江湖散人。寄情詩酒。其看壓新醅一詩。極能道着酒之妙趣。曉壓糟床。漸有聲。旋如荒澗野泉清。身前古態。醺應出。世上愁痕。滴合平。飲啄斷年同鶴儉。風波終日看人爭。樽中若使常能綠。

兩綬通侯總強名。廖文炳解之曰：此言酒亦有聲色。清如水，人飲至醉，而古態出，愁思平矣。且人之于世，亦惟是貧富之難置，易險之難忘耳。酌此酒也，飲啄斷年，何妨鶴儉，風波終日，一任人爭，但使樽中常滿，雖貴爲兩綬，亦強名而已。何如我之自適其趣乎？愚以爲此詩中，醺應出忘機也，滴合平，遣悶也，同鶴儉延年也，看人爭，息忿也，有此四美，更何求乎？酒乎酒乎，宜可耽愛，惟予點滴不沾唇者也。雖不能飲，因知酒理，故亦頌酒。予友朋中，尙鮮有以能飲稱者，有之，則惟共推飲虹君。初亦并不飲酒，身體亦瘦弱，玉立亭亭，不似今日之肥碩無朋也。二十以後，忽飲酒，乃忽漸胖，愈嗜盃中物，愈胖後，乃得趣彌深，嗜之若渴。予等亦惟見其腰圍日粗，酒量日宏，胖與酒畸形發展，遂成此負腹將軍之模樣。予平日見奇特胖人，二一爲君，一爲岑西林。无生，西林晚年游梁溪時，予往旅邸謁焉。其胖較君尤爲奇特，步履穩重，顧盼費力，自言坐時俯首欲視己足而不能，其腹部高出特甚，可想厥狀亦堪發噱。西亦能酒，豈酒與胖真有不解緣耶？抑以酒能忘憂，把酒者天懷曠蕩，天機鬯達，心廣則體胖耶？酒人能胖，亦未必盡然。究屬例外。君酒量極豪，陳散原先生寓金陵時，詩酒風流，人文萃至，極一時之盛。一日召集秦淮酒家，當時碩彥咸與，君時年最幼，先生席間談及詩人酒量之豪，平生所見無出顧石公右者。石公飲酒能至五斤，求之今日，恐無此人。言時蓋意有所激，并注視君，君乃奮袂而起曰：此何難！我能之。請即以五斤酒來，舉座皆矍然驚。一時旗鼓爲之緊張，君奪觥狂飲，壯氣如虹，興益豪，須臾五斤之酒立罄。當時執觴政者爲之咋舌，而先生大笑以爲豪舉。是日樂甚，迄後冬飲老人游北平時，與先生相晤，先生猶以爲言首問及冀野近日酒量如何，蓋引爲平生快人快事，久而不能忘也。君飲酒雖多，予惟見其有醺態而未見其有醉態，故不及於亂。二十年前教課鐘英中學時，則有一趣事可記。某日因飲酒後上課，不知如何入教室時，將香烟頭。

落入裏衣未幾烟頭着棉一時燃燒内外衣一齊起火君大約因微醺之故又正在指天畫地講解興高采烈之時未予發覺後由學生大呼始驚知急將全身衣服立時剝去始免于難此一場大禍幸告平息不然豈非令天下後世相傳曰盧生焚身爲耽蕪麵使詩人酒人之間又添一故實耶閑來記此以博鼓掌一笑因憶古人有因醉臥逃入竈下熱灰蒸衣火着膚後始驚知者同一趣聞唐史載魯望初病酒其後不復飲君今歲亦因血壓高止酒甚堅遂絕口不進甚望其以後能長久不破戒願以此記爲券飲缸嗜酒趣條

張友鸞戰時逸事

參政員盧前冀野吳瞿安先生之高弟今允爲國中治曲之第一人喜縱談突梯滑稽不恭玩世故主各大學講座輒爲學生所歡迎身肥面大客渝州時夏日長遇之於酒家汗出如瀋時時向侍役索面巾小如孩团手帕強及盧之片面每拭一次必用兩巾焉因渝市馬路起伏如坡嶺不敢乘人力車懼傾覆也出輒命輿輿人以其體重索資倍常爲盧所苦市間涼轎製造原極簡便抬竿多以細竹爲之以其富韌性且輕便也但不能任巨重盧端坐轎中時自慄懼兩手緊握架竹不敢稍懈顧終不得解其危蓋入蜀以來已斷折四乘轎子之竿矣其夫人居渝時遇盧出門叮囑周詳惟恐其踣盧似不甚介意良以不怕折斷天下人竿子謹用湯若士故語此固肥人應有之決心也參政會組華北慰勞視察團盧亦與焉沿途紀其蹤跡或詩或詞或曲其格不一千百年後之詩史也當自晉南歸洛時須山行數日竟與不可得俱策騎而南體肥身重非尋常之馬可負載軍中時選赤兔以供驂乘道中一老卒指示盧云去年平陸

之戰。我騎兵連六十餘騎。俱遭寇劫。獨此赤駒。奔至河崖。浮渡過黃河去。故軍中以此馬有神知。所奉特異。今以供先生騎。先生其無詞以贈此馬耶。盧聞言而有感。卽撫馬首。立成雙調。清江引一闋。題爲馬之讚詞云。吁。吾馬非中國馬。那許胡兒跨。風鬣走若飛。奔至南崖下。甘心死於河上者。嗟。斯馬猶忠義子。大勇原明恥。雌雄決有時。未了疆場事。黃流死何如。戰死戰馬亦常畜耳。而能逃身不被俘虜。能自渡大河不死。以歸其營。此豈常馬哉。盧曲作而此馬千古矣。盧冀野騎馬坐轎條

張乃薌鎖碧軒憶語

休沐無事。會聚奎校長周光午君招飲。遂偕二周笠塘雪耕安步當車。峯迴路轉。驀遇飲虹師獨立道旁。徐叩師亦徒行耶。曰划竿老朽。適中道斷。竚俟昇夫將新者來耳。相與軒渠而別。銀沙逸話條。

中華民國三十六年十一月初版

冀野選集

每冊定價國幣三元七角

(外埠酌加運費匯費)

版權
所有
不准
翻印

著
者

盧

前

發
行
人

劉

百

閱

發
行
所

中國文化服務社

上海福州路六七九號

電話九一七〇五

電報掛號五一二二三

南京珠江路一五六號

中國文化服務社印刷廠

電話二一八八六

印
刷
所

56-
2-12/82

68

